

أسياد وعبيد مملكة الجبل

سمير حمايه

المساء الضال

هناك المساء التائه والضال يفقد فيه الإنسان ذاته... يبحث عنها في كل مكان... في مدن الحيرة وشوارع اليأس وطرق العدم يتسائل من أنا ولا يجد إجابة... يبحث عن تفسير لأحلامه يتسائل أين الربيع ولماذا يعيش بفصل واحد هو الخريف واختفت باقي الفصول من سنين عمره.

ملخص للأحدث

انتهت أحداث الجزء الثالث، المعنون بـ الحاجر، عند كشف منيرة أخت
الذي يتواجد به حسن في الجبل، وعز الذي عل بمداهمة حسن في الجبل.
الذي يتواجد به حسن في الجبل، وعز الذي عل بمداهمة حسن في الجبل.

هناك أشياء جميلة لا تموت لاتنساها مهما علت أعاصير الزمن
..الصدقة الحقيقية وهي الزهرة الأجل في بستان الحياة، تنبت وتتفتح
في القلب ولا تذبل.

.. السعادة وهي الحلم الذي يبحث عنه الجميع ولا يجدها رغم أنها
أماننا ولكن نتكاسل في تحقيق شروطها الثلاثة..أن تفعل بما أمر به
الله، أن تقنع بما قسم لك في الحياة، وأن ترضى بما قضى.
...لا تتحدث وأنت غاضب فإبليس يجد في الغضب اللحظة التي يمتطي
فيها لسانك.

....لا تلوم الجاهل على جهله فطريقه مستقيم من وجهة نظرة.
....إن لم يكن لك عقل يكون حجر أساس لشخصيتك، فاعلم
أن هدمك هين.

...عليك أن تعلم أن للرجل الحقيقي قلبان، قلب يتأمل، وقلب يتأمل.
...لا تكن مثل علماء سوء ولا من مبدعي الذات ولا من مفكري
الهدم ولا من مثقفي الكلام والفسفسطة فهم كصخرة وقعت من على
تلة عالية في فم نهر فهي لا تشرب منه ولا تتركه يسقي الزرع.

١_ مضيقة جعفر :

مائدة العشاء ، على المائدة طبق به زوجان من الحمام المحشي بالفريك
وطبق آخر به قطع كبيرة من اللحم، طبق شوربة (مسلوقه بلغة الصعيد)
مطشوشة بالثوم ، طبق ويكا و طبق ملوخية وعيش شمسي، يتناول جعفر
طعام العشاء بصحبة لواحظ، يقطع عليهم الطعام حضور الغفير مهران.
_الحق يابيه .

_ فيه أيه ياواد يامهران؟

_اللي لأمم كل الرجاله وطلع على الجبل

_ طلع يعمل أيه.؟

وقف الطعام في فم لواحظ وكاد أن يحدث لها قئ من هول
المفاجأة .

_ حيروحوا يجيبوا حسن

_ هو عرف مكانه .؟

_ أيوه ، عرف مكانه من الواد السلوتي ، بيقولوا

مستخبي في الدرب اللي ورا السيف.

ترتبك لواحظ وعندما تحاول أن تقف على قدميها ، تُسقط الأواني
والأطباق الموضوعة على مائدة الطعام.

_ فيه أيه يالواحظ ؟

_ مفيش يابا .

يلتفت لمهران

_ وبعدين ياد يامهران.

_اللزي بيحضر الرجاله ورايحين على الدرب.

الإرتباك يظهر على لواحظ بشكل غير عادي ، يلفت نظر جعفر

إليها ، تجري مسرعة خارج المضيفة .

_ البت دي مالها ؟ فيها أيه؟

لواظظ تصعد السلم ، تفتح باب حجرتها وتدخل مستلقية فراشها، تحتاج

أن تتكلم ولكن مصيبتها لن تجد مَنْ يُنصت ،هي عشقت الوجد حتى أصبح

فرضاً عليها تمارسه صلوات كل نهار وليل،تبحث عن مصباح ضئيل لتشعله

حتى تتخلص من لعنة إستمطار الظلام، تجلس وتقف ، تسير وتعود لتجلس

هي في حيرة مابعدھا حيرة ، تعاتب نفسها على عدم قدرتها السيطرة على حالها أمام أبيها.

_ أيه اللي حصل منك ده يالواظظ،، تفتكري

أبوكي أخذ باله منك ،ولو أخذ باله حيقل

أيه....؟

تعود ملتزمة العذر لنفسها .

_ منا كمان غصب عني واللي حصل مش

شوية ،المصيبة يكون اللزي عرف حاجه

عن علاقتها بحسن من السلوتي .

تصرخ متوجھا لربھا بالدعاء باكية.

_ إرحمني يارب .

المساء الضال

تستطيع منح البشر الإبتسامة، لأنها الأرخص وتبقى الدمعة، لا تمنحها لأحد سواك، هناك مساء تائه، وضال يفقد فيه الإنسان ذاته، يبحث عنها في كل مكان.. في مدن الحيرة وشوارع اليأس وطرق العدم يتسائل من أنا ولا يجد إجابة... يبحث عن تفسير لأحلامه يتسائل أين الربيع ولماذا يعيش بفصل واحد هو الخريف واختفت باقي الفصول من سنين عمره.

في الصحراء اللزي ورجاله يعفرون الصحراء بالتراب بأقدام خيولهم
التي تجري بلا وعي ، هو وهارون وبكر وطلب وكريم وهريدي ومعهم
أكثر من عشرين رجل.

.....

هارون للزي

_ إحنا ندخلهم الدرب من عند السيف
علشان نقدرنا نحاوطوهم .
_ لا حنلفوا من ورا الكوله (هضبة عالية)
علشان نطوقوهم، لو رحنا من ورا السيف
ممکن يكشفونا.

.....

مساء بلون الألم

هناك مساء بلون الألم، نفتقد فيه كل ألوان الحياة، مساء ترتدي فيف الدموع ثوب
الحداد وتزين بالوجع، لتشعل اللهيب علي الخدود وتراقص عليها الأهات وتعزف سيمفونية
الألم، النغم الحزين، سوف نظل في نظرهم أطفال الإنسان. ربما أطفال خطيئة وهم الآلهة.

حسن ومنازع وحمدان ومرسال والحمداني أمام الخيمة في الجبل .
_ أنت يامنارح حتاخد ساتر في مدخل
الدرب من اليمين.
يلتفت حسن لحمدان .

_ وانت ياحمدان حتاخذ ساتر في شمال
الدرب عكس منازع .
يلتفت لمرسال .

_ وانت فوق الكوله ، حتبقى كاشفهم
وأنا حكون في نصف الدرب من ورا
الخيمة .
الحمداني لحسن .

_ ماتيجي يابني ، نسيب المكان ونمشوا
أحسن ، ويادار مادخلك شر، وييجو
مايلاقوش حد ، حياخدوا بعضهم ويمشوا.
_ لا ياعمي ، احنا مش حنهرب ثاني
اللي لازم يعرف إن عضمنا ناشف ومش
لقمه طريه ، مش حنخليه يفكر يطمع فينا ثاني.
منازع

يعرف اننا مش ساهلين . دول حتي
ماراعوش ان بكره عيد الضحية
وجايين علشان يضحوا بينا.

.....

دار اللي ، ليله قمل صفيحة ماء من الطلمبة، ومنيره تقف شامته
وساخرة من ليله .

_ حتروحي العيد بكره ، ولا حتحزني
على رقبة حسن ، ومين عارف رقبة
مين كمان تروح.

_ قال الله ولا فالك ياوش الفقر

تترك الطلمبه وتتجه نحو منيره.

_عاوزه آيه مني ،أنا مش فايقالك.

حلي بعيد عني دلوقت ، وإلا والله

أصور قتيل دلوقت.

منيرة ترتبك من تهديد ليله .

_ عشنا وشفنا ، البيت بيت أبونا

والعُرب بيتحكموا فيه وعاوزين

يقتلونا.

منيرة بغضب تبحث عن أي شئ لتضرب به منيرة ، تمسك بجذع شجره

_ والله ماسياباك .

منيره تجري نحو حجرتها وهي تدعو على ليله.

_ يارب أشوف فيك يوم ، ياليله يابنت تفيده العمشه.

.....

مرسال لا يبصر تلك النجمة المخبأة ،خلف ستائر السماء، تجلس بعيدة عن كل النجوم،
تبحث عن ذاتها، لِمَ لا تتلأأ كغيرها من النجوم، كل الكون لا يراها، هي تبتسم تنظر
إليه،ومسحت دمعة سالت على خديها... وبدأ الليل يسحب خيوطه وبدأت النجوم في الرحيل،
يحاول أن يتحسس الطريق

مرسال من فوق هضبة عالية ، يسمونها الكوله ، يظهر له من بعيد جمع كبير قادم في
إتجاههم ، يحاول أن يلتف من خلف الهضبة ، ينزل من
التبة ويجري مسرعاً ، يختل توازنه ويقع أكثر من مرة حتى يصل أسفلها.ويواصل الجري
نحو حسن .

أمام الخيمة حسن ومنازع وحمدان والحمداني يحدثهم في خطة صد
هجوم اللزي .

_ لما أضرب أنا أول طلقة ، انتو تضربوا ورايا .

يدخل مرسال منهك من التعب .
_ اللزي ورجالته جايين على هنا يا حسن.
_ جايين من أنهى حته.
_ بيلفوا من ورا الكوله.
_ عاوزين يفاجؤنا ويطوقونا.
يعطي حسن تعليماته لهم .
_ كل واحد يروح مكانه اللي قلت له عليه
يتجه حمدان إلى الناحية اليمنى من الدرب ومنازع نحو الناحية اليسرى
الحمداني
_ أنا حروح مع حمدان يا حسن يا بني
علشان أبقى مطمئن عليه.
_ ماشي يا عمي.
يلتفت نحو مرسال
_ إرجع للكوله بسرعه أنت يا مرسال
وأول ماتسمع أول طلقه مني ، إضرب
على طول.
يتجه مرسالة نحو الكوله فهو لا يزال لم يلتقط أنفاسه، ولكن رغبته في
الانتقام لأبيه رحان أنسته مافيه من تعب ومشقة .
صعب أن يسألك من حولك ماذا بك، وتجييب بليس هناك شئ ، وداخلك تبعثرت كل أشياء
الوجود، منازع يصل للجانب الأيمن من الدرب ، هو أحب
حسن لأنه قتل شيطان الشر داخله ، يساند حسن بلا مصلحة ، لا يبحث
عن ثمن ، ترك نفسه مثلهم للرياح تبعثرهم كلما شاءت، يختبئ خلف حجر كبير ، يصوب
بندقيته وهو يتربص الطريق.

.....

على الجانب الأيسر من الدرب الجبلي ، يختبئ حمدان وراء حجر كبير
ويقف خلفه والده الحمداني ، يقف في حالة إستعداد ، مصوباً بندقيته
لأسفل الدرب.

_ أقعد أنت يابا وإرتاح .

_ خايف عليك ياابني.

_ ماتخفش يابا واقعد ربنا يخليك

خليني أركز في اللي أنا فيه .

.....

للحق عين واحدة ، وللباطل ألف عين، ونحن نعشق التعدد، كل ملفات الحماقة مفتوحة
أمام حسن ، صعد إلى الجبل لمكان عالٍ قليلاً، خلف
خيמתهم ، يختفي خلف الأحجار ويراقب الدرب من أعلى.

.....

حتى سيف القانون والسلطة مُسلطان علي رقاب الفقراء ما أبشعها من إنسانية، ملهاة في
على مسرح الخيال على شفا إنتحار كل أبطالها.

إقترب اللزي ورجاله من الدرب ، بجواره هارون وهريدي وبكر وكريم

_ هارون وبكر حيقوا معاه وخمس

رجاله يفضلوا معاه ، باقي الرجاله يقسموا نفسهم، نصهم يروح

على يمين الدرب والنص الثاني على شماله.

كريم وهريدي يروحوا ناحية الكوله (الهضبة)

تتسحبوا بالراحه ، مش عاوز واحد يعتز في حجر يحسسهم بينا .

.....

بدايات الليل ، سحبت الشمس خيوطها وجاء الليل ليستعمر الكون.

أحلامنا مبعثرة في الدروب ،. مصلوبة تحت أقدام الأشقياء، مسافات الأمل محدودة ومساحات اليأس شاسعة ومترامية الأطراف. لذلك نرى دائماً دروب الأمل ضيقة، اللزي وهارون وبكر وخلفهم خمسة رجال يصلون بداية

الدرب، يقيدون خيولهم في الأقدام الأمامية ، يتسحبون ببطء داخل الدرب ،مجموعه أخرى من الرجال إتجهوا نحو يمين الدرب ومجموعة نحو

اليسار وكريم وهريدي اتجها نحو الهضبة التي يقف عليها مرسال، منازع يرى بوضوح رجال اللزي وهم على مرمى بصره، وأيضاً حمدان يرى

المجموعة التي تقترب منه .

.. اللزي وهارون وبكر يصلون مدخل الخيمة ، اللزي بصوت عالي

_ ياحمداني أنت وحمدان سلموا أنفسكم

مش جاي أضركم وخرجكم البلد، وأنت

ياللي اسمك حسن ، سلم نفسك بالراحه

مفيش خرم إبره حتلاقيه تهرب منه .

اللزي لم يجد من يرد عليه ، كرر كلامه أكثر من مرة ، طلب من بكر

الدخول داخل الخيمة ، دخل بكر وعاد مسرعاً .

_ مفيش حد جوه ياسبع.

اللزي لرجاله بغضب

_ إقلبوا عليهم الدرب حته حته.

حسن يظهر لهم من على بعد خمسين متر وهو يُخفي بندقيته.

_ بتدور على مين هنا يالزي .

المفاجأة هزت اللزي فلم يكن منتظراً تلك الشجاعة والجرأة من حسن .

_ هو أنا ورايا غير ك ياحسن .

يمسك اللزي بندقيته ويصوب بسرعة نحو حسن ، حسن يتفادى الطلقة

ويطلق طلقة نحو اللزي ، تأتي الطلقة في رأس بكر فيسقط ميتاً، مفاجأة أخرى هزت اللزي

، لم يتخيل أن يكون مع حسن بارود، طلب من رجاله الإختباء ، تبادل اللزي ورجاله إطلاق

النيران مع حسن حتى سقط قتيل آخر من رجاله ، اضطر اللزي للتراجع للخلف .

هارون يتراجع معه.

_ جابوا بارود من فين يالزي .

_ أنا حتجن إرجع لورا بسرعه، كده

إحنا مكشوفين ليهم.

تقهقر اللزي ورجاله إلى الخلف ، منازع في الجانب الأيمن في تبادل

إطلاق النيران مع مجموعة من رجال اللزي وأسقط منهم قتيل وجرح

أكثر من فرد ، لديه خبرة عالية في إطلاق النيران، بدأ رجال اللزي

في التقهقر والتراجع أمام طلقات منازع والبعض تقهقر وإختل توازنه

فسقط متدحرجاً حتى الأرض والقليل منهم نجح في الفرار وكل من بقي تم جرحه أو

إصابته راح يهرب من طرق مختلفة بعيداً عن موضع ضرب

النار، من يسار الدرب حمدان يطلق النيران على مجموعة رجال اللزي

فترعبهم المفاجأة ويتقهقرون وهم متفرقين ومنهم من يصرخ.

_ ارجعوا، بارود، بارود، بارود يارجاله.

حمدان يلمح اللزي يتراجع لمدخل الدرب ويتجه نحو حصانه ويركب حصانه محاولاً

الهرب وبجواره هارون أيضاً يركب حصانه، فيضرب حمدان طلقة في اتجاه اللزي الظاهر أمامه

ولكن الطلقة أخطأت طريقها

وأصابت الحصان ، فسقط الحصان باللزي ، الذي إستعاد

توازنه وإحتمى زاحفاً بجوار جثة الحصان وأطلق عدة طلقات في إتجاه

حمدان، لتستقر إحدى الطلقات على جبين الحمداني فيسقط صارخاً صرخة مكتومة لا

يسمعا سوى حمدان، الذي يركي على أبيه.

_ أبا ، أبا .

الحمداني وهو يلفظ أنفاسه الأخيرة .

_ اختك أمانة في رقبتك يا حمدان.

.....

عند الهضبة كان مرسال ينتظر قدوم رجال اللزي، ملح كُريم وهريدي
يصعدون الهضبة ، أطلقوا بابلًا من النيران في إتجاههم، لم يتمكنوا من الفرار وإستقرت طلقة
في صدر كلاّ منهما فسقطا صرعى والسعادة ترتسم
على وجه مرسال محدثًا نفسه.
_ كده أنا ارتحت أخذت بتار أبويه
وأمي اللي ماتت حزن عليه .

.....

حسن ينزل من أعلى وهو يُطارِد رجال اللزي ، يتقهقرون أمامه ويفرون، يلمح اللزي من
بعيد وهو يقفز خلف هارون الذي
ينطلق هاربا بحصانه ، يكتفي بما حدث ويعود إلى الخيمة منتظرًا
أصحابه ، منازع ينزل مهرولاً من أعلى التبة ويسير في داخل الدرب
وكذلك مرسال يعود مزهواً بنفسه ونصره .يحمد الله على نصره عليهم
وتشتيت اللزي ورجاله ، يصل منازع.
_ شُفّتهم وهم بيّفروا من قدامنا زي المّعيز
دول اترعبوا لما سمعوا صوت البارود.
_ اللزي اتجن آخر حاجه كان يتصورها
أنه يكون معانا بارود.
يصل مرسال وهو في حالة فرحة وسعادة .
_ كلهم هربوا ولا نفر منهم قاعد.
وقعت أنا منهم اتنين .
منازع
_ وقع منهم مش أقل من خمسة
غير اللي اتصابوا.
حسن
_ فين حمدان ؟

مرسال

_ تلاقيه جاي في السكة.

يا لها من غابة صائد الدم يصطاد صائد الأمل، حساب الأمس واليوم والغد مقسوما علي
الجبين يساوي وجعا ، يظهر حمدان حاملاً جثة

أبيه على كتفه والدموع تملأ عينيه ، يهرول حسن ومنازع ومرسال
نحو حمدان .

_ أيه يا حمدان فيه أيه؟

حمدان وهو يبكي بحرقة

_ أبويه مات يا حسن.

حسن بنبرة حزن

_ أيه اللي حصل ؟

حمدان

_ لقيت اللزي قدامي وبيركب فلوته (حصانه)

ضربت عليه بارود ولكن الباروده جات في

الفلوة، رد عليه بطلقات بارود كتيره

واحدة منهم جات في أبويه.

مرسال

_ أنا حفر هنا قبر لعم حمداني.

حمدان معترضاً

_ مش حدفن أبويه غير في الجبانه

وف قبر أمي حتى لو حموت فيها.

حسن

_ معاك حق يا حمدان ، عم الحمداني

مش حيندفن غير في الجبانه ، بينا على هناك.

..يحمل مرسال الجثة مع حمدان ، حمدان يرفع الجزء الأمامي

من الجثة ومرسال الجزء الخلفي .

حسن لمنازع

_ خليك أنت هنا يامنازع ، مش عاوز
حد يشوفك معنا .

_ حروح معاكم وقبل ماتدخلوا الجبانة
حستناكم من بعيد ، وأراقبكم.

_ ماشي يامنازع

بدأ موكب جنازة حمداني الصغير في السير نحو المدافن في صمت
وعيون دامعة وحمدان في حالة بكاء لا تتوقف .

حسن

_ شد حيلك ياحمدان ، مفيش حد

يغلا على ربنا ياحمدان

حمدان في حالة صراع بين قلبه وعقله، القلب للعقل.. لا تفسر لي الرؤيا وافعل ماشئت
وستجدي إن شاء الله من الصابرين.

.....

يصل اللذي إلى داره منكس الرأس ، في حالة غضب غير عادية
هو لا يعترف بالحقيقة ويود أن يحافظ على قصور الوهم التي
يبنيها ويحيا فيها ، يطرق الباب وتفتح منيره . تستقبل أخيها
_ أنت جيت ياخويا، جبت رقبة حسن

مش كده ؟

اللذي يعض على كف يده بغيط.

_ غوري من قدامي دلوقت .

يدخل اللذي مُنكس الرأس ، يتجه نحو غرفته ، منيره تتابعه والفضول يقتلها لمعرفة
الأحداث، وكذلك ليله التي تنتظره حتى كاد الإنتظار يخنقها
ويفتك بها ، تنظر إلى اللذي في فضول ولكنها تخشى أن تسأله ، اللذي
قرأ مايجول بخاطرها وتكلم بإستهجان .

_ اطمنى ياليله ، رُحت أصيدهم صادوني

ولكن ، حيروحوا مني فين .

ليه ظهرت عليها الفرحه والسعادة والشماته في اللزي ومنيره وإتجهت نحو غرفتها ، بينما اللزي ينظر لها من بعيد يانكسار

دخل غرفته ومنيره في صدمة لم تتوقفها ، تسمرت قدماها في

مكانها ، ثم جلست على أقرب دكة في وسط الدار.

.....

بالقرب من المدافن، بين أشباح الظلام ، حمدان ومرسال يحملون جثة الحمداني ويسير خلفهم حسن ومنازع.

منازع

_ أنا مش حقدر أدخل معاكم الجبانه

أحسن حد يشوفني ، وحستناكم هنا.

حسن

_ ماشي يامنازع

واصلوا السير نحو الجبانه حتى دخلوها ومنازع جلس تحت إحدى الأشجار مشعلًا لفافة تبغ .

.....

داخل القبور حمزه الفحاحري وهو لفظ يطلق على حفار القبور

الفحاحري ينظر إلى الجنازة القادمة قليلة العدد ولا يرى نعشاً

وميت محمولاً على الأعناق ، يصل موكب الجنازة ويقف عند

قبر أم ليله .

حمدان

_ ده قبر أمي.

الفحاحري يتجه نحوهم ، ينظر لحمدان وتعلوه المفاجأة فهو يغرفه

ويعلم أنه مختفي بعيداً.

الفحاحري

_ مين ؟ حمدان !

_ أيوه ياحمزه وده أبويه ، حتدفنه هنا

في قبر أمي .

يبدأ حمزه في الحفر حتى ينتهى إلى الوصول للقبر من أسفل

ينزل القبر ، يتناول جثة الحمداني من حمدان ومرسال ويحملها

لداخل القبر .

.....

داخل قصر جعفر ، في حجرة المضيقة ، يجلس جعفر بمفرده

يفكر في مغامرة اللزي في الجبل ويحدث نفسه.

_ اللزي لو جاب رقبة حسن النهارده

حيتلوح ومش حنعرف نكلمه

ويقول ياأرض اتهدي ماعليك ادي.

يسمع طرق على الباب فينادي لواحظ لتفتح الباب ، تتجه لواحظ

لتفتح الباب فتجد هارون في حالة تعب ، يحاول أن يللم أنفاسه

_ فيه أيه ياعم هارون.

يرد وهو يستجمع شتاته وأنفاسه المبعثرة .

_ جناب البيه جوه .

_ أيوه جوه ، قاعد في المضيقة.

هارون يهرول لحجرة المضيقة ولواحظ خلفه ، يدخل المضيقة

يجلس على أقرب أريكة ، جعفر في تعجب وفضول.

_ فيه أيه ياهارون ،مالك ، القيامه قامت.

_ ياريت قامت ، إحنا لسه راجعين

من الجبل .

_ وجبتوا رقبة حسن ولا شكلك بيقول غير كده .
_ مقدرناش عليه ، ولقينا البارود
بينضرب علينا من كل حته .
_ بارود أيه؟
_ مانعرفش جاب بارود من وين
وقع خمسة مننا ، كريم وبكر وهريدي
واتنين رجاله كمان.
.. لوحظ تتصنت عليهم وعلت وجهها الفرحة بنجاة حسن
من كمينهم، إقترب بباب المضفة حتى إلتصقت به ، حتى يأتي
إليها صوتهم بشكل أوضح .
جعفر بغيط
_ قول كلام غير ده ياهارون
_ ده الي حصل وكان ممكن حسن
يخلص علينا ، معاه رجاله بيضربوا
من كل حته ، معرفش جابهم منين
اللي كانوا حيضربوه والبارودة
جات في الفلوه بتاعته وأنا أخذته
ورايا على فرسي وجريت .
_ واللي فين دلوقت ؟
_ تلاقيه في البيت بيموت من الغيط،
_ بس حسن جاب بارود من فين .
_ ده الي مش لاقى له تفسير.
_ طيب قوم بينا نروح نزور اللي
عاوز أبص في خلقته وشكله عامل ازاى بعد الضربة الكبيرة دي.

لواظ تنسحب من أمام باب المضيفة وتصعد لحجرتها، في قلوبنا الكثير من الكلام نعجز
عن شرحه فنترك للدموع فرصة للحديث، وأروع الدموع
دمعة فرحة بعد حزن، تكاد أن تطير من الفرحة لواظ داخل حجرتها ، هي، في سعادة
مابعدھا سعادة ، تحمد ربھا على نجاة حسن.
_ أحمذك يارب ،ألف حمد وشكر ليك ، حفظتلي حسن.

.....

عند الجبانه ، انتهى الفحاحري من الدفن وقام بردم التربة بالرمال
_ بكره حبني القبر يا حمدان.

_ تشكر يافحاحري ، ضروري تبني
القبر .

حسن طلب من الجميع قراءة الفاتحة والدعاء للميت.
حسن

_ ولا الضالين .

الجميع

_ أمين

أخذ حسن يدعوا للميت وهم يرددون خلفه

- اللهم ارحم روحاً صعدت إليك و لم يعد بيننا و بينها إلا الدعاء
- اللهم ارحمها و اغفر لها و انظر اليها بعين لطفك و كرمك يا أرحم الراحمين
- اللهم ارفع درجته في المهديين واخلفه في عقبة الغابرين
- و اغفر لنا و له ياالله و أفسح له في قبره و نور له فيه
- اللهم أبدله دارا خيرا من داره و أهلا خيرا من أهله و أدخله الجنة و أعذه من عذاب القبر ومن عذاب النار
- اللهم ارحمه فوق الأرض و تحت الأرض و يوم العرض عليك اللهم قه عذاب يوم تبعث عبادك
- اللهم أنزل نوراً من نورك عليه

- اللهم نور له قبره و آنس وحشته ووسع مدخله .
- اللهم ارحم غربته و ارحم شيبته .
- اللهم اجعل قبره روضه من رياض الجنة لا حفره من حفر النار .
- اللهم اغفر له و ارحمه و اعف عنه و اكرم منزله .
- اللهم أبدله دارا خيرا من داره و أهلا خيرا من أهله و ذرية خيرا من ذريته و زوجا خيرا من زوجه .
- اللهم انقله من ضيق اللحد ومن مراتع الدود الى جناتك جنات الخلود .

شد حيلك يا حمدان ، عمي الحمداني

غالي علينا كُننا

يحتضن حسن حمدان .

في الدرب

لا تسألني عن حكمة إغتصبها إبليس، وأنجب منها بنات أفكارنا وبنات أفكارنا أنجبن فكر السفاح، برغم أن الله وهبنا البصر والبصير منا من

يعيش أحول، والغالبية إختارت أن تعيش عمياء. إن غابت شمس

العدالة فطبيعي أن يسود ظلام الباطل،جعفر يسير في الدرب بصحبة

هارون ، أهل البلدة في الدرب يرمقونهم بنظرات إستهجان وعدم

ترحيب ومن يرد عليهم السلام ، يرد مجاملاً ومشوحاً بيديه بهرود

جعفر وهارون يقابلان ذلك بإبتسامات ساخرة وماكرة ، يوزعونها

هنا وهناك .

_ الواد حسن ده ،جن مصور وشوكته

بتكبر جوانا ، وحيبقي خطر علينا

_ معاك حق يا هارون ، واللي كده

جاب آخره، مش حيقدر عليه.

_ ما تبلغ عليه الهجامة وهم يتصرفوا معاه.

_ مش عاوز رجالة الهجامه تاخذ على البلد
ضررهم أكثر من نفعهم.
_ وحنعمل أيه مع حسن دلوقت؟
_أخلص بس من بيع الحيازه
وأفضى لحسن .
يصلان دار اللزي ، يستقبلهم طلب وهو في حالة حزن
هارون لطلب .
_ عارف إنك زعلان على صاحبك بكر
البقيه في حياتك .
_ أنا مش حرتاح غير لما ناخدوا بتاره
_ حناخد بتاره وتار كريم وهريدي وكل
الي ماتوا .
جعفر لطلب
_ كنت معاهم ياطلب في الجبل .
_ ماتفكرنيش يابيه ، أنا نجيت معرفش
إزاي ، البارودة كانت بتعدي جنب ودي.
يفتح طلب الباب ويسير بجعفر وهارون في الممر، يسرون في
الممر وطلب يتقدم جعفر وهارون خوفاً عليهم من كلاب اللزي
مجموعة من الكلاب تنبح وطلب يُبعدها ويعاتبها.
_ ده البيه ياولاد الكلب ، بطلوا تنبحوا.
جعفر يبتسم
_ اللزي مش فالح دلوقت غير
في تربية الكلاب .
_ دده ييموت في تربيتهم.
..وصلوا باب الدار ، طرق طلب الباب ففتحت منيره التي تهلل وجهها برؤية جعفر.

_ جناب البيه ، أنا مش مصدقه

زارنا النبي النهاردة .

_ إزيك يامنيره.

_ بخير بحسك يا جناب البيه.

إتفضلوا ، بيتك ومطرحك.

.....

أمام الخيمة ، حياتنا ألوان متداخلة ومتغيرة، نفتقد لوناً ويحل لوناً وهكذا بلا إستقرار، كل شئ متغير، ومتجدد، في وطني الأماني مشرده. الأحلام لاهثة في شوارع اللصوص، في وطني الفقير مصلوب علي أسوار الأشقياء،

يجلس حسن ومنازع ومرسال .

_الذي حبيتي يقلق منك يا منازع

حتعمل أيه معاه.

_ مش عارف اقوله أيه وحوّريه

خلقتي إزاي.

_ ماينفعش ولازم تقابله ، علشان

نعرف ، مين حيش تري الحيازه

وحيروح لجعفر امتى.

مرسال

_ منازع كده انكشف قدام الذي.

حسن

_ لازم نفكر يقنعه إزاي ويبعد

أي شك عنه.

_ الذي حيشك في حالتين ، خروجك من داره وحيسألك رحت فين وعلشان هو أكيد

حيشك فيك في موضوع البارود ، حيسألك تفتكر حسن جاب البارود من فين ؟

مرسال

_ مسألة البارود ساهله ، يقول باعوا

البهايم الي سرقوها من الجنينه

واشترؤا بفلوسها بارود.

_ ومنازع عرف منين أننا سرقنا البهايم

منازع

_ دي ساهله يا حسن، مفيش حاجة بتستخبى

وهم عارفين أني بروح سوق التلات.

_ يعني كلام مرسال يقنع اللزي؟

_أيوه .

_ يبقى مش فاضل غير انه يسألك رحت

فين بعد ما طلعت من هنا .

_ دي مش عارف ألاقيها حل.

حسن

_ لقيت حل ، أنت تقول للزي انك مشيت

من داره علشان تسبقه وتقتل حسن ، طلعت

على المغارة تجيب بارود ولما أخذت البارود

وطلعت على الدرب علشان تخلص على حسن

شُفته هو والرجاله بيضربوا نار وبينضرب

عليكم نار، قلت للزي كده سبقني وقعدت

تراقب ضرب النار ، ولقيتك أنت ورجالتك

يالزي هربتوا من قدمهم، قُلت أنا بقى حكمل

وحصطادهم واحد واحد وأعرف عددهم.

مرسال

_الكلام ده صح ، وعلشان تقنعهم أكثر
قول قتلت منهم واحد ، ماهو اللزي
مايعرفش أنه قتل الحمداني.

حسن

_ عفارم عليك يامرسال .
يلتفت حسن نحو منازع
_ وقول كمان ، شُفتهم شايلىن القتيلى
الى قتلتة وطلعوا بيه على الجبانه.

منازع

_ إزاي أشوفكم من غير ما أضرب عليكم
تاني .

مرسال

_ قول انك اتصبت في دراعك وكمان
البارود اللي معاك خلص .

منازع

_ الكلام ده معقول ، تعالى أنت بقى
إضربني بالسونكي بتاع البارودة
في كتفي وإجرحني جرح كبير.

حسن

_ مش مستاهله ، اربط دراعك وخلص.
_ لا يا حسن ، أنت متعرفش اللزي ، ده
مش ساهل وكمان 'كويلى الجرح.
تعالى اضرب.

يقترّب حسن من منازع ويتردد في جرحه .

منازع

_ اضرب بقى يا حسن ، أنت قلبك خفيف ولا أيه؟
حسن يغرز خنجر البندقية الأمامي في الكتف الأيسر لمنازع الذي
يصرخ صرخة مكتومة ، يقوم بعدها بإشعال نار وتسخين الخنجر
والقيام بكى مكان الجرح وربط الجرح.

حسن

_ كده مش باقى غير نضربوا طلقات بارود كلنا
فى الهواء علشان يصدقوا أنك هجمت علينا
يقوم حسن ومنازع بإطلاق أعيرة نارية كثيفة .
اللى مستلقياً على الفراش بملابسه الداخلية ، تدخل إليه منيره مسرعه
_ جناب البيه جعفر وهارون هنا ياخويا
دخلتهم المضيفة.

اللى يعتدل من نومه ، يرتدي جلبابه ويخرج مسرعاً لحجرة المضيفة
يدخل حجرة المضيفة ويُرحب بجعفر وهارون.
جعفر ساخراً

_ سلامتكم ياسبع الحاجر.

اللى منكسراً

_ اللى يسلمك يا جناب البيه.

_ أيه اللى حصل ؟

_ مش هارون قال لجنابك على اللى حصل.

_ انا عاوز أسمع منك .

_ اللى حصل طلعتهم بالرجاله ، وخذونا

على خوانه ولقينا الدنيا بتمطر بارود حوالينا

من كل حته .

_ وطبعاً ماكنش قدامك غير أنك تهرب وتجري أنت والرجالة .

_ انت مش حتقدر على الواد ده يالزي
أنا لما أخلص من بيع الحيازه حوريك
أعمل فيه أيه ؟

اللي يُدرك أن جعفر يسخر منه ويقلل من شأنه أمام هارون وأنه جاء
لدار ليس من أجل الإطمئنان عليه ،ولكن للتشفي فيه ، ينظر لجعفر
محاولاً الدفاع عن نفسه، ونقل التوتر لجعفر نفسه ،الذي يشمت به
ليردها إليه ويشمت فيه.

_ العيب مش عندي يا جناب البيه
حسن بيعرف كل حاجه عننا
والأخبار بتوصله من دارك.

جعفر ينزعج من كلام اللي
_ من داري ! داري أنا ! أنت بتخرف
تقول أيه ، إ عقل كلامك يالزي.
ساخراً

_ مايكنش أنا اللي بوصل الأخبار
لحسن .

_ أنا ماقلتش أنت، أنا قلت من دارك
وماكنتش عاوز أتكلم ، ولكن أنت عمال
تتمقيط عليه وتدوس على اللي جابوني.
اللي إنكسر من دارك ، مش من حسن
هارون

_ أنت بتقول أيه يالزي.

_ أنا عارف اللي بقوله كويس
ينادي على منيره بصوت عالي.
_ ايوه ياخويا.

جعفر

_ مال منيره بالكلام الي بتقوله ؟

_ هي شافت كل حاجه بعينها.

_ شافت ! شافت أية؟

يلتفت نحو منزه.

_ شفتي ايه يامنيره؟

منيره تتصنع التردد في الكلام واللزي يشجعها.

_ اتكلمي ، قولي الي حصل قدامك لجنا ب البيه.

_ أنا كنت قاعده هنا زهقانه ، قلت أروح

اتفك مع لواحظ، أول ماوصلت الدار بسأل

عليها الواد مهران ،قلي موجودة وحتى السلوتي

لسه داخل عندها.

جعفر

_ السلوتي داخل للواحظ داري؟

اللزي

_ ايوه ، إستنى اسمع الباقي.

كملي يامنيره.

_ دخلت الدار، سمعت صوت في الجنينه

ربنا يسامحني إتسحبت بالراحه علشان

سمعت كلمة حسن ، لقيت الست لواحظ

بتطلع منديل للسلوتي وتقوله عاوزاك

توصله لحسن .

جعفر بغضب

_ لواحظ بنتي ؟

منيره

_ أيوه يابيه ، انا لما سمعت كده مظهرتش
لمنيره وسبتها دخلت وطلعت أجري
ورا الواد السلوتي ، لقيت بكر الله يرحمه
قلت له امشي ورا السلوتي وشوفه رايح
فين ، مشي وراه وشافه بيقابل حسن
ويديه المنديل ولما رجع بكر مسكه وجابه
هنا لاخويه اللزي اللي ماكنش مصدقني
وقالوا كل حاجه.

اللزي

_ ودي مش أول مره، السلوتي قلبي
حسن بعثلها منديل قبل كده ، والسلوتي
أنا حبسته عندي في الحوش ، لو عاوز
اجيبه ليك ، أجيبه يقولك بنفسه ؟
جعفر المفاجأة هزته، غيرت لون وجهه
_ لما أعوزه ، حبعثلك تجيبه.
يسرح بعيدا ويحدث نفسه.
_ كده يالوا حظ ترمغي راس أبوكي
في الطين، يكون اللزي بيكذب
يعود ويلوم نفسه
_ لكن حيكذب هو واخته ليه

يتذكر إرتباكها على مائدة الطعام عندما دخل مهران وأبلغه أن اللزي
خرج برجاله للجبل لقتل حسن ، تذكر أنها إرتبكت أكثر من مرة، المرة الأخيرة لم وصل
هارون وحكي عن فشل اللزي في قتل حسن، كانت
في غاية السعادة والفرح ، عكس لما عرفت إنهم رايعين يقتلوه

يتذكر كيف سقطت أواني المائدة أمامها أكثر من مرة.

يقطع تفكيره هارون .

_ أيه يابيه سرحت في أيه؟

كل حاجه وليها حل .

_ معاك حق ، كل حاجه وليها حل .

منيره

_ عاوزني في حاجه ثاني .

اللزي _ لا ، اخرجي انت.

تخرج منيره ، يصل لسمعهم أصوات الأعيمة النارية التي أطلقها حسن

ومنازع ومرسال.

هارون

_ البارود ده ، مش بعيد عننا ، ده في الجبل.

اللزي

_ أيوه صح وف نفس المكان الي كنا فيه.

هارون

_ بس مين يقدر يضرب بارود غيرنا.

اللزي

_ أكيد منازع ، ماهو مش باين له حس.

هارون

_ ومنازع حيضرب على مين.

اللزي

_ على حسن.

_ ومنازع عرف حسن من فين .

اللزي

_ أنا كريته علشان يقتل حسن ، هو فاضي

ويقدر يلف عليه نهار وليل في الجبل .

هارون ساخراً

_ اللزي بقى بيكري ياولاد الحلال.

اللزي

_ انت حتمقيط فيها.

_ لا حتمقيط ليه ، يمكن منازع يعمل

الي ماقدرناش نعملوه ، ويخلصنا من حسن.

جعفر بغضب

_ خَلَّاصَه مش حيكون غير ، على ידי أنا.

٢_ الطوفان:

لواظظ وكأنها تنتظر على باب سفينة نوح ، تنتظر الطوفان لتبحر، لكنها
لا تفكر بأن الطوفان يطرق بابها ، سوف يجرفها بأواجه بعيداً، فهل تتعلق بباب السفينة
أم تقودها لعواصف المياه ، تلهو بها الأمواج وتتلاعب
بها دوامات تلف وتدور بها في أعماق سحيقة ، مسكين هو هذا الحب العالق بذرات
الغبار، هو حلمها السارح على كف الأمل، قلبها يشتعل بالحريق، وعقلها تلون بزيت الصبار،
تطير بأجنحة متكسرة ، تطير عرجاء
في الفضاء نحو الشمس وكأنها تنتظر موعداً هناك على باب المستحيل.
لواظظ في حجرتها وهي في غاية الفرح والسعادة بعد أن إطمأن قلبها
لم تعباً بدخول حليلة ، تحتضن منديل حسن وتقبله.

_ يادي المنديل الي ماورناش غيره.

_ ده من ريحة حسن ياحليمه ، ريحة

دمه بشمها ، أحسس عليها ، ده منديل

حسن يابت.

حليلة تضحك

_ شلاه ياسي حسن ، ربنا يجعل

كلامي خفيف عليه.

لواظظ تسخر منها

_ حتفضلي طول عمرك هبله كده .

_ هو فيه أحسن من الهبل .

أنا أفضل هبله ، أحسن مابقى

مجنونه زيك.

_ أنا حسيبك بقى وأمشي بكره

عيد الضحية ، كل سنه وأنت طيبة

ماتيجي تطلعي معنا العيد.

_ ياريت أبويه يوافق .،

_ أبوكي مش حيوافق ، تلاقيه
متنكد من اللي عمله حسن فيهم
_ وانت لحقتي تعرفي الأخبار
_ معاك حق ، مانت مش حاسه
المياتم والصويت اللي في البلد
_ تقصدي على اللي ماتوا ، كريم
وهريدي وبكر ومعاهم اتنين تاني
مأعرفهمش.

_ معاهم خلف الحاج، ونصحي عتمان
البيوت مش بتبطل ندب وصويت وكأن
النهارده مفيش وقفه ، حتى الناس مابتدبحش
واللي بيدبح بيدبح في السر، بكره حتلاقي
نص البلد في العيد فرحان بحسن والنص التاني
في ميتم وبرضو من حسن.
حليمه تحاول أن تهمل بالخروج، وتستوقفها لواحظ.

_ إستني يابت شويه ، وحنزل معاك
علشان تاخدي لحمة العيد.

_ فيك الخير، عمرك مانسيتي
الغلابه بتوع أهل البلد في العيد

_ أنا وزعت على أهل البلد كلها
من فرحتي بنجاة حسن .

_ أبوكي لو عرف حيطين عيشتك
سيبيني أنا أروح وأنت افرحي
بحسن زي ما أنت عاوزه .

.....

..لوا حظ تحاول أن تستريح على مشارف الحلم البعيد، ولكن هل تجد وسائل للراحة، هي
تفتش وسائل الأمانى على مقعد من نار
تنتظر قطاراً بلا موعد وصول .

جعفر يدخل قصره مهرولاً وصاعداً السلم قاصداً حجرة لوا حظ والشر يتطاير من عينيه ،
يشعر بطعنة شديدة في قلبه ، طعنة من إبنته مزقت
أشلاؤه ، حطمت كبرياؤه ، جعفر لنفسه.
_الواحد ممكن ينتظر طعنه من أي حد
في البلد ، ولكن الطعنه تجيلي من بيتي
من بنتي ، بتك اللى بتعمل كل حاجة عشانها
ترفض العريس ده ، ماشي، تعيب ع العريس
ده ، ماشي .

يصل جعفر لحجرة لوا حظ ويستمع لحديثها هي ، وحليمه، فضل أن يتلصص على
مايقولون قبل أن يدخل عليها حجرتها.
لوا حظ ينقلب حالها ، فرحتها بنجاة حسن ، أنستها أن أبيها ذهب
لدار اللزي .

_ يا مُرك يالوا حظ.
_ فيه أيه ياستي ، ماكنت كويسه دلوقت.
_ فرحتى بنجاة حسن ، نستني حاجة مهمه
قوي .

_ أيه هيه ياستي.
_ اللزي عرف مكان حسن من السلوقي
وممكن يكون اللزي عرف باللي بيني
وبين حسن ، هو مفيش فرحه بتكمل
كل فرحه ليه تجر وراها مصيبة.
_ أنت تستاهلي ، قولتلك بلاش السلوقي

ماسمعتيش الكلام .

الحنن ضيف ثقیل الدم، أقسم أن لا يفارق لوحظ، هو يُحب عشرتها
ودائماً يطارد فرحتها ، حتى يظل هو فقط أنيسها ، هو يعشقها وهي
لا تُحبه، في الفراغ الضيق نسیر. نمسك بالسحب الداكنة ولیل يقبض علينا. تقصر الأمانی
وتسير بخطوات متعرجة تحسب أنها تضلل اللصوص. بقايا فرح تتسرب من جيوب الأمل، يفتح
جعفر باب غرفة لوحظ بقوة
ويركله بقدمه ، المفاجأة تزلزل لوحظ وحليمه ، لوحظ تسمرت قدميها
وتوقف لسانها ، حليمه ترتعد من شدة الخوف ، لوحظ تحاول أن تلملم
حيرتها المبعثرة .

_أبویا.

حليمه بخوف وفزع وهي تهم بالخروج.
_ أنا ماشيه ياست لوحظ، أنا أتعوقت خالص
وأبويه حيزر بني .

جعفر لحليمه

_ غوري من هنا ، وماتعتيش هنا
خالص ، لو شفتك حقطع رقبتك .

حليمه وهي ترتعش

_ مش جايه ثاني خالص، ولا تزعل
نفسك .

تهرول حليمه مسرعة وهي مقطوعة الأنفاس، جعفر تقع عينيه على المندیل الممسكة به
لوحظ .

_ وريني الي في يدك ده .

لوحظ ترتبك، هي نسيت المندیل في يدها ولم تتنبه لنفسها بعد دخول أبيها أن تتخلص
من المندیل .

_ مفيش حاجه يابا ، ده مندیل.

يقترّب منها .

_ منا عارف أنه منديل .

ينزع المنديل من يدها عنوة ، يقرأ الكلمات الموجودة في المنديل
بالدم ، يقترّب من لوحظ أكثر ولواظ تتراجع إلى الخلف حتى إصطدمت بالسريّر
ووقعت عليه .

_ بتعشقي حسن يا فاجره!، أنا مش

مصدق نفسي! ، أنت تعملي كده؟

وف مين ؟ أبوكي ! مالقتيش في

في الدنيا كلها ، غير حسن يا فاجره

يصفعها على وجهها بكف يده أكثر من مرة ولواظ تصرخ

_ مش بإيدي يابا.

_ وليك نفس كمان تردي !

يصفعها مرة أخرى ، لواظ تستجمع قواها .

_ أنت السبب ، حبستني بين أربع حيطان .

يصفعها مرة أخرى.

_ أنت عايشه في قصر مايحلمش بيه والي.

_ ويفيد ب ايه قفص من ذهب لعصفور محبوس فيه.

_ لما كل ده مش عاجبك ، كنت عاوزه أيه، نعيش

زي المقاطيع في بيت خوص علشان تبقى حره.

_ ما قصدتش كده يابا ، أنا لا بشوف حد ولا حد

بیشوفني ، ومن كُتر الحكاوي عن حسن لقيت

نفسي متعلقه بيه ، قلبي مال ليه ، قلبي حسسني

أني واحده ست ، بني أدمه.

_ لسه بتبري غلطك ، معرفتش تربّي يا جعفر

عريتني أبوك وخليتي راسه في الطين .

يقترب منها ويشدها من شعرها.
_ إسمعى يابت سلمى ، انت بره عتبة
الاضه دي ماتعتبش خطوه ولو عتبتى
براهى ، حدفك بالحيا يالواظ يابت سلمى
يخرج جعفر غاضبا وترقى لواظ على الفراش وهي تبكي

٣_ العيد فرحة:

العيد أقبل على أهل البلدة ضاحكاً محاولاً رسم الفرحة على وجوههم
يطوف بالقلوب ناثراً فرحته، يُحلق في فضاء الكون ويغني من السماء
بترانيم المحبة والإيمان، نسمعه لحناً جميلاً سائغاً وزلاًلاً، أشرق بأنواره
فتلألأت الوجوه، ولكن هل ينسى الأعداء أضغانهم كما يتسامح الأصحاب عن هفواتهم، هو
يُهيح فينا مشاعر الحب والإيمان، طوال الدهور وهو
يرسم تلك البسمة الوردية على الشفاة.

.. صباح بلون الأمل على أهل البلدة ، في المسجد ينتهون من التكبيرات
الآخيرة لعيد الأضحى ، الله أكبر كبيراً ، والحمد لله كثيراً ، وسبحانه
المولى بكرة وأصيلاً ، حقاً لا إله إلا الله ، صدق وعده ونصر عبده وهزم الأحزاب وحده ، لا
إله إلا الله.

_ بمجرد إنتهاء تكبيرات العيد ، وسط تبادل التهاني والفرحة
أهل البلدة انطلقوا في يومهم الجديد المبارك وملابسهم الجديدة
نحو المدافن ، هي مكان فسحة العيد للجميع ، كبار وصغار وشباب
هناك عند المدافن سوق صغير يحيط بالمدافن يُباع فيه الحلوى والملوحة والطعمية والفول
النابت والخلة وأماكن مخصصة لألعاب
الأطفال المختلفة وداخل القبور يزورون الموتى ويترحمون عليهم
ويقرأون القرآن على قبورهم ويوزعون الصدقات نقود بارات أو حلوى
أو عيش فايش وآخر على شكل مثلث يسمونه ممنون، والبسطاء يوزعون أرغفة العيش
الشمسي حسب مقدرتهم.

.....

تظهر المدافن من بعيد ، يراها شحاته ابن الشيخ آدم ببصره ويتحسسها
الشيخ آدم بقلبه .

_ قربنا على الجبانه ياواد ياشحاته.

_ أيوه يابا ، كلها كام كعب ونوصلوا

حتجيبلي فرانه وملوحوه، مش كده يابا

– حبيبك الي أنت عاوزه ، بس نخلصوا
قرايه على القبور ، ونلموا فايش وممنون
وعيش وبعدها أجيبك الي أنت عاوزه
أوعي تكون نسيت الزكيه الي حنلم فيها
العيديات.

– لا يابا معايه ، ماتيجي نروح السوق
الأول يابا.

– سوق أيه ياواد، اسكت ياإبن عزيزة
خلينا نلحقوا الناس قبل مايروحووا
من الجبانه.

يدخل شحاته المقابر بصحبة أبيه وما إن يضع قدمه في المقابر
حتى نادت عليه إحدى السيدات.

– تعالى ياشيخ آدم اقرالنا شويه.
الشيخ آدم بفرحه.

– أول استفتاح يارب ياكريم ، ياترى
حيكون عيش ولا فايش.

يقترب الشيخ آدم من القبر التي تقف عليه السيدة، يبدأ في قراءة القرآن
هاقي بقى ياست .

المرأة تعترض

– إقرا كمان شوية .

– وباقي الميتين نسيبهم من غير قرايه.

تعطي المرأة رغيف عيش لشحاته الذي يضعه في الزكية، ظل الشيخ

آدم يتنقل من قبر إلى وقبر وهو يردد آيه يأيتها النفس المطمئنة ولو جامل أحد يضيف
سورة أخرى قصيرة ، إمتلأت زكية شحاته بأنواع

مختلفه من عيش وفايش وبلح وبرتقال والفرحة لا تسع شحاته.

_ يعني مفيش حد بينادي عليه أقراله.
 _ ماإحنا خلصنا كله والزكية إقملت يابا
 ومفيش باقي غير الميتين بتوع أولة عشيه
 اللي قتلهم حسن ، جايين شيخ من البلد اللي جنبينا
 _ عملوا خير والله ، أنا مكنتش حروح
 بنفس ليهم.
 _ بينا يابا نشترى الفرانه والملوحه.
 _ كفاياك الفرانه ، عاوز كمان ملوجه.
 _ ياباالملوحه لأمي رجليها تعبانه وماقدرتش
 تيجي.
 _ الحمد لله إنها ماجتش ، كانت طلب نابت وطعميه
 كمان ، ماهو أملك عزيزه ماورهاش غير الوكل.
 هل هاجر الحلم وأبصارنا معلقة بأشباح غير مرئية. أيادي مرتعشة تتخطفنا. ننظر للخلف
 ونحن لا نلتفت، ننظر للأمام بمؤخراتنا. ليس هناك من عرس ، حسن في الفضاء الرحب الواسع ،
 يهجو الصباح ليصله بحبائل
 النور وكلما مدح الليل حاصره بالكوابيس، هو لا يكل ، لا يعرف اليأس له طريقاً.
 خارج الخيمة تبادل حسن مع منازع وحمدان ومرسال التهنة بالعيد
 هم يعيشون العيد في أعماقهم ، يرونه في ضوء الشمس ونسمات الهواء، يتبادلون
 الضحكات مع أحجار الجبل .
 منازع
 _ أنا حنزل دلوقتي على اللزي ياحسن
 كأني رايح أعيد عليه وأخذ اللحمه بتاعتي
 حقوله اللي إتفقنا عليه ، ويارب أعرف حاجه
 عن ميعاد اللي حيشترى الحيازه .
 _ربنا يوفقك يامنازع ، خلي بالك على نفسك.
 _ ماتقلقش عليه ، أنا زي القطط بسبع أرواح

ويمكن أنا أكثر.

حسن يبتسم

_ ماتت عوقش هناك .

_ سيبنى إقلب في البلد براحتي.

_ قلب زي مانت عاوز يامنزع

.....

الذي يعاتب نفسه حتى أنه يود لو يعاقبها، يسكن قصور الحيرة
عاصفة من التساؤلات لا يجد لها إجابة، ه لا يهدأ يمشي في حجرته
ذهاباً وإياباً، هو بين فكي رحي ، وجع العشق وحسن الذي كسره
أكثر من مره ، يحرق القمح ويسرق البهايم من الجنينه، يدخل داره
ويحرر رحان وأخيراً هو قتل خمسة من رجاله ووضعه في خزي أمام
رجالهم إن لم يأخذ بثأرهم سريعاً من حسن .

_ وبعدهالك يالزي ، هيبتك ضيعها عيل

لازم تفوق ، ماتخليش عيل يكسرك

قلبك كمان يالزي بيدوس عليك ويمرمغ

راسك في التراب، لازم تموته وتدوس

عليه وتعتبره ميت ، أيوه لازم أعتبره ميت.

.....

الشيخ آدم يصحبه ابنه شحاته في الدرب بعد عودتهم من الجبانه.

_ تعبت يابا ، الزكيهه ثقيله، قطمت ضهري.

_ أهو أنت طالع لامك ، مش فالحين

غير في الوكل ، مش قادر تشيل

شوية عيش على فايش على بلح
ياابن عزيزه ، بقولك أيه ياواد ياشحاته؟
_ قول يابا.
_ أنا حطلع على دار المقدس وانت
خد الزكيه وارجع للبيت.
_ ومين حيوديك يابا .
_ أنا حلوش لحد مأوصل لداره.
الشيخ آدم يمشي متحسساً بعصاه حتى دخل بداية درب الحواشي ، بينما
شحاته سلك درب آخر يصله لمنزله، في الدرب يتبادل الشيخ آدم تهنئة العيد بسكان الدرب
، هناك من يعرفه فيناديه بإسمه ومن لا يعرفه يكتفي
برد التهنة بلا اسم ويتوه في تساؤلاته من يكون هذا ومن يكون ذاك.
وصل دار المقدس ، تحسس الباب بعصاه .
_ أيوه هي الدار.
طرق الباب بعصاه ، فتحت يشعه.
_ عم الشيخ آدم ، كل سنه وأنت طيب.
_ وأنت طيبه يابنتي ، المقدس فين؟
_ جوه ، إحنا لسه راجعين من العيد
في الجبانه.
يدخل الشيخ آدم فتصتجه يشعه من يديه حتى تصل منتصف الدار حيث يجلس أبيها .
أرميوس
_والرب لسه كنت على بالي وفكرت
اني أجي أعيد عليك ،وقلت إستنى
شويه علشان عارف انك حتقرا كثير
قرآن على الميتين في الجبانه، أقعد
ياشيخ آدم .

_ لا مفيش قعاد وقوم بينا على بيت جعفر

كأننا رايعين نعيد عليه وبالمرة

نكلموه في موضوع الأرض.

_ كلامنا مش حيجيب فايده وريح

نفسك، قولتلك كده مية مرة.

_ يامقدس إحنا بنعمل اللي علينا

وكمان علشان الناس اللي حتموت

من الجوع ، ياتيحي معايه ، ياتيحي

توصلني وادخل أنا.

_ يعني كده أو كده ، قايم معاك

يبقى أروح معاك أحسن

.....

الذي في حجرته ، يحاول أن يمسخ دموعه الهاربة إلى أعماقه
حتى الدموع تخشى شره ، تخاف أن تسقط على خديه فيؤذيها
هربت منه بوصلة الضمير، الذي جالساً وهو في حالة غيظ من
الأحداث المتتالية التي أفقدته إتنانه، يحاول أن يستعيد شيطان
الغواية .

_ فوق يالزي ، شوف حالك قبل

الزمن مايجري بيك ويضحك عليك

الناس أكثر وأكثر.

.....

ليلة جالسه على دكة في حجرتها، يدخل اللزي مندفعاً نحو حجرتها
ينظر لها لحظات نظرات غريبة ، ليله لا تهتم به ولم تلتفت إليه.
يقترّب منها اللزي ويمسك بيديها ويدفعها نحوه واقفة. يحدثها بأسلوب
لم تتعوده.

_ لما تشوفي اللزي ، تقومي تقفي

فاهمه يابنت الحمداني.

_ فيه أيه مالك داخل تقول ياشر

أنا عملتلك حاجة؟

اللزي ساخراً

_ عملتيلي حاجة ، لا ماعملتيش حاجة واصل

دا أنت سبب كل البلاوي الي أنا فيها، إطمنى

قلبي ده الي عشقك ، خلاص قتلته ودفنته

بالحيا كمان.

_ وأنا مالي بيه ، تقتله، ماتقتلوش

أهو قلبك وأنت حر فيه ومايخصنيش.

_ معاك حق ، فعلا مايخصكيش ، ماهو أنا

الي عبيط وخليته يركبني، إسمعى ياليله

يابنت الحمداني ، النهاردة السبت يوم الخميس

الي جاي حتكوني مرقى، برضاك ، غصب عنك

مش حمملك إعتبار.

_ وده يعني حيرحك .

_ لو ماريحنيش ، حيشفي غليلي، فاهمه

يابنت الحمداني.

يخرج اللزي من حجرتها قاصداً جعفر.

٤_أحلام ضالة:

عندما تُمطر السماء الوجد يتلقفه البُسطاء وكأنه يختارهم ويتفادى رؤوس الأغنياء،صعب أن تبذر بذور الأمل ولا تحصد سوى الأم هم ساكني حي الشجرة الباكية وتركوا لهم حي شجرة الصفصاف البُسطاء يتقاسمون هم الصباح والمساء وهم إستأثروا بكل الفرحة مضيقة جعفر ، يجلس جعفر ومعه هارون.

_لسه موضوع عشيه شاغلك يا جناب البيه.

_دي مصيبه ياهارون ، لا كانت على البال

ولا خاطر .

_ ماتكبرش الموضوع ، الست لواظ

لسه صغيره وعقلها عقل عيال .

_ صغيره إزاي ياهارون؟ أنت بتراضيني؟

دي لو إتجوزت ، كان زمان عيالها طولي.

يدخل مهران قاطعاً حديثهم.

_الشيخ آدم ومعه المقدس ،عايزين يقابلوك.

_ وعاوزني في أيه دول كمان ؟ هو أنا ناقص.

_ بيقولوا جاين يعيدوا عليك.

هارون ساخراً

_ ومن ميتته بيفكروا يعيدوا على البيه.

_ روح ياهارون ، قابلهم ومشيه، ولا اقولك

أنا حخرج أقابلهم بره الدار.

الفقراء أصحاب تلك القلوب البسيطة التي أقصى أحلامهم أن يناموا

مستورين ، هم يعيشون بأرواح ترفرف منكسرة محاولة أن تنفض

بعض الوجد والغبار الواقع عليها،تحتاجهم أحياناً خوفاً من عتمة الجوع، تحتاج أن تنظر

لهم في توسل ورحمة ، بكلام من عيون جائعة للراحة والسكينة والأمان.

أمام قصر جعفر ينتظر الشيخ آدم بصحبة المقدس أرمنيوس.
_ شُفت يامقدس جعفر لاطعنا إزاي؟
_ ماقولتلك بلاش المشوار ده ؟
_ أنا مش ماشي ولا حتتعت من هنا
حتى لو حبات قدام الدار.
يفتح مهران الباب ويخرج منه جعفر وخلفه هارون.
جعفر ببرود وتأفف.
_ إزيك ياشيخ آدم .
_ إزيك أنت ، أنا جاي علشان أعيد عليك.
_ فيك الخير والله .
يلتفت جعفر نحو أرمنيوس.
_ إزيك يامقدس.
ارمنيوس
_ أحمد الرب على كل شئ، إزيك أنت
وكل عيد وأنت طيب.
الشيخ آدم
_ قولي ياجعفر ، صحيح الي أنا سمعته.
هارون
_ سمعت أيه ياشيخ آدم ؟
_ إستنى أنت ياديل التعبان، قولي ياجعفر
ولا خليها جعفر بيه ، أنت صحيح حتبيع
حيازة أرض الحاجر كلها.
_ وفيها أيه ، دي حيازتي وأنا حر فيها؟
وبعدين مين قال أني بيع، أنا برجع
الأرض لصحابها ، كل الحيازات بتقول أنها أرض الأشراف.

_ لا مش صحيح ولا أيه يامقدس.
أرمنيوس
_ أيوه مش صحيح ، الأرض دي من
أيام الأقباط والرومان ، قبل مانشوفوا
الأشراف.
_ كلامكم مش صح ، أنا عندي كل
الإثباتات .
_ والناس الغلابه دول حيروحووا فين؟
_ اللي بعمله لمصلحتهم.
_ لمصلحتهم إزاي ؟
أرمنيوس
_ كلام الشيخ آدم صح ، لمصلحة مين تدي أرضنا لأغراب
هارون
_ كل اللي بيزرع في الأرض قاعد فيها.
الشيخ آدم
_ يعني حيسيبوها أرض زراعيه ، ومش
حيينوا فيها قصور ، وقلاع وبساتين.
هارون
_ لا مش حيينوا حاجه من دي.
الشيخ آدم
_ وكيف نضمن ماتقول ؟
_ كلام رجاله.
الشيخ آدم يضحك ساخراً
_ لا بصحيح رجاله وخير من يحافظ
على العهد ، أنتوا مفيش حاجه وعدتونا بيها ونفذتوها.

جعفر

_ أنا اللي عملته للبلد ماحدش عمله.

أرمنيوس

_ وأيه اللي أنت عملته للبلد .

_ عملتلكم بير تشربوا منها ، بعد ماكنتم

تدوخوا السبع دوخات على طلّمبه، عملتلكم

كوبري على التّرعّه بعد ماكنتموا

تمشوا بعيد لحد الماسورة تعدوا

عليها وعيالكم تقع في التّرعّة.

_ مسمى الفلقة دي كوبري.

_ الفلقة دي بتعدينا كلنا .

الشيخ آدم

_ يافرحتنا بالبير والفلقة ، امال لو

دخلت طلّمبه في كل بيت حتعمل أيّه.

دا أنت قولنا لك نور الدروب بالكلوبات

إستخسرت تحط كام كلوب في الدرب.

هارون

_ كل ده حنعملوه ياشيخ آدم لما ناخذ

إعانة الأرض ، حنعمل كتاتيب وندخلوا

طلّمبات ونعلقوا كلوبات في الشوارع.

_ ونعمة الأعمال يا حرامي المعيز

حتى كذبك عبيط شبّهك ، فكرتك حتقول

نعملوا جسر، تهتموا بالحرف الصغيرة

وتكبروها.

بدأ توافد الكثير من أهل البلدة ، منهم من أحاط بالشيخ آدم ومنهم من وقف في جانب يراقب الموقف ، بدأ التوتر يظهر على جعفر وهارون هارون يحاول أن يخرج من الموقف بحيلة ومكر ودهاء.

هارون

_ كل حاحه عاوزينها أهل البلد ، حنعملها ليهم وحشوفوا بلد تانيه خالص ، حتبقي زي إخميم وساقلته.

الشيخ آدم

_ أنا ما برتحش لكلامكم لله في الله ، نفسي أصدقهم ، لكن الفيران بتتنطط في عبي.

الشيخ آدم يقف مدافعاً عن مستقبل أهل البلد، يحاول أن يحلم معهم ولكن الأشباح تفسر لهم الحلم بكوايبس لا تنقطع، يجتهد في الوقوف على أبواب الأحلام الموصدة بالحديد وقطع النار.

يصل اللزي

اللزي لهارون

_ أيه اللمه دي؟

هارون

_ الشيخ آدم والمقدس مش مصدقين

إننا بنبيع الحيازة لمصلحة البلد.

اللزي بغضب

_ يصدقوا ولا مايصدقوش ، تاعبين

روحكم ليه معاهم ، دول ماينفعش

معاهم غير عصايه ، اتربوا على

طبله تلمهم وعصايا تفرقهم.

اللزي يعُض علكف يده بغيط ويرفع عصاه مهدداً.

_ قولتوا أيه ؟ موافقين على البيع ولا لا.

أهل البلدة منهم من وافق على كلام اللزي خوفاً منه ومنهم من وافق
نفاقاً وبحثاً عن مصلحه خاصة ، فلربما يرضى عنه جعفر واللزي
فينوبه من الحب جانب ، وغالبية أهل البلدة إنصرفوا في صمت
بلا أمل في حالة يأس وإحباط ولم يتبقى سوى الشيخ آدم ومعه المقدس
أرميوس ، بعدما رحل أهل البلدة من حول الشيخ آدم ، نظر له اللزي
ساخراً.

_ فيه حاجه ياشيخ آدم ثاني ، عاوز
تقولها .

الشيخ آدم

_ لا مفيش يالزي ، عليه العوض ومنه
العوض، ماهو لوفيه جنبينا واحد
زي حسن ماكنتش حتتنفخ علينا كده
يلتفت للمقدس

_ بينا يامقدس نمشي قبل التعابين
ماتاكلنا .

كلمات الشيخ آدم عن حسن غيرت وجع اللزي وكسرتة وإضطر
يكتم غيظه من الشيخ آدم ، فهو ضرير وإن تعدى عليه سوف
يقلل من شأنه أمام الناس وهم دائماً يتركوا لسانه حراً من أجل
عماه ، أحياناً يكون العمى نعمة تحفظ الكرامة.

.....

غرفة ليله

السماء، هي العالقة على كف القدر، معها ينام المنام، ترثي لحالها
الأحلام، كلام اللزي هزها ، وضعها في حالة حيرة وتوتر، هو يُجبرها
على الزواج ولم يترك لها فرصة لنقاش أو إختيار.

_ والعمل يابنت ياليله ، الريح شديدة

وعفية ، الموت أهون عليه من أنه

يلمس شعره مني

تبكي بحرقة

_ أعمل أيه ياربي؟

.....

عندما يستعصي السؤال ، تكون الدموع جواب، ولكن دموع القلب
تحتاج لألف جواب وجواب، فحديث الدمع قاتل وتسقط أمامه كل
لغات العالم ، حسن وحمدان ومرسال أسفل الجبل.

_تفتكر ياحمدان ضربتنا للزي هزته؟

_أيوه هزته وكسرتة جامد، لكن اللزي

مش ساهل ، إحنا تعبناه في الأول

وماقدرش يطولنا،ودلوقت كسرناه

قدام عنيه مش من وراه.

_علشان كده أنا بدأت أقلق على

_ وأنا خايف عليها كمان ، اللزي

حيلطش في كل حته وتتوقع منه

أي حاجه .

مرسال

_ يبقى إحنا مانهمدش علشان
نقدروا نخلصوا على الكلب السعران.
_ معاك حق يامرسال ، يبقى إحنا قدامنا
حاجتين ، تخلص ليله، واللي حيشترى
الأرض، بس كمان فيه حاجه ثانيه.

حمدان

_ أيه هي ياحسن ؟
_ قلبي واكلني على لواحظ، حاسس
إن فيه حاجه حصلت.

مرسال

_ تلاقي أبوها عرف كل حاجه دلوقت.

حمدان

_ صح يامرسال ، اللزي لو ماقلش
لأبوها ، منيره أخته زي الحيه حتقول
على كل حاجه أو يخلوا السلوتي يقول

حسن

_ اللي حيقول اللزي علشان يبرر
كسرتة قدام جعفر، ويرمي عليه
فشله ويقوله بنتك السبب ،وكمان
حيتهموها بأنها بتوصلني كل الأخبار
علشان يقدموها هي ضحيه.

حمدان

_ كده الأمور بتتعدد يا حسن .

_ ربك كريم يا حمدان ، علينا التفكير وعليه التدبير.

في الدرب يسير المقدس ارمنيوس بصحبة الشيخ آدم، حتى يقوم بتوصيله إلى بيته ، بعد زيارتهم الفاشلة لجعفر.

_ شُفت أهل البلد يا مقدس ؟

_ اعذرهم ، الخوف والرعب ماليهم

أنت ما شُفتش شكل اللزي عامل أيه؟

_ تصدق يا مقدس أني بحمد ربنا

أنى أعمى ولا أرى تلك الوجوه

المعفنه، وخاصة هذا الخنزير اللزي.

_ اللزي مكسور من حسن وباين عليه

وهو شايف شماتة أهل البلد في عيونهم

هو بيوريهم أنه ما إنكسرش قدام حسن

وبيحاول يصمد طوله ، لكن هو مكسور

من جواه، حسن قتل خمسة من أهم رجالاته

وخصوصاً كُريم عيلته كبيره ومش ساكتين.

_ بقولك أيه يا مقدس؟

_ قول يا شيخ آدم .

_ أنا عاوز أشوف حسن يا مقدس؟

_ وتشوفه ازاي؟

_ نروحله مكانه اللي قاعد فيه.

_ نروحوا الدرب ؟

_ أيوه ، إن شاء الله نطلع الجبل.

_ بس أنت حتقدر على المشوار ده؟

ـ حقد ر بعون ربنا؁ قابلني بعد صلاة
فجر بكره قدام الجامع ونروخوا مع بعض.
ـ بس دي مخاطره كبيرة.
ـ إن كان حسن عرض نفسه للموت
علشان أهل البلد من غير مايكون ليه
مصلحه وعرض نفسه للإعدام علشان
دافع عنك وعن دارك؁ حنستخسروا
فيه مشوار؁ وبعدين هو إحنا رايعين
في مصلحه ليه؁ إحنا رايعين نزود همه
ربنا يكن في عون الولد ده.
ـ مش عارف أقولك أيه ؟
ـ لو خايف حروح لوحدي بالواد شحاته
ويحصل اللي يحصل.
ـ مش خوف ياشيخ آدم.
ـ يبقى خلاص إتفقنا.
يقتربان من دار الشيخ آدم.
ـ ادينا وصلنا بيتك.
ـ ماتتفضل معنا عزيزه عامله شلولو (هو ملوخية ناشفه على ماء بارد بقليل من الثوم مع
عصير ليمون)
المقدس يضحك
ـ شكرا؁ أشوفك بعد بكره الفجر؁ سلام.
السلوتي؁ شخصية بسيطة تحتاج معاملة خاصة؁ معاملة أطفال
ليس ذنبه؁ خلقتة بعيب خلقي جسدي وعيب خلقي عقلي؁ يصرخ
يستغيث كالأطفال كما تستغيث الزهور الجميلة بين أنقاض الأشواك
يصرخ ينادي؁ يبكي؁ لم يرحموا ظروفه الخاصة وربطوه في حوش
البهائم في مرتبط البهائم؁ يقترب من بقرة في الحوش.

_أنت بقره حلوه ، حبي سلوتي ، مش كده

السلوتي جعان ، اديني شوية لبن .

البقرة تنظر إليه وكأنها ترثي لحاله ، تشعر به ، تتمنى أن تتكلم
تحدثه أنها تتمنى لو كانت لو ولدت الآن في تلك اللحظة لتُشبع
هذا الطفل الكبير، حاول سلوتي أن يحلبها وتركت له نفسها هو
لا يعلم أن البقرة تحلب اللبن بعد ولادتها، يصرخ ، ينادي ، يبكي
ولكن هل من مجيب، يطرق باب الحوش.

_ جعان ، سلوتي جعان .

.....

ليله تجلس في حجرتها، تحلق بحزنها في فضاء بعيد، تتمنى أن

تتحرر من خوفها ، من سجنها، أحلامها تنتهي قبل أن تبدأ

تسمع صوت السلوتي .

_ جعان ، سلوتي جعان .

تحدث نفسها

_ حتى أنت ياسلوتي لم يرحموك.

تنظر ليله لقطع من الخبز على الدكة ، راحت تجمعها، خرجت بها

قاصدة السلوتي، تخرج من حجرتها حامله كسر الخُبز في يدها

تقطع منيره عليها الطريق.

_ رايحه فين يابنت الحمداني؟

_ حدخل للسلوتي أوديله كسر العيش دي.

_وأنت مالك وماله ، وتوديله ليه؟

_الواد بيصرخ من الجوع ، حرام عليكم

تبهدلوه كده ، ده عقله على كده وانتوا عارفين .

_صعبان عليك علشان كان بيساعد حسن وأخوي.

_ أنا صعبان عليه جوعه بس.

_مالكيش دعوة.

صوت السلوتي

_ جعان ، سلوتي جعان ، عاوز لقمه.

.....

السلوتي رجل بسيط ، يحمل عقل وقلب طفل ، هو يحاول أن يعيش
لا يحمل همّاً لغد ، ليس له دار وكل الأرض تحتضنه وتعطف عليه
ترق لحاله السماء فتمطر عليه رزقها ، لكن هؤلاء لا يرحمون ضعفه
وقلة حيلته ، لا زال يصرخ من الجوع
تدخل منيره الحوش .

_ فيه أيه ياواد ؟

_ جعان ، سلوتي جعان، عاوز لقمه.

_ حندهلك اللزي يجيبلك لقمه .

_ لا مش عاوز وكل ، أنا شبعان

سلوتي مش جعان.

منيره مهددة

_ لو سمعت صوتك تاني حندهلك اللزي.

_ لا بلاش اللزي، حسكت خالص .

٥ _ قلوب تقلت عن هويتها:

هي قلوب متمردة ، عصت السماء، هي قلوب أنيسة للشياطين
تعشق الدم وتحسبه طهاره ، أهل البلدة هم قرابين يختارون منها ماشاءوا كذبيحة
لآلهتهم ، هي قلوب مغلفة، صماء يعشقون الحكم والسلطة والمال ، يجلس جعفر في مضيافته
بصحبة هارون والليزي، الثلاثة في حالة صمت ، لواحظ سببت له جرحاً لا يندمل ولا يجد له
حلاً.

هارون

_حتفضل ساكت على طول ياجناب البيه؟

_حقول أيه ياهارون ، تعبان وقرفان.

_ أنت لسه واحد على خاطرك من الست لواحظ؟

_ ماحدش يجيب سيرتها قدامي ؟

الليزي

_ الست لواحظ مخها صغير وإنضحك عليها.

_ قلت ماحدش يجيب سيرتها.

هارون محاولاً إخراج جعفر من حالته .

سمعت الي حصل مع ابن شملول؟

_أيه الي حصل؟

_ يقولوا كان بيتعلم في كتاب بالجلويه

والشيخ لما بيخلص تعليمهم بيخلي

كل واحد يقرأ قرآن شويه، قال لابن شملول

اقرا ، قال له حقرا أيه ، قال له إقرأ الفاتحه

قال له مبلاش الفاتحه ياشيخ، قله إقرالي

الفاتحه ولا اقوم أعبطك،شملول قال

الفاتحه على روح مولانا الشيخ وراح

نازل عليه بعصايته محطش منطق.

جعفر بيتسم.

الليزي

_ وبعدين حصل أياه؟

هارون ضاحكاً

_ هو أنت لسه مافهمتش؟

_ لا

يلتفت هارون لجعفر

_ طيب أعمله ايه ده علشان يفهم؟

جعفر يضحك وفجأة يتذكر حسن.

_ الواد حسن من وقت ماجه وضرب

كريم وأنا مش مرتاحله.

الليزي

_ ولا أنا مرتاحله ، ده طير النوم

من عيني ،أنا حولع في الجبل

علشان أشفي غليلي منه .

_ أخلص بس من بيع الأرض وفيه كلام

كبير حيحصل وأنا خلص عليه بإيدي.

يقطع حديثهم دخول مهران

_ منازع على الباب ياجناب البيه .

_ خليه يدخل ، جه في وقته

الليزي

ونشوفوا عمل أياه في الجبل وهو

الي ضرب نار ولا حد غيره.

_ رحترك البيت قالولي أنك هنا.

_ هنا وهناك واحد يامنازع، قولي أنت ضربت بارود من يومين في الجبل

_ أيوه، ضربت على الي كانوا بيضربوا عليكم بارود وقتلت منهم واحد، ماأعرفش إن كان حسن

ولا لا ، أنا إتصبت في كتفي.

يعري لهم كتفه أسفل الجلباب

وكمان البارود خلص مني.

هارون

_وبعدين ؟

_ريحت شوية مكاني وقعدت أوقف

الدم الي نازل من كتفي، وبعد نص

الليل ، لمحتهم شايلين واحد وداخلين

ع الجبانه ، عرفت أنني قتلت واحد

كانوا رايعين للجبانه ثلاث أنفار

اتنين شايلين الميت وواحد ماشي

وراهم.

جعفر

_ يعني راحوا دفنوه في الجبانه.

_ أيوه .

_لو كان حسن يامنازع ، يبقى حلال عليك الجنيئة.

اللزي

_ يبقى الفحاحري عارف شكل الي دفنه

حقوم أخلي مهران يجيبه من الجبانه.

يخرج اللزي وأرسل مهران لإحضار حمزه الفحاحري، وعاد سريعاً.

هارون

_ تفتكر يامنازع حسن جاب بارود

من فين.

_ أنا كنت في سوق التلات الي فات
وسمعت ان اتنين راحوا باعوا بهائم
هناك وسألوا عن حد بيع بارود
وولاد الحلال دلوهم على واحد وأنا
يومها زعلت أني مابعتش أنا ليهم
البارود.

هارون

_ يبقى راح باع البهايم الي سرقها
من الجنينه هناك واشترى سلاح
يدخل مهران .

_ حمزه الفحاحري واقف بره.

جعفر

_ دخله مستني أيه؟

يدخل مهران ومعه حمزه الفحاحري رجل قصير القامة أسمر
البشرة ، بدين قليلاً، جعفر يستجوب الفحاحري .

_ من يومين جالك ميت ياحمزه.

حمزه يحاول أن يتذكر ، هو في حالة رعب من وجوده أمامهم
ويخشى شرمهم ، يوهمهم أنه يتذكر.

_ دفنت مين من يومين ياواد يافحاحري

دفنت مين .

فجأة يقول لهم

_ مادفنتش حد.

منازع لديه من المكر الكثير لكسب ثقة جعفر واللزي وهارون
هو استطاع بدهاء أن يبعد عنهم الشك به ، بل عزز ثقتهم به

نظر للفحاحري وقال له .

_ أنت كداب ، من يومين وف نص

الليل جالك تلاته اتنين شايلين

ميت وواحد معاهم .

يبدو أن منازع أعاد الإتران للفحاحري ليتذكر الموقف.

الفحاحري

_ أيوه صح ، من يومين بعد نص

الليل جه حمدان شايل أبوه ومعاه

اتنين أغراب.

جعفر

_ يعني الميت كان الحمداني.

_ أيوه يابيه ، الميت الحمداني ودفنته بيدي.

الذي يلتفت لمنازع

_ يبقى أنت قتلت الحمداني مش حسن.

منازع

_ أنا قلت قتلت منهم واحد ، معرفش

إن كان حسن ولا لا.

_ هارون كويس إنك أخذت بتار

واحد من الخمسه الي قتلوهم .

جعفر إحنا نتعشوا مع بعض كمان علشان.

منازع تلاقيه هفتان من عيشة الجبل .

.....

آهات المحبين

هي تلك الأنثى الرقيقة ، نصف من القمر ونصف من الشمس
لا شئ يقتل الأنثى سوى وأد قلبها وقتل أنوثتها، هي مخلوق
يحتاج معاملة بشكل خاص، تكفيها نظرة حب ،أو نظرة حنان
هي في حالة صعبه ترق لها السماء ويرثي لحالها كل الكون
تجلس لو أخطأ أمام المرأة تحدث نفسها.
_بقيتي قدام أبوك عاشقه، يعني فاجره
زي مايقول ، عملت أيه ياربي، قلبي
وعشق ومش بإيدي اتحكم فيه
يأثرى العيب فيه زي مايقول
أبويه ولاالعيب فيهم ،ولا عشان
حسن مش على هواهم.
تبكي بحرقة ، تتساقط الدموع بعينيه بغزارة .
_ يأمرك يالواحد ، ياوجع قلبك يالواحد
حسن ومش طايله
وأبوك كرهك في عيشتك معاه
ومنين أداوي وجعي .

.....

هم يغتصبون كل شئ ، الطفولة البريئة ، يسطون على أحلام
الشباب ، يمزقون هوية الإنسان ، يجنون ثرواتهم من ظهر
الفقراء ، من يعارضهم إما محبوس أو مقتول ، أو مطارد
من جنتهم التي يتوهمون إنها خلقت ملكاً لهم، يجلس حسن
وحمدان أمام الخيمة .

_ قولي يا حمدان أبو لواحظ لو عرف

ممکن يعمل أیه؟

_ یاقتلها ، ولو شفق علیها حیحبسها.

_ معقوله

_ آیوه یاحسن ، العشق عندنا عیب

والی تعمل کده ، فی نظر الناس

تکون فاجره ، الحکایه مش ساهله.

_ طیب ماسدیری کان بیعشق لیله

ولیله بتعشقه .

_ سدیری ولیله ولاد عم ، لکن

أنت فی نظر أهل البلد غریب

_ یعنی العشق للقرایب تحللوه

وللغریب تمنعوه ، یعنی علی

کلامک کده لواحظ فی نظر الناس

وأبوها فاجره .

_ آیوه یاحسن ، هی فی نظرهم کده

وماتنساش أن أبوها کبیر البلد .

تبعثرت کل الأجاسیس بکل زوایة من جسد حسن، أحاسیس ووجع

بلا مداوی، صرخة مكتومة فی أعماقه، دموع حائرة تخشى السقوط

علی ضفاف عین لاتجد من یواسیها، وجع وأحاسیس إختلطت بها

أیامه، سرح حسن بعيداً بخیاله ، کاتماً دموع تحاول التمرد ، یفکر

فی حال لواحظ.

_ عملتی علشانی کثیر یالواحظ

وضحیتی عشان واحد متعرفیهوش

ولا شفتی خلقتة ، قلبک ، هو قلب ملاک

جه الوقت الي أنا أعمل فيه عشانك
لكن بإيدي أعمل أيه ، أخطفها ولكن
كده أكون كسرتها أكثر ، قدام أبوها والناس
أيه الحل يا حسن ؟ عقلي خلاص حيطير مني
يدخل مرسال فيسحبه حمدان بعيداً ، هو أدرك أن حسن يحتاج أن
يكون بمفرده.

_ تعالى يا مرسال ، خلي حسن قاعد لوحده
_ تعرف يا حمدان ، غلطة حسن الوحيدة
عشقه للواحد.

_ لواحد انقذت حسن أكثر من مره
وضحت بنفسها علشانه ، والعشق
مش بإيديه يا مرسال ، ده غصب عنه
ادعيله ربنا يخفف عنه ، حسن يستاهل
كل خير.

_ حسن أخويا وقلبي بيتقطع عليه
أنا مابكرهش لواحد ، أنا بكره
الي فيه حسن بسببها.

٦_ قلوب من نور:

هي قلوب حاملة لكل المحبة ، العطاء ، شعارها الله محبة، تُلون حياتها
بالبساطة بألوان فاتحة، يُزينهم الترابط، مهما علت الرياح ، هم في صبر وسكينة، أغانيهم
ألحانها عذبة نقية ، لا يفقدون الإنسان بداخلهم
أمام الفرن يشعه تخبز الفطير المشلتت ، تُخرج فطيرة وتضعها
في غلق صغير من القش
_ قدامك كثير ياشعه ؟
_ حطلع آخر فطيره.
_ تلاقي أبوكي جعان ، جاي من بره
على اخره، مبوز وماييكلمش حد
_ يبقى كان مع الشيخ آدم.
_ إشمعنى الشيخ آدم؟
_ وهو أبوكي بيقعد مع حد بره
لا ليه في قعدة دكان ولا قعده
على الجسر.
تُخرج يشعه الفطيرة الأخيرة وتضعها في الغلق .
_ هاتي فطيره أوديهها لأبوكي مع حنة جبنة قديمة

.....

في منتصف الدار يجلس ارمنيوس على الدكة ، مريم تضع طبليه
على حصير وتضع فطيرة على صينية كبيره وطبق به قطعة جبنة قديمة.
_ انزل يابا ، كلك لقمه.
ينظر ارمنيوس على الطبليه .
_ انتوا عملتوا فطير مشلتت ؟

يشعه

_ أيوه يابا ومليان سمنه علشان

تُرم عضمك .

_ عاملين بالزيادة ؟

مريم

_ أيوه ، لكن ليه يابا، حد جاي يتعشى معاك.

_ لا يابنتي ، أنا رايح لحسن الفجر ولو عندك

زياده إعملي حسابهم ولو مفيش إخبز يلهم تاني.

يشعه

_ حتروح لحسن الجبل يابا؟

_ أيوه ، حروح أنا والشيخ آدم.

_ مابلاش يابا ، اللزي مش حيسكت

حسن قاتل من رجالتة خمسه، خليك

وأروح انا .

_ لا يابنتي ، أنا اللي حروح والرب موجود

وماحدث حياخد عمر حد إلا بإذنه.

.....

بلدة مساحة الرؤيا بها تحتاج منظار واسع، طموح يبدأ بأحلام يقظة
ومنام يأتي بكوابيس تدفنها، ليلة بنفحات خريفية ، غاب عنها الربيع
في مضيعة جعفر ، إنتهوا من تناول العشاء ، مهران أزال بقايا الطعام
يلتفت جعفر نحو منازع.

_ أنت لوحدهك يامنازع ، عملت اللي مقدرش

اللزي وهارون والرجاله يعملوه.

منازع أدرك أنه إكتسب ثقتهم بدهاء إلى حد أكبر مما كان يظن
أراد أن يزيد من مكتسباته لديهم والتواضع أمامهم.

_اللزي وهارون والرجاله معذورين
ماكانوش متخيلين إنه حينضرب عليهم
بارود .

يلتفت نحو اللزي

_ صح كلامي يالزي .

اللزي لا ينتبه لحديثهم ، هو يفكر في ليلة وقتل الحمداني ويحدث نفسه

_أدي الحمداني اتقتل ، تقولها يالزي

ولا بلاش ، بلاش أحسن وخليها

على عماها لحد ماأكتب عليها .

هارون ساخراً

_ اللزي مش معانا خالص ، والنبى

تلاقيه بيفكر في ليله ، مش كده يالزي

اللزي يتنبه لهم أخيراً بعد سماعه كلمة ليله.

_ أيه ، مال ليله.

_ أنت مش كنت مشغول بيها دلوقت؟

يتلعثم في الرد

_ لا مافكرتش فيها وبعدين موضوعها

خلاص ، حكى عليها الخميس الي

جاي غصب عنها.

جعفر

_ خلونا في حسن دلوقت ، بلا ليله

بلا نيله.

_ فيه مرسال جاي من عند الشريف معتصم.

هارون

_ خليه يدخل.

جعفر معترضاً

_ مايصحش قوم استقبله أنت والليزي.

يخرج الليزي وهارون ليستقبلا مرسال معتصم ، إستقبلاه وتبادلا

معه التحية ودخلا به القصر حتى حجرة المضيفة .

الليزي

_ اتفضل يا شافعي.

هارون يقوم بالتعارف

_ جناب الملتزم جعفر بيه.

_ بسمع عنه كثير وصيته مالي المديرية

أهلاً يا جناب الملتزم .

جعفر

_ شرفت دارك يا شافعي.

شافعي

_ أنا مش عاوز أطول عليكم ، الشريف

معتصم بيقولك حيجي بعد بكره العصر

جهزله كل ورق الحيازات اللي عندك .

جعفر

_ الشريف معتصم يشرف في أي

وقت وكل ورق الحيازات جاهزه ومحضرينها

شافعي

_ هو عاين الأرض كلها .

_ مفيش حتة أرض في المديرية

الشريف معتصم مايعرفهاش.

شافعي

_ وأنت تبقى مين ؟

هارون

_ ده منازع ، ضيف عندنا.

_ أوعى يكون منازع مطاوع

يحمز وجه منازع وينظر إلى جعفر والليزي وهارون ، هارون توقع

الموقف

_ لا مش منازع مطاوع ، ده منازع الحرداني.

جعفر لشافعي

_ ومين بقى منازع مطاوع.

_ قتال قُتله ولينا عنده تار

قاتل من عندنا اتنين.

منازع يقف مستعداً للخروج محاولاً الهرب من أمام شافعي حتى

لا يشك فيه.

_ أنا اتعوقت ، يادوب ألحق أروح

تقعدوا بالعافيه.

يخرج منازع.

.....

إننا لدينا جميعاً أحلام، منها أحلام مؤودة، ومنها أحلام تترنح في طريق الوصول، علينا أن لا

نيأس ، فملك البدائل، علينا أن نتحرر من خوفنا

نحاول أن نُحلق ، نظير ، حتى لو تكسرت أجنحتنا، حلیمه هي تلك الفتاة

البسيطة ، تعيش يومها ببساطة ، تخشى أن تحلم ، تسير حياتها بخوف

ورهة ، تسير حلیمه في الدرب بأقدام مرتعشة تلتفت يميناً ويساراً

تصل دار أرمنيوس ، تطرق الباب ، تفتح يشعه، تتعجب من حالة الرعب المسيطرة على

حلیمه.

_ مالك يا حليمه ، مش على بعضك؟
_ حتوقفيني على الباب يا يشعه؟
_ لا ، أدخلي يا حليمه .
تدخل يشعه ومعها حليمه، تغلق الباب ، لاتزال حليمه في رعشة وخوف
_مالك يا حليمه ، حالتك ولا اللي ميت
لها حد؟
_ إزيك ياعم أرمنيوس
_ إزيك يا حليمه يابنتي.
تلتفت حليمه نحو يشعه بعد أن ألقى بالتحية لأرمنيوس
_ أنا مش قادرة أجيلك وجايه هربانه
من بيتنا .
أرمنيوس يجلس على الدكة يراقب حالة يشعه.
يشعه
_ فيه أيه يا حليمه ، بيتكم إحرق؟
_ مفيش عندنا حاجه وحشه ، لواحظ يا يشعه
_ مالها لواحظ؟
حليمه تنظر في إتجاه أرمنيوس ، أدركت يشعه أنها تود أن تحدثها
على إنفراد، يشعه تمسك بيد حليمه.
_ تعالي يا حليمه ندخلوا جوه.
تسير يشعه بحليمه للداخل حتى حبرتها ، تدخل الحجره وخلفها حليمه
مريم في الحجره.
مريم
_ إزيك يا حليمه .
_ بخير يا مريم إزيك أنت .

يشعه

_ سيبك من السلامة دلوقت ، مال لواظ

فيها أيه ؟

_ أبوها عرف الي بينها ماين حسن.

_ وأبوها عرف منين ؟

_ من اللزي واخته منيره ، مسكوا السلوتي.

_ أنا قلت لحسن بلاش السلوتي.

مريم

_ ماخلاص ياشعه الي حصل حصل

المهم ياحليمه أبوها عرف أيه؟

_حسن كان باعت جواب على منديل

كتب عليه بدمه وبعثه مع السلوتي

وهي كمان كتبت على منديل وبعثته لحسن

مريم

_ حسن كاتب على منديل

يشعه

_ امال حيكتب على أيه يامريم ، ياحزنك يالواظ

وبعدين حصل أيه ؟

_ اللزي ومنيرة لزقوا في لواظ كل المصايب

وقالوا إنها بتنقل كل أخبارهم لحسن

وهي السبب في أنهم مش قادرين

يمسكوه ، وانها قالت لحسن على البارود

وخلت حسن يشتري بارود.

_ ومنيره تلاقىها ماصدقت.

_ ماهي منيره الي كشفت كل حاجه.

مریم

_ أنا ظلمت لواحظ ، باين عليها جدعه.

يشعه

_ لواحظ بتعشق حسن وبتموت فيه

وضحت علشانه كتير، وتعمل أي حاجة

علشان حسن.

حليمه

_ سيونا من الكلام ده دلوقت، حنعمل ايه؟

لواحظ أبوها ضربها وحبسها ومنعوني

أدخل لها وخلوا أمي تروح مكاني.

_ وحنعمل ايه أحنا.

_ يعني أيه حنعمل أيه، جبتك يا عبد المعين

تعني ، لقيتك يا عبدالمعين عاوز تنعان.

يشعه

_ إحنا اللي نقدر نعمله ، نقول لحسن.

حسن لازم يعرف كل حاجة.

مریم

_ أيوه ده اللي نقدر عليه .

حليمه

_ ومين حيقول لحسن؟

يشعه

_ سيبي ده عليه .

_ ماشي ، حقوق أنا أروح

تقوم يشعه بتوصيل حليمه للخارج وتودعها وتراقبها حتى تغيب عنها

.....

بدأ الليل على حقيقته وأسدل الظلام جدائله، حفيف لأرواح غير مرئية
فوق مقصلة القدر ، تحت ليل يتسربله الظلام، قبل منتصف الليل منازل
واللزي على حافة التربة .

منازع

_ شافعي مشي ولا قاعد.

_ أيوه مشي، أنا إتخضيت لما قال

منازع مطاوع .

_ ليهم تار عندي، قاتل منهم اتنين.

_ يخرب بيت فقرك يامنزع، ماتقلقش

حيجوا يشتروا الأرض وكل واحد

حيروح لحاله، انت ريحتني شويه

بقتل الحمداني .

_ وبكره حريحك أكثر لما أقتل حسن.

_ ياريت.

_ أنت صحيح حتكتب على البت دي

الي إسمها ليله.

_ أيوه ، يوم الخميس الي جاي

وتعالى أنت أشهد على الجوازه.

_ أنا سمعت أنها مش موافقة.

_ وافقت ولا لا ، حجوزها بالعافيه.

.....

هناك أفكار تنادي بعضها البعض لترسم حلماً، وأفكار تتلاقى
لترسم شبحاً، وتلد كابوساً، الحلم يتجسد في أمل، والكوابيس
أشباح تنطلق في الصحو والمنام بلا رابط، في منحى العقل تتوه
الكلمات ويغيب الضمير في تلك العقول العاشقة للضلال .

في مضيقة جعفر، جعفر وبصحبه هارون .

_ أنت حالك مش عاجبني يا جناب البيه

لو مت ، أو طبيت ساكت ، محدش

حينفعك.

_ أنا لحد دلوقت مش مصدق اللي عملته لواحظ.

_ مسيره يقع في إيدينا ونخلص منه.

_ ده مايموتش بطلقة باروده، ده أجيبه

وأقطع جسمه حته حته بسناني ، أغسل

عاري بدمه، وأفرق لحمه ع الكلاب.

_ ماتتجوز يابيه ، وبالمه تجيبلك

عيل يشيل إسمك، أنت لسه صغير.

_ عيل ..آه ياهارون ، أنا نفسي من

زمان في عيل ، واهنيته من زمان

وامها خلفتها في البطن السابعة

ست عيال قبلها ماتوا ولدين

وأربع بنات .

_ كل شئ نصيب يابيه.

_ أيوه كل شئ نصيب، أهى ماتت

وسابتلي النكد.

ناصح زي أبوه .

.....

تحاول لواحظ أن تستيقظ من هذا السبات العميق، صرخة خرساء مكتومة، لا تعرف ،
كيف تنطلق، صرخة مجهولة وكأنها بلا وطن
مخالب قوية تنزع لوحاتها الجميلة، تمزق كل النسيج الذي غزلته
بمشاعرها، نبضاتها تتسارع، جبينها يعرق، يشعر بالخوف، تحاول
أن تلملم أنفاسها المبعثرة ، تتجه لواحظ نحو شرفة الحجرة
تنظر للفضاء البعيد، تبحث عن حلم يتخبط .
_ أنت فين يا حسن ، ياترى بتفكر فيه
زي مابفكر فيك، ولا الجبل عني لاهيك
أيه اللي مستخبي ليه وليك .

.....

هو يحاول أن يستيقظ ، يمزق كل الكوابيس، عيناه منسدلة ستائرهما
يبحث عن المضمون ، هل يبقى كما هو ، أم يخاطر حد الجنون
كل شئ أمامه يسمح بالمخاطرة ولا هرب منها، لن يسمح بإغتصاب
حلمه، حسن يجلس بمفرده على نفس الحجر عندما يحب أن يخلو
بنفسه ، حتى أن حمدان ومرسال أسموه حجر لواحظ، هو يسمع
همساتها، دبيب نبضاتها، ترغرغت عيناه بالدموع، يحدثها وكأنه
يراهها.

_المستخبي ليه وليك في علم الغيب يالواحظ
ياترى الأيام اللي عذبتني بشقاها ، حتقدر
يوم تجمعني معاها، ولا للقدر مكتوب تاني
واخدني في سكه ، مجهول منتهاها.

.....

أرمنيوس جالس على الدكة وعلى الدكة المقابلة تجلس يشعه واختها مريم .

ارمنيوس

_ أنا خايف أقول لحسن اللي قولتيه

عن لواحظ، يتهور وينزل علشان

يشوفها ويحصله حاجه.

يشعه

_ ما إحنا مانقدرش نخبي عن حسن

يا با ، لواحظ وقفت كتير جنب حسن

وحسن مش حيسامحنا لو عرف إننا

كنا نعرف وماقلناش ليه.

_ أنا محتار يابنتي.

مريم

_يشعه معاها حق يا با ، حسن لازم يعرف وماتخفش عليه ، حسن

عاقل وبيحسب كل خطوه يخطيها.

.....

منازع يتحسس طريقه في حضن الظلام ، لا يخشى الليل فطالما إحتضنه

كثيراً ولا يخشى صوت الذئب هو تعود أن يستأنس بها ، هو يشعر أنه عاد للحياة، يشعر
بأن له هدف، خرج من سجن الشر الذي كان يتخبط

فيه بلا أمل وبلا هدف، روح الإنسان كانت لديه بلا ثمن ، لم يشعر

بقيمة الروح إلا حينما وقعت روحه تحت يد حسن ، عاد له الإنسان

شكل سيف من الرمال ، يتجاوز السيف والهضبة، يصل بداية الدرب

الممر الذي يفصل بين الجبلين ، إقترب من الخيمة ، لم يجد أحدا

في الحراسة، يعوي مثل الذئب بصوت عالي.

.....

داخل الخيم يجلس حسن ومرسال وحمدان ، لم يناموا ، هم في إنتظار
منازع .

حسن

_ ده ديب وكمان قُريب مننا .

حمدان

_ شكله قدام مدخل الخيمه وممكن يدخل علينا.

مرسال

_ تفتكر ممكن يدخل علينا.

حمدان

_ ويهاجمنا كمان.

حسن يمسك ببندقيته، يجعلها في وضع الإستعداد ، ويخرج على أطراف
أقدامه وخلفه حمدان .

مرسال

_ أنتوا حتسيبوني لوحدي.

يجري خلفهم مرسال .

.....

منازع يتوارى خلف الخيمة ويستمر في عواء الذئب ، حسن يتحسس
الطريق نحو مصدر الصوت شاهراً ببندقيته وخلفه حمدان ومرسال ، يصوب فجأة عندما
يرى منازع وهو لا يتبينه.

منازع

_ حاسب حتقتلني يا حسن.

حسن

_مين ! منازع !

منازع

_ مش عيب يا وحش، تسيبوا الخيمه
من بره من غير غفير.

حسن

_ معاك حق يا منازع ، لو هجم حد علينا
كان صادنا بالساهل، المهم حمدالله
بسلامة وحش الجبل.

حمدان

_ أيه الأخبار يا منازع؟
_ أنا هلكان من التعب ، ندخلوا جوه
وأريح وأحكيلكم، بس واحد يحرس
الخيمه من بره.

حسن لمرسال

_ أنت خليك بره يا مرسال ، وحنبدلوا
مع بعض.

_ ولو جاني ديب أعمل أيه؟

حمدان يضحك

_ انده علينا وحنيجي نرحب بيه.

حسن

_ تعالى يا منازع

يضع يده على كتف منازع ويدخل به لداخل الخيمة وخلفهم حمدان
يجلس ثلاثتهم ويلتقط منازع أنفاسه ، محدثاً حسن .

_ إسمع ياسيدي ، الشريف معتصم حاجي

بعد بكره علشان يشتري الأرض.

_ كويس قوي ، وعرفت معاد وصوله البلد.

_ أيوه عرفت، حبيجي العصر .

_ وعرفت ده كله إزاي يامنزع ؟

والله عفارم عليك.

_ كنت قاعد معاهم عند جعفر وقت

ماجه مرسال معتصم.

حمدان

_ عملت أيه معاهم ، صدقوا الحكايه.

_ خَالَتْ عليهم كلهم وفرحوا أني

أنا اللي قتلت أبوك، فيه حاجه مهمه

اللي هيكتب على ليله الخميس اللي

جاي .

حمدان

_ هيكتب على اختي الخميس اللي جاي.

_ أيوه وبالعافيه بدون رضاها.

يقف حمدان متسرعا وممسكاً ببندقيته .

_ أنا حنزل أشرب من دمه ، ياقتلته ياقتلني.

حسن يمسك بأطراف جلباب حمدان

_ اهدا واقعد ياحمدان ، بعد مانخلص

موضوع معتصم ، حنشوفوا حل نخلص

بيه ليله قبل مايتجوزها اللي.

٧_ أمل يحتضر:

أشباح الهم والحزن اللعينة تُطاردها في صحوها وسُباتها، تحاول أن ترفع رأسها ، تنظر حولها ، لاشئ سوى تلك الجدران ، ضاقت بها
حجرتها، تشعر أنها باتت بلا ملامح، الجدران شاحبة الألوان والأثاث
خيالات ظل لأشباح غير مرئية ، لوحظ في غرفتها ومعها مصايب أم
حليمه ، جعفر استبدل حليمه بأمها .

_ عاوزه حاجه ثاني ياست لوحظ

أنا حمشي أحسن اتعوقت قوي.

_ روعي أنت ياخاله ، وسلميلي

على حليمه.

_ أجيبك لقمه تاكليها قبل ما امشي؟

_ ماليش نفس ياخاله.

يدخل جعفر الغرفة ولوحظ تحاول أن تتماسك ، تمسح دموع
أقسمت أن لا تجف على خديها،نبضها صامت لا يتدفق، لحظة
مقدسة للصمت .

مصايب

_ جيت في وقتك يابيه، أحسن الست لوحظ

من صبحية ربنا ، ماحطتش الزاد في بُقها

ومفلوقه من العياط.

_ عنها ماطفحت .

_ ليه بس كده يابيه، هو فيه أيه؟

_ حطي لسانك في بقك واسكتي ياويليه.

_ حطيت لساني يابيه، أنا حروح واجي

الصبح ، عاوز حاجه من ست الحسن

_ ست الحسن مين ياويليه؟

_ أنا ست الحسن يابيه.

_ لما أنت ست الحسن ، مين مصايب؟

_ أنا بعت البقره واشتريت إسم جديد

بس مفيش حد بينادينى بيه.

جعفر بغضب

_ إنجري إمشي والله أبوك ماغلط

لما سماك مصايب، روجي جاك

مصيبه ، ولا حتجيك من فين

أنت المصايب كلها.

تخرج مصايب مسرعه من الغرفه .

جعفر ينظر إلى لواحق في غيظ، وهي تصرخ في أعماقها ولا يسمعها أحد، هي في صمت عميق ونبض على و شك الإنهيار،

_ ياريتك كنت مُتي ولا جيتي الدنيا.

هي تنظر له، تُتمتم بصوت منبوح بأوتار تالفة، تحاول أن تتكلم، بلا صراخ ، بلا نبض ، بلا حياة.

_ جيت لقدرى يابا.

يقترّب جعفر منها ، وهي تتحسس أنفاسها التي أُغْثِلت على مشارف الحلم .

_ والله كرهت حتى أبص في خلقتك .

_ لو كان موتى يريحك يابا ، أخلص

منى ومن عارى زي مابتقول.

_ ماتستعجليش على رزقك ، لما

ينظر لها بإحتقار وإستهجان، يتمنى لو أطبق على رقبتها بيديه

ويخنقها ويرتاح منها ، جز جعفر على أسنانه وكتم غضبه وتركها

وخرج ، ولواحق تستلقي على فراشها في بكاء،هي تعيش الموت

بلا موت، تحتضر بلا نهاية.

٨ _ الذئب ينتفض..:

هو يحلم ويحلم وأحلامه لا تتوقف ،هي إلى لانهائية، عنيد ، إما يحقق مايشاء أو يغادر ، ليس لديه حلول وسطية، هو يتشكل حسب الحدث تارة بطيبة وبساطة وتواضع وتارة أخرى يرتدي جلد الذئب ولا يخشى أحد، هو الباكي في أعماقه، الضاحك في ظاهره، هو تعلم أن يمضي قُدماً في طريق الحق بثبات، حسن ومنازع وصياد يجلسون داخل الخيمة يتشاورون .

حسن

_ تفكر معتصم حيحي من أنهي طريق يامنازع؟

_ معتصم من الكتكاته وقدامه طريق واحد

ياخذ طريق ترعة السلاموني ، بعدها يدخل

يمين في طريق ضيق طويل ، يصل حتى فلقة

الحمدية ، البلد الي بعدينا على طول.

حمدان

_ صح كده ، وبعدها ياخذ الجسر بين

الترعه الكبيرة والزراعة حتى يصل

إلى فلقتنا (هي كوبري محدود، مصنوع من جذوع النخل.

_ بس أكيد اللزي وهارون ، حيستقبلوه

من بره البلد؟

_لو طلعا يقابلوه ، مفيش غير مكانين

أنهم يقابلوه عند فلقة الحمديه ، او عند

الماسورة الي قدام نخلات مُصبح.

_ وليه فكرت في الطريقين دول يامنازع

_ علشان أبعد مكانين لحدود البلد،يعني

مش حيفكروا غير زي مابقولك.

_ الله ينور عليك يامنازع، ريحتني.

حسن يسرح بخياله بعيداً، يفكر بعمق، يحاول أن يصوغ خطة مناسبة، حسب المعلومات التي تلقاها من منازع، منازع يقطع حبل تفكيره .

_أنت بتفكر تقابل معتصم وتقطع عليه
الطريق في مكانين ،طريق ترعة
السلاموني أو الطريق الضيق الي
بيوصل للحمديه.

_ أنت قرئت الي في راسي يامنزع.
حمدان

_ واحنا نطلع الجبل ومشي فوقيه
حتى الحمديه، وبعدين ننزلوا
من هناك ، كده ماحدش حيعرف
يشوفنا خالص.

منازع

_ صح كده ياحمدان، ولكن حنشىل بارود
معانا.

حسن

_ لا مش حناخد بارود، صوت البارود
حيكشفنا ، ومش حنحتاجه.

منازع

_ كده أنت باين عليك حطيت خطه؟
_ حكلمكم فيها في وقتها يامنزع.

حمدان يبتسم

_ هو ده حسن يامنزع ودي عوايده

مايقولش على الي في دماغه
مره واحده ، حقوم أريح مرسل شويه
تلاقيه بيكلم نفسه.

خارج الخيمة يجلس مرسال ، يعيش بين ذكريات ماضي قاسي
وحاضر عنيف، ومستقبل مجهول يترنح على كف القدر، يقف
على مقبرة الذكريات ينثرُ الدموع فوقها، تحيا مع جراح وتتجدد
المواجه، ينظر إلى السماء ، يبعثر أمنياته.

_ امتى ياربي نرتاح بقى من الجبل

وصوت الديابه .ووحشة الليل

امتى ياربي الواحد ينام مرتاح

البال ، زهقت من الجبل وكرهت إسمه.

هو يحاول أن يطرق باب الغد، يبحث عن الأمل، يحلم بتربة يدفن
بها أحزانه، عن غد يُلملم أشلاء مبعثرة في الصحراء.

يقطع تفكير مرسال دخول حمدان.

مرسال

_ لسه فاكرنى دلوقت ؟

_ قوم أدخل ياغلباوي ، منا جيتلك أهو.

_ ماشي ياحمدان ياابن أم حمدان

يارب يجيك ديب يكون جعان ياكلك.

حمدان يضحك ويدخل مرسال داخل الخيمة.

٩_نوافذ مجهولة:

لا شئ أروع من إشراقة فجر الصباح ،خلق الله ليكون محطة تغيير
للنفس البشرية، محطة تنتهي عندها المواجه ويرحل معها اليأس
صباح مشرق بأغاني العصافير ورائحة النسيم،وسحر الفضاء
الشيخ آدم يسير بصحبة أرمنيوس ، يبحثان عن حل لفتح تلك النوافذ
المغلقة ، يحملون معهم المحاولة بلا حساب لنتائج، يحملان على كاهلهما وجع كبير لأهل
بلدة تتخبط بهم السفينة وسط أمواج عاتية
يصرخون بصوت مكتوب ، يبحثون عن خيط من الضوء، يسيران
مكبلان بقيود من الأحزان، يسير ارمنيوس بخطوات سريعه على
الجسر .

_ بالراحه يامقدس أنا مش حمل مشيك

وراعي أني ضرير.

_ أنا ماشي بالراحه .

_ بالراحه إزاي ، أنت بتجر فيه زي الشوال.

أحنا وصلنا لحد فين .

_ إحنا لسه على الجسر.

_ جسر أيه يامقدس ، إحنا رايعين

الجبل ولا الغيط.

_أنت عاوزنا نروح الجبل من عندنا

وحد يكشفنا ويمشي ورانا.

_ علشان كده أنت إخترت الجسر

علشان ماحدش يشك.

_ أيوه وكأننا رايعين سوق الجمعة.

_ عفارم عليك يامقدس، طمنتني

_ حندخلوا الجبل من عند الحمديه

ونرجع ثاني على الدرب بس

من الجبل.

_ وطبعاً في العوده نفس الحال.

_ أيوه.

_ كده الواحد يتكل على الله

ويتشاهد .

ارمنيوس يضحك

_ مش دي شورتك.

_ أيوه شوره مهببه، أنا اللي جبته

لنفسي، ولكن حتحمل عشان

ضميري يرتاح وأكون ماقصرتش.

.....

لاينام، تجمعت حوله كل الهموم، يحمل أحلام البسطاء، هو لايحب

أن يقف تائهاً، ومهما علت أحزانه، لا يحترق بها، ليس من هواة

الوقوف عند مفترق الطرق، يقاوم أحزانه، لا يقبل أن تساومه همومه

كلما زاد الإلم، يدوايه بقليل من الأمل، حسن ومنازع أمام مدخل الخيمة

هرب منهما النوم،

حسن يتقلب على جمر من النار.

_ لسه مش عاوز تنام يا حسن؟

_ مش جايلي نوم يامنازع، أنت

كمان رغم تعبك في نزولك

وطلوعك البلد مش بتنام.

_ طار مني النوم يا حسن

بتفكر في معتصم، صح

هو الي شاغلک؟

_ بفكر في هموم كتيره يامنزع

معتصم ولواظ وليله وأهل البلد

الغلايه .

_ كله معاك فيه ، ماعدا موضوع

لواظ ، مش مريحني.

_ مش مريحك إزاي ؟

_ أقول وماتزعلش من كلامي.

_ قول يامنزع .

_ النسوان دول مامنهمش رجا

والراجل الي يمشي وراهم

مايكسبش.

حسن يبتسم

_ ليه يامنزع؟ ماقابلتش واحده عجبته.

_ ولا بطيق ريحتهم ، بحمد ربنا

أن أمي ماتت بعد ماولدتني.

حسن يضحك بشده

_ شُفت أنا قدرت أضحكك.

.....

ارمانيوس والشيخ آدم يسيّران مِحاذة الجبل من أسفله، صوت الذئب
يعلو ، عيناه تقف على ذئب أمامهم ، توقف نظر الذئب عليهم، أمسك
بشدة بالشيخ آدم .

_ فيه أيه يامقدس؟

ارمانيوس يشير له بالسكوت

_ هس ، هس.

_فيه أيه ياراجل قلقتني؟

_ فيه ديب قدامنا واقف متربص

بيننا ياشيخ آدم.

_ ديب ، بتتكلم جد يامقدس.

_ودي فيها هزار.

ينتاب الرعب الشيخ آدم، يهمس لأرمانيوس وهو في شدة الخوف

_أنت بتقول فين يامقدس؟

_ قدامنا على طول .

الشيخ آدم يتعلق بملابس ارمانيوس بشدة.

_ بتعمل أيه ياشيخ آدم ؟

الشيخ آدم ساخراً

_ بعمل أيه ، بتعلق بيك ،إفرض هجم علينا

تجري أنت وتسلمني ليه؟

_ طيب خف على هدومي شويه.

الشيخ آدم

_ قولي بالراحه كده ، هو ببصلي

ولا ببصلك أنت.

_ وأنا اش عرفني، عنيه مبخلقه فينا

ومنوره.

– تعالي نمشي بالراحه.

– نمشي أيه ، مش حنتعتع من هنا

إلا لما يمشي.

فترة قليلة مرت وهما واقفان وارمانيوس يمسك الشيخ آدم بيد ويرفع عصاه باليد الأخرى ، الذئب إنسحب بعيداً بعد أن أماتهم رعباً.

– أيه الأخبار؟ طمني.

– خلاص مشي ؟

– طيب

يسقط الشيخ آدم على الأرض وارمانيوس يحاول إفاقة .

– فوق ياشيخ آدم ، إحنا في جبل.

الشيخ آدم يبدأ التنفس والحركة.

– فيه أيه ياعزيزة ؟

– عزيزه مين ياسيدي، فوق الله يخليك

قوم قبل مايرجع الديب تاني.

ينهض الشيخ آدم مسرعاً بعد جملة أرمنيوس الأخيرة، خوفاً من

عودة الذئب.

– هو مشي؟

– أيوه ياسيدي.

يواصلان السير بمحاذاة الجبل.

.....

أمام الخيمه حسن يتسامر مع منازع ، يحاول أن يخفف من الضغط الواقع على كاهله،
أصابه الملل من ممارسة طقوس الألم ، يحاول أن يبتعد عن

عين الحياة التي ترمقه ولا تتوقف نظراتها نحوه،منازع هو الآخر

يحاول أن يتنكر من الملل والإحباط .

_ ولية بتكره النسوان كده يامنازع ؟

_ ماشفتش منهم خير ، وزى ماقولتلك

أمي ماتت وأنا صغير وأبويه إتجوز

وجاب لي مرات أب ، سقتني الحنضل

وأنا عيل ،لطشت بيا الدنيا ، إتجوزت

واحد حليه عشان ألقى دار تلمني

خانتني وقتلتها وكنت أول مرة أقتل

_ من حقا تكره النسوان وتتعتقد منهم

يامنازع.

_ وآخر حالة قتل ليه كانت واحد

دخلت بيت بعد مانقبتة وخلص

حسرق البهايم ، سمعت اللي بتقول

المنيل جوزي راح بدري الغيط يسقي

الأرض ويارب مايرجع، يعني حقعد

في حضنك لحد ماتزهق،ماتحملتش

ياحسن ، قتلتها هي وعشيقها.وسبت

البهايم .

_ داانت حكاية يامنازع ، أنا إفتكرت

أن كل قتلك حرام، أديك قتلت بالحلال

يضحك حسن ومنازع.

_ حاول تريحك شويه يامنازع

_ لا أدخل ربح أنت شويه.

_ أنا مابعرفش أنا م في الليل واصل
أدخل أنت.

_ حنقعدوا إحنا الاتنين نعزموا على بعض.

يسمع الإثنان صوت يقترب منهم.

_ أيه لسه ماقربناش.

_ خلاص قربنا ، إحنا في نص الدرب.

منازع يمك ببنديته .

_ فيه حد جاي علينا يا حسن؟

_ ماتضربش بارود، تعالى نتسحب

نشوف مين ؟

يتسلل حسن ومنازع من خلف الأحجار في خفة وهدوء، يختبئان

خلف حجر كبير ، يظهر أمامهم الشيخ آدم وأرمانيوس.

_ وصلنا يامقدس.

_ أيوه ، أنا شايف خيمة حسن.

حسن يخرج من خلف الحجر وخلفه منازع .

منازع

_ مين دول ؟

_ المقدس ارمانيوس والشيخ آدم

تعالى يامنازع، دول تبعنا وجاين

ليه.

حسن يسير نحو الشيخ آدم وارمانيوس وخلفه منازع

حسن يرحب بأرمانيوس ويحتضنه ويسأله عن يشعه ومريم

ثم يرحب بالشيخ آدم ويحتضنه، لاحظ حسن نظرات غريبة

من المقدس لمنازع.

_ ده منازل ياعم أرمنيوس.

_ عارفه كويس.

_ منازل صاحبي ، ماتقلقش ياعمي.

_ هو الي زي ده يتصاحب يابني.

بيقولوا عليه في البلد قتل الحمداني

حسن يستشعر الخجل من كلام ارمنيوس عن منازل

_ لا ياعمي ، أنت متعرفش منازل

كويس،منازل وقف جنبني كتير

وهو الي جابلي البارود الي

وقفت بيه قدام اللزي ورجالته.

ومش هو الي قتل الحمداني

هو فهم اللزي كده علشان يثق

فيه ، الحمداني قتله اللزي

والحكاية كبيره ، إرتاحوا بس

انتوا ، مشوراكم كان كبير.

_ إن كان كده نشيله فوق روسنا

ياحسن .

يصطحب حسن ارمنيوس والشيخ آدم ويسير بهما نحو الخيمة

يدخل الجميع الخيمة ، بينما منازل يقف بعيداً.

_ واقف بعيد ليه يامنازل ، تعالى اقعد معانا

يجلس الشيخ آدم وبجواره أرمنيوس بينما حسن يجلس

أمامهما وبجواره منازل.

أرمنيوس

_ فين مرسال وكمال حمدان علشان نعزي حمدان في أبوه.

_ نايمين ياعمي.

الشيخ آدم

_ الله يرحم الحمداني، كان راجل طيب.

ارمنيوس

_ عليه رحمة الرب.

الشيخ آدم

_إحنا جينالك يا حسن علشان موضوع

مهم، أنت عملت علشان أهل البلد كثير

وكلهم دلوقت بيحبوك ومفيش سيرة غير

سيرتك ، حتى الشباب بيدوروا عليك

عاوزين يبقوا جنبك.

_ قول ياشيخ آدم ، أنا واحد منكم

مااعتبرنيش غريب.

_ هو أنا لو بعترك غريب، كنت

جيت لحد هنا، أنت يا حسن إتحملت

كثير ولسه بتتحمل والي جايين

علشانه موضوع كبير،مايتسكتش

عليه.

_ سامعك كويس يامولانا.

_أنت عارف يا حسن إن أهل البلد

فقراء وغلابه وعلى كديهم، ومايقدروش

يعملوا حاجه ، يمكن خوف، ويمكن جهل

والجهل والخوف وحشين يا حسن، والبصيره

ربنا مابيدهاش لأي حد ، وإحنا عشمنا فيك

كبير.

_ رقبتي سداة ياسيدنا الشيخ.

ارمنيوس

_ أنت لها يا حسن، أنت عارف إن الأرض
هي الرزق الوحيد لأهل البلد ولا ليهم
في صنعه ولا حرفه.

حسن

_ وجعفر حبييع الأرض ويشرد أهل البلد.
الشيخ آدم

_ معقول ، وانت عرفت منين؟

_ عارف كل حاجه يامولانا واطمن
أنا مرتب لكل حاجه.

.....

لوا حظ قلبها يتوجع ، تعاني زفرات مُحرقَة، تعجز عن البوح، يخذلها
الأمل فتتحداه ، هي تتلوى من الوجع ، مثقلة بالهموم، تجرّها الأقدار كما تشاء تتلاعب بها
الأيام، ترمقها الحياة بعين قاسية ، هي مصممة على إلحاق
الوجع بها ، ورغم ذلك تنسى وجعها وألمها وتفكر في حسن ، لا يسقط
من عينيها لحظة.

_ يأتري مكتوب لي أشوفك يا حسن

ولا الأيام حتقسي عليه وتحرمني

منك، مش طمعانه ياربي غير أشوفه

قدامي ، أملي عيني منه، أشوفه

بشحمه ولحمه وإن شاء الله

أموت بعدها.

بسييف الحنين، تحاول طعن الغياب، تفتل من الشوق حبلاً، تصعد به إلى السماء، تصارعها
الأيام فتذببحها على عتبة الأهات، لا تلتفت لخطى الحالمين، نحرت الإنتظار على أسوار الأمل....

_ مش هاممني حبستي ، ولا الي عامله
فيه أبويه، ولا هاممني الوجع، الي
مقطع قلبي أنت ، أنت يا حسن
قلقي عليك أنت ، خوفي من بكره
عليك أنت.

.....

أحلام مبعثرة ، آمال متضرعة ، متوسلة،اللسان سئم البوح
لا تزال هناك شموع تشتعل لم يكتمل إحتراقها، تبتهل في
صومعة الرجاء، ترفض الخضوع والإستسلام، حبات الأمل
تتضور جوعا للحياة، داخل الخيمة ، الشيخ آدم والمقدس
وحسن ومنازع طال بهم الحديث.

الشيخ آدم

_ يعني مشوارنا جه على الفاضي.

حسن

_ لا يا شيخ آدم ، مشواركم ماجاش على
الفاضي لسببين ، رفعتوا من روعي
وحسستوني إن فيه الي واقف معانا
ويساندنا والسبب الثاني ، وحشتوني
وحسستوني حقيقي أني واحد منكم.

الشيخ آدم

_ فيك الخير يا حسن ، إحنا في ضهرك
الشيخ عامر خلف راجل.

أرمنيوس

_ عاوز أقولك حاجة يا حسن؟

_ قول يا عمي.

_ بيني ما بينك يا حسن.

الشيخ آدم معترضاً

_ يعني أيه بينك ما بينه، هو إحنا

قاعدين طربشات.

_ دي حاجة تخص حسن بس؟

_ اللي يخص حسن ، يُخصنا كلنا

يا مقدس.

حسن أدرك أن الكلام يخص لواحظ وخشي أن ينفرد به، يهرج

منازع والشيخ آدم.

_ قول يا عمي، مفيش حد غريب.

_ لواحظ يا حسن.

_ مالها لواحظ؟

_ أبوها عرف اللي بينك ما بينها وضربها

وعذبها وحبسها في أوضتها.

حسن

_ مسكينه ، ذنبها أيه علشان تتعذب علشاني.

أرمنيوس

_ ذنبها أنها بتعشقك يا حسن وحالتها صعبه.

الشيخ آدم بخفة دم.

_ حتى أنت يا حسن ، ليله أذاقتنا المرار

ألوان ، وجه الدور على لواحظ علشان

مع اني بحس أن البت دي بنت حلال وغير أبوها.

١٠_ أحلام وردية :

الكثير منا يتعلق بالوهم وتزعجه الحقيقة، دائماً نحصر على إخفاء الحقيقة في صناديق الأوهام، نهرب منها لمتاهات مقفرة، لماذا أحلامنا الوردية تسبقنا للمحال ، هل لأننا نحلم أحلام فوق طاقتنا وعندما تفشل تقودنا إلى التبدل والتمرد والعصيان ، لماذا أحلام الشر تتسع وأحلام الخير تضيق، جعفر وهارون في المضيضة يستقبلان أحلام وردية ومجد وغنى.

_ عملت أيه ياهارون؟

_ اللزي بيحضر في الرجاله وبعد الظهر

حقابله هو والرجاله نرتبوا كل حاجه .

_ وأنا حجهز في المضيضة هنا كل حاجه.

_ أنا حضرت الطبالين وشاعر الربابه

وحيستوننا على الجسر بعد الظهر

ووصيت شاعر الربابه ينفخ فيه شويه

_ أيوه ، خليه ينفخه كويس ، علشان

نعرف نفتشه.

_ وحياتك ماحنخلي معاه حاجه.

الشيخ آدم جالساً على الدكة وسط الدار وشحاته بجواره وتجلس عزيزة

على حصير على الأرض، يشرب الشاي، يرتشف الرشفة بصوت

مزعج، وكأنه شخير رجل نائم .

_ أشرب كوبايه الشاي واتوضا

واجهز نفسي على صلاة الظهر.

_ أنت رحت وقابلت حسن الي

بيحكوا عليه ياشيخ آدم

_ أيوه ، الواد ده ياعزيزه راجل

ولا كل الرجاله، حاسس أن ربنا
بعته نجده لأهل البلد، والأقدار رمته
هنا لحكمه لربنا، ربنا يحمي الولد
ده يا عزيزه.

_بيقولوا قتل خمس من رجاله اللزي
_ أيوه واللزي فر وهرب برجالته
لو استنوا شويه ، مش بعيد
كنا خلصنا منهم.
شحاته

_ أنا لما أكبر يابا ، حبقى زي حسن.
الشيخ آدم ساخراً
_ تبقى زي مين يابن عزيزه.
_ زي حسن يابا.

الشيخ آدم ساخراً
_ تبقى زي حسن ، طب غور من جني
فز ، قوم من هنا، واقعد جنب أمك
يابن أمك،
ساخراً

_ زي حسن قال.

تمر به الساعات والأيام وصوت الوجد حزين، يبحث عنها بين شقوق
الأمل، ويقتله الشوق والحنين، قلبه إمتلاً بالوجد والأنين، يحمل كل عذابات الشجن
وعذابات السنين، يصرخ ، يناديها ، حسن يجلس على الحجر الذي أسماه مرسال حجر لوحظ،
يفكر فيما قاله ارمنيوس عن لوحظ، ينشغل عليها وبحالها، يحدث نفسه.
_ أبوها عرف كل حاجه يا حسن، وكل حاجه بتتعدد ، وأبوها مش حيكفتي باللي عمله
فيها، ليه كده ؟ لوحظ ماتستاهلش كده

وأنا عاجز مش قادر أعملها حاجة، بس
حقدر أعمل أيه ياربي؟
يدخل منازع وحمدان يقطعان عليه خلوته.

منازع

_ قوم يا حسن ، الضُّهر قرب يأدن
وإحنا لازم نتحركوا.

حسن

_ معقول الوقت مر بسرعه كده.

حمدان

_ ماهو أنت مش معانا علشان تحس بيه.

حسن

_ بينا نجهزوا نفسينا وننزل.

.....

ليله لا تنام قرية العين منذ أن خطفها منازع وحبسها في منزله الدموع باتت لا تفارقها،
تكاد أن تكون عدمت كل حلول خلاصها حتى أحلامها تخشى أن تقترب منها فتغرق في الدموع،
لازال الذي يسمح لحليمه في زيارة ليله، تقف ليله وحليمه في منتصف الدار حليمه كانت قد
قصت ليله موضوع بيع الأرض وأن البلد في هذا اليوم مشغوله بإستقبال الشريف معتصم
بالطبل والزمر وشاعر الربابه.

ليله

_ ربنا يكون في عون أهل البلد.

الأرض وماكنتش مكفياهم علشان

تسترهم ، مابالك وهي حتتباع.

يقطع حديثهما دخول منيره، هي تغار من وجود حليمه مع ليله.

منيره لحليمه

– روعي يابت تَبْنِي للبهائم، بدل الحديث الفاضي الي أنت فيه.
حليمه تنظر ليله وكأنها تنتظر رأيها فتَهْز ليله رأسها بالموافقة.
تخرج حليمه من غرفة ليله ، منيره تنظر ليله ساخره.

– وأنت حتقعدِي كده ؟

– عاوزاني أعمل أيه يامنيره؟

– قومي حللي شوية دقيق علشان

عندنا خبيز.

حليمه تحمل غلق مملوء بالتبن وتتجه به نحو الحوش ، تفتح باب
الحوش وتدخل، تجد السلوقي الذي يفرح برؤيتها فيتהלل وجهه
بالفرحه ويتوسل إليها.

– حليمه ، حليمه ، أنا جعان ، سلوقي جعان.

– أنت لسه محبوس هنا يا حزين ؟

– اللزي وحش ، يارب يموت

خديني معاك.

تتجه حليمه بغلق التبن نحو مكان العلف ويسمونه مَخُول، تُفرغ
به التبن، السلوقي يبكي متوسلاً

– خديني معاك يا حليمه.

– جاك خيبه ياواد ، بقى مش قادر

ياواد تنط من على الحيطه.

– واطلع الحيطه وأنط ازاي.

– حط جذع النخله الي هناك ده

واطلع فوقيه ونط.

– صح ، حليمه ، سلوقي حمار.

– اسكت الله يخرّب بيتك حتوديني في داهيه.

_ طيب أفك المربط إزاي.

_ هما ربطوك من ورا علشان

ماتعرفش تتعدل وتحل المربط

بص يا حزين، أنا أحله وأربطك

من قدام وكده تقدر تحله من قدام

وتنط على الحيط، بس تعمل كده

في الليل وهم نايمين .

_ ماشي.

تقوم حلیمه بحل المربط وتعيد ربط السلوقي من الأمام.

_ أوعي يا حزين تقول أني

قولتلك حاجه ، حيربطوك تاني

ويحبسوك.

_ لا ، مش حقول حاجه، انت حلوه يا حلیمه.

.....

على الجسر أمام مدخل البلدة ، يمتطي كلا من اللذي وهارون جواده

يقف مجموعة من الرجال ومعهم ثلاثة من الطبالين وبجوارهم شاعر

الربابه.

طلب للزي

هارون

_ بينا نتحرك يالزي .

اللزي لطلب

ومن قدامهم شاعر الربابه

والطبالين ومعاهم أنت .

_ ماشي ياسبع.

١١ _ المغامرة:

عندما تضيق الصدور، لا تيأس وابحث في الظلام، عن بصيص ضوء
إصنع من إرادتك وعزمك مصابيح تنير لك طريقك، لانتظر لصوت الماضي وانظر لصوت
الغد بقلب قوي وبإيمان قوي.

حسن ومنازع وحمدان ومرسال ساروا فوق الجبل حتى وصلوا حدود
البلدة المجاورة إسمها الحمديه ، إختاروا منطقة الزراعات قبل مساكن
البلده ، لا يريدون أن يراهم أحد من أهل تلك البلدة، إجتازوا الأراضي
الزراعية حتى وصلوا لكوبري مصنوع من جذوع النخيل، إجتازوا
الكوبري وسلكوا طريق ضيق يصلهم بترعة السلموني والطريق الذي
سوف يأتي منه معتصم ، إجتازوا الطريق حتى آخره في منطقة مليئة
بالأشجار على حافة ترعة السلاموني وتوقفوا هناك.

حسن

_ أيه رأيكم نستناهم هنا.

منازع

_ كويس والمكان ده معقول.

حسن

_ يبقى على بركة الله، أنا

حطلع الشجرة ومنازع الشجرة

الي جنبها .

يشير حسن لشجرتي صفصاف على حافتي ترعة السلموني.

يلتفت لحمدان ومرسال.

_ أنت ياحمدان ومرسال تدخلوا القصب ده.

يشير إلى حوض من القصب على حافة الطريق الضيق ، المواجه للأشجار

_ وأول ماتلاقوني أنا ومنازع نطينا من على الشجر عليهم ، تهجموا

من القصب.

منازع

_ فيه حاجه مهمه يا حسن، نسيته.

_ آيه هي يامنزع؟

_ ممكن يتعرفوا عليه ، وكمان ممكن

يتعرفوا عليكم واحنا مش عاوزين

نسيب حاجه ورانا تكشفنا.

_ معاك حق يامنزع.

منازع

_ عندي حل يريحنا يا حسن

_ قول يامنزع.

_ نقلعوا كلنا هدومنا ونبقوا بالسروال

بس ونربطوا نفسنا بالطين من التربة

ومايبنش غير عني،وبعد مانكتفوهم

نتفقوا نعملوا آيه؟

_ حل كويس يامنزع وكمان منظرنا

كده لوحده ممكن يربعهم.

خلعوا ملابسهم ماعدا السروال وأخفوا الملابس في مكان داخل حقل

القص ، وقاموا بدهن كامل أجسادهم بالطين ولا يظهر سوى أعينهم

صعد حسن شجرة وصعد منازع الشجرة الملاصقة لها. وإختبئ كلا من

حمدان ومرسال داخل حقل القص، الطريق أصبح مكشوف لهم جميعاً

.....

أحلام الأغنياء دائماً كبيرة ، تُحلق في الفضاء بحرية كبيرة ، لها أجنحة
يمكنها صد العواصف وتيارات الهواء ، لا يسقطهم من الفضاء سوى
القدر، أما أحلام البسطاء كأحلام عصافير صغيرة، تساقطت من أعشاشها ، قبل أن تتقن فن
الطيران، لتعجز عن التحليق، وقد تعجز
عن العودة إلى أعشاشها ،موكب الشريف معتصم، يركب
جواده وبجانبه شافعي وخلفه ثلاثة من الرجال وفي المؤخرة ، جمل
محمل بالصناديق يقوده عبد أسود، معتصم هو ابن الشريف معصوم
الوحيد ملتزم الكتكاته ، شاب جميل الوجه ، مدلل ، يحب التملك ويسعى
لتملك كل ماتقع عليه عينه، شعر ناعم وعينان عسلتان، وجهه يميل
للحمرة قليلاً، متوسط الطول ، يرتدي ملابس فاخرة، لم يسبق له
معرفة جعفر ملتزم البلده ، يسير الموكب في طريق ضيق يفصل
حقول القصب عن ترعة السلاموني.

شافعي

_ يقولوا جعفر عنده بت حلوه

بترفض كل اللي بيتقدم ليها.

_ وماله ، نشوفوها، لو طلعت حلوه.

يبقى زيادة الخير خيرين ، الأرض ومعها عروسه.

.....

موكب اللزي وهارون.

هم إعتادوا ممارسة طقوس الظلم ، يمارسونه بغوايه وعشق
كبير، لا يكثرثون لضمير ولا يفكرون في عقاب، اللزي وهارون
وخلفهما موكب كبير ، طلب وشاعر الربابة والطبالين وفي الخلف
مجموعة من الرجال ، يتوقفون على الجسر في منتصف الطريق
بين بلدتهم والحمدية البلد التي تليهم.

اللزي لهارون

_ حنقوا نستنوهم هنا ، ماينفعش نروح

نقابلهم عند فلقة الحمدية.

_ ماشي ، هنا كويس يالزي

يلتفت هارون نحو الموكب من الخلف.

شاعر الربابة

_ أيوه عارفين ، أنا أول مايظهر

الشريف ، حشتغل على طول.

موكب معتصم يسير في الطريق ، وصل على بُعد أمتار من المكان

المختبئ به حسن ومنازع ومرسال وحمدان.

معتصم

_ هموا شويه ، تلاقي الناس مستنيه

من بدري.

شافعي

_ مايستنوا ، هم وراهم أيه

وأدينا ماشيين على مهلنا.

إحنا لولا الجمل كُنا وصلنا

من بدري.

حمدان ومرسال مختبئان في القصب، عيناها معلقة على الطريق.

منازع يقف على أحد الفروع ، على شجرة الصفصاف، وقع نظره عليهم، فأشار لحسن
الذي يقف على الشجرة المجاورة له، إشارات
بينهما بالإستعداد للهجوم.

موكب معتصم يقترب منهم شيئاً فشيئاً، حسن ينظر إلى منازع ويهز
له رأسه ويبادل له منازع بهز رأسه، الموكب أصبح أسفل منهم. يقفز
حسن على معتصم ويقفز منازع على شافعي ويشتبكان معهما ويخرج
حمدان ومرسال من حقل القصب ويشتبكان مع الرجال الثلاثة، المفاجأة هزت معتصم
ورجاله ، أربعة أشباح تخطفتهم وتمكنت منهم جميعاً حاول
العبد الذي يقود الجمل الرجوع بالخلف بالجمل ، ولكن حسن بعد أن ضرب معتصم
الذي أغمى عليه ، لحق بالعبد وضربه وأمسك بالجمل
أجبروهم على خلع ملابسهم والبقاء بالملابس الداخلية سديري وسروال وقاموا بتكثيفهم
وتعصيب أعينهم وبعد أن قاموا بتعصيب
أعينهم أغتسل حسن ومنازع وحمدان ومرسال من التربة وارتدوا
ملابس الرجال ، حسن إرتدى ملابس معتصم ووضع عمامته على
رأسه ومرسال إرتدى ملابس العبد ووضع طاقيته على رأسه وإرتدى
منازع وحمدان جلبابين .

حسن لمنازع

_ أنت وحمدان حتاخدوهم على الجبل
كل اثنين منهم على حصان متكثفين
فيه وأنت وحمدان كل واحد حصان
وتسحبوهم على الجبل وتخلوهم
متغمين مايتعرفوش على حد فيكم
منازع يضحك

_ وانت بقى حتعمل معتصم.؟

حسن يبتسم

_ أه ومرسال العبد بتاعي حيمسك

الجمل .

_ حنشوف آخرتها معاك يا حسن

دول لو مسكونا حيقطعوننا.

موكب إستقبال معتصم ، ينتظر قدوم موكب معتصم .

هارون

_ هو إتأخر ليه ، المغرب قرب يآدن.

اللي

_ أنا زهقت من الوقفه.

يلمح هارون من بعيد حسن ومرسال .

_ أهم جم ، أيه ده ، دول إثنين بس

واحد على فرس أكيد معتصم وواحد

بيقود جمل.

اللي

_ عجيبه ، جاي لوحده من غير رجاله.

_ هو ده معتصم اللي سمعت عنه

_ بيقولوا عليه سبع ومايمشيش

غير لوحديه، أنا سمعت أنه يفطر

على خروف لما بيقوم من النوم

وبيتغدا بخروف.

.....

هاهو الوهم، هم يروا فيه الشريف، السلطان ، الجاه، غاب الوعد ، وغاب الصدق، أصوات
الشياطين تُثير الألم والفرع في النفس

ضاقت الحناجر بالبوح، حسن يسير بمغامرته بثبات غير عادي
مرسال في غاية الفرع والرعب.

_إمسك نفسك يامرسال ، قربنا عليهم.

_ ربنا يستر يا حسن ، رُكبي عماله تخط
في بعض .

_ أنا جامد من بره، بس من جوه
حموت من الرعب.

الفرحة قد تذهب ثم تعود، والهم بيروح ويرجع، والزمن هو نصيب
زي ما بيدنا بيوجع، والقلب اللي إتملا عصيان ، ربك قادر يخليه يخشع
موكب إستقبال معتصم ، اللزي وهارون يقفان في منتصف الطريق،
بينما باقي الرجال موزعين على جانبي الطريق كتشريفة يمر بينها
معتصم، يقترب حسن ومرسال منهم، تدق الطبول ويتقدم نحو حسن
شاعر الربابة يعزف على الربابة ويمدح معتصم.

يامعتصم يا ابن الأشراف

ياسليل الأصول المجيده

على الربابه جيت أغنى

وأمدح وأرحب بيبك

أهلاً دي خطوه حميده

يتقدم اللزي وهارون ويرحبان بحسن.

هارون

_ شرفت البلد يا جناب الشريف.

حسن

_ يشرف مقدارك.

هارون يقوم بتقديم نفسه واللزي لمعتصم.

_ أنا هارون من كبار الحاجر

يشير إلى اللزي.

_وده يبقى اللزي.

حسن

_ وفيه حد مايعرفش اللزي،أسد الحاجر

وحاميها.

اللزي يركبه الغرور والعنجهية بعد إطراء حسن عليه.

_ وأنت غني عن التعريف يا جناب الشريف يا بن الأصول..اتفضل

الحياة فيها واحد يحبك وواحد بيكرهك، ماشيه بوجهين ، أحياناً بوجه

معدول ، وأحياناً بوجهين،وزي ماتاخذ بتدفع، وفيها السؤال والجواب

عايشين بين فرح وعذاب، يسير الموكب على الجسر في إتجاه البلدة

حسن في المنتصف بين اللزي وهارون، وخلفهم مرسال يقود الجمل

المحمل بالصناديق وشاعر الربابة لا يتوقف عن المدح.

يا جميل الوجه والعمه

يا حسن السير والذمه

شجاع وسبع وكلك همه

يخطب بسيرتك أمه

يتعجب حسن من الإستقبال المبالغ فيه لمعتصم ويحدث نفسه.

_ كل ده نفاق لمعتصم ، وكمان

سيرته بقت خُطب للأمه.

.....

أسوأ دمعة ، دمعة الشعور بالظلم، هي دمعة بالغة السواد، قائمة
تُضاعف الهم والألم ، يتمدد معها الحزن، فتقيدنا تلك الدموع
وتُفقدنا القدرة على الإبتسامة، ما إن إنتهت صلاة المغرب حتى
خرج من في المسجد مهرولين ،الشيخ أدم بجواره إبنه شحاته
كلما حاول لبس الحذاء اصطدم به رجل من أهل البلدة يجري.
_ فيه أيه ياواد يا شحاته؟

_ مش عارف فيه أيه ؟ الناس بتجري.

يقترّب عبدالمجتلي حلاق وجزار البلدة من الشيخ أدم .

_ حرماً ياشيخ أدم.

_ أوعي تقول كنت معانا بتصلي.

_ لا ، أنا جاي من الدرب لقيتك .

_ قولي بقي، فيه أيه؟ الناس بتخبط

فيه وتجري ، أنا لبست مركوبي

بالعافيه.

_ أصلهم بيجروا علشان يتفرجوا على

الشريف ويسمعوا شاعر الربابة .

_ خيبهم الله ، أكثر ما هم خايين

هم كل همهم يروحوا يتفرجوا

وناسيين خيبتهم ، هم مش عارفين

الشريف جاي يعمل أيه، عليك اللعنه من بلد.

_ السكينه سارقاهم ومش حاسين بحاجة.

يبقوا يروحوا وقتها يطينوا عند التربة

وكل واحد يحط على دماغه ، جالوسين طين.

.....

يصل موكب معتصم لقصر جعفر ويستقبل جعفر حسن في ملابس معتصم ، يتبادلان الترحيب ويسيران في ممر القصر حتى يصلان للمضيقة، مهران يعاون مرسال في إنزال الصناديق من فوق الجمل..
داخل المضيقة مآدبة عشاء كبيرة ، أطباق كبيرة من اللحوم والدجاج المحمر والمحشي فريك ، أطباق لحما محشي، أطباق مختلفة من الملوخية والويكا والأرز ، أكثر من برام زفر باللحمة ، يدخل معتصم ومعه حسن وخلفهما اللزي وهارون.

جعفر

_ اتفضل يامعتصم يابني، حاجه على ماقسم.
_ الخير كثير اهو ياجناب الملتزم ، وانا عارف
أن الحاجر مشهوره بالملوخيه والويكا .
يجلس حسن ويجلس بعده جعفر ، ثم اللزي وهارون، حسن يلتفت حوله.
_ فين العبد بتاعي؟

جعفر

_ حياكل بره مع الرجاله.

حسن

_ أنا مش باكل لوحدي من غير رجالتني.
الدهشة علت جعفر واللزي وتدخل هارون محتويًا الموقف
_ وماله ، باين ان جناب الشريف نفسه حلوه.
يطلب هارون من طلب الذي قف على خدمة المائدة أن يأتي بعبد معتصم
(مرسال) ينصرف طلب ويقوم بإحضار مرسال الذي يجلس بجوار حسن وحسن يتسائل في نفسه.

_ يعني مقدرش جعفر يوكل لواحد معانا.

يبدأ الجميع في تناول الطعام.

.....

ليله في حالة بكاء واقترب موعد زواجها المجبرة عليه من اللزي
هي تشعر بالوجع ، ليس الزمان زمانها ولا المكان مكانها، والأحاسيس
تبدلت وتجمدت في صقيع لا ينتهي، لا تشعر بالأشياء حولها ولم يعد
هناك مايشبهها، حليمه تواسي ليله كعادتها مع لوحظ.

_ كفايه عياط ياليله .

_ مش عارفه أعمل أيه يا حليمه، اللزي

مش ممكن يتجوزني، ولا يلمس شعره

مني ، دنا الموت أهون عليه.

_ كفايه والنبي قطعتي قلبي

أيه الغلب ده ياربي اللي

إحنا فيه !

.....

لواظ في حجرتها مستلقية على فراشها ، حالها لا يقل عن حال ليله
هي تشعر أن مدن أحلامها ، تهدمت ، لم تُعد عامرة، كل الكلمات لديها
تُولد ميتة، أبيها أغلق أمامها كل أبواب الأمل ، حبسها في قيود الحزن
وأغرقها في بحر من الدموع، تدخل عليها مصايب وتقطع عليها وحدتها
_ معلش يابنتي ، إتلهيت في طبيخ الضيوف
علشان كده إتعوقت عليك.

_ الضيوف وصلوا ياخاله.

_ أيوه يابنتي ، بيتعشوا من بدري

مع أبوكي ، أيه رأيك أجيبك لقمة

أنا طابخه زفر وويكا وملوخيه

يستاهلوا بقلك.

_ كمان شويه ياخاله، قوليلي
حليمه عامله أيه ؟ مابتسألش عليه؟
_ هي معاها سيره غيرك ، تلاقىها عند
ليله.

_ وليله عامله أيه ياخاله ؟
_ حليمه بتقولي اللزي حيكتب
عليها الخميس اللي جاي وهي
مش موافقه وحيكتب عليها بالعافيه.
_ ياعيني عليك ياليله، حالك من حالي.
_ ياستي خليك في حالك، كفايه اللي
أنت فيه.

_ ليله شافت مر أكثر مني ياخاله
كفايه اللي هي فيه، قتل جوزها
وحرقت دارهم وخطفها وحبسها
وكمان قتلوا أبوها من كام يوم.
_ هي ماتعرفش إن أبوها إتقتل.

.....

حسن شخصية تربت على الثبات والثقة بالنفس وبالقدرات، يفكر بعمق
يكره السلبية، لا يُنصت لإحباط، لا يخشي المحاولة ويكره الفشل
الحياة منحه خبرات متراكمة ، فمنذ إعدام أبيه الشيخ عامر في المحروسه وهربه مع رحان
للصعيد وما لاقاه من صراعات في الصعيد
كل تلك الظروف أكسبته خبرات وقوت قوة التحمل لديه ، إنتهوا
من تناول العشاء في المضيفة والشاي أيضاً وشكر حسن جعفر
على كرم الضيافة.

جعفر

_ شرفت دارك يامعتصم ياابني.

_ الله يشرف مقدرارك ياجنب

الملتزم ، وأنا مش عارف أقولك

أيه؟ على كرمك والحفاوه اللي لقيتها.

_ وهو انت شويه ياابني، أنت تستاهل كل خير.

_ ربنا يخليك، أنا جبتلك عشرين ألف

آقجه تمن الأرض .

يلتفت لمرسال بجواره.

_ هات صندوق المال ياخير.

يتجه مرسال نحو الصناديق الملقاه في جانب من حجرة الضيوف

ينظر بحيرة للصناديق ويلعن حسن .

_ منك لله ياحسن ، المفروض أنا

أكون عارف الصندوق اللي فيه

المال، أحسن حاجه أفتح الصناديق كلها.

يفتح مرسال الصندوق يلي الآخر بيد مرتشعة.

_ موقي حيكون على يدك ياحسن.

.....

حاول الوقوف مهما كان الألم ، فالوقوف خير من أن تدهسك أقدام الأشقياء، ماتخشاه قد

يحدث لك إن داومت التفكير به، وهناك مثل

شعبي يقول اللي يخاف من العفريت يطلعله، السلوقي المسكين

حبيس حوش البهايم ، بلا رحمه ، لو قدموا له طعام ، يكون القليل

من كسر الخبز العطنة والناشفه، هم لم يرحموا ضعفه، وعيوبه

الخلقية، السلوقي يحاول أن يتذكر كلمات حليمه له وكيف يهرب

_ البت حليمه قالت لك أيه ياواد

ياسلوتي.

يحاول أن يتذكر

أيوه قالت أنط من على الحيطه

بس أنط إزاي ؟

يتذكر عندما يقع نظره على جذع النخلة المركون في جانب من الحوش

_ أيوه دي .

يذهب نحو جذع النخلة ويعافر في جر الجذع نحو الحائط، نجح في

المحاولة، عافر أيضا حتى أسند الجذع على الحائط وبدأ في الصعود

نجح في الوصول لأعلى الحائط ، يسمع خوار البقرة ومأمة الخراف.

_ اسكتوا ربنا يخليكم، ماتقولوش لحد

أني مشيت.؟

ينظر للأرض من أعلى الحائط ويتردد في السقوط، حتى يمسك الحائط من أعلى ويسقط

جسمه إلى أسف ويغمض عينيه ويقفز وهو واقفاً

يمسك بقدمه.

_ آه يارجلي ، اتعورت ياسلوتي.

.....

مضيقة جعفر ، لازال مرسال يفتح في الصناديق وهو يكيل اللعنات

على حسن، حسن يلتفت إليه.

_ أيه ياخير فين الصندوق؟

ومرسال بغيط وبصوت مكتوم.

_ يعني أنت مش عارف اللي فيها ياحسن؟

أخيرا يعثر مرسال على الصندوق ويحمله ويسير به، حتى يضعه

فوق المنضدة التي يجلس عليها حسن، ينظر لحسن بعتاب

_ أدي الصندوق ياجنب الشريف.

حسن يلتفت نحو جعفر.

_ فين عقود الحيازة؟

هارون يقوم بإخراج عقود الحيازة المكتوبة على ورق من الجلد،

يتناول حسن العقود ويتفحصها جيداً.

السلوتي يعرّج وهو يمشي ، يُحمل على قدم ، ويريح الأخرى، يسير

متذكراً حمارته،

_ تلاقي الحماره كلها مشيت ولا كلها ديب.

تروح فين ياسلوتي؟، أروح فين؟ أيوه

أروح عند حسن ، أقعد معاه، ولا بلاش

حسن يمكن يكونوا ضربوه.

يهديه تفكيره للهرب نحو الجبل والعودة إلى المغارة.

في العقل قوة لا تستهين بها، فهي تسيطر على لهو النفس، و

تُلجم جماحها، وإن سيطرت على لهو النفس، قضت على عشوائية الجسد

عليك أن تزرع في روحك قوة الاعتقاد ، حتى تصل بفكرك لقوة الإرادة

حسن يؤمن بأن إندماج العقل مع الصدق، يصل بالإنسان إلى الطريق

المستقيم، وترقي أفكاره بين المنطقية والواقعية ، في مضيعة جعفر

يُمسك جعفر بعقود الحيازة.

_ تحب أكتبك تنازل عليها ،

ولا تستلمها وبس.

حسن يقوم ليجلس بجوار جعفر ويُفسح له هارون المكان.

_ حنكتب تنازل ياعمي على كل حيازة.

أمر هارون طلب بإحضار دواية حبر وريشه ، وسرعان ما جاء طلب

بالدواية والريشة ، وبدأ جعفر الكتابة تحت بصر حسن .

_ تنازلت أنا الملتزم جعفر ابن علي ابن أبوزيد ابن الأعور، إلى جناب.

حسن قبل أن يسأله عن اسمه قال له. إلى عباد الرحمن

جعفر يتوقف عن الكتابه وهو في دهشة.

جعفر

_ عباد الرحمن ؟

_ أيوه ، أنا مابحبش أخط إسمي على الحيازات

علشان مايزودوش عليه الجبايه ، وأنا بوزعها

بمعرفتي.

_ ماشي زي ما أنت عاوز .

ينتهي جعفر من كتابة التنازل على كل الحيازات وقام بوضع بصمته

أسفل كل تنازل.

جعفر

_ مبروك عليك يامعتصم يابني

وربنا يجعلها عامره بحسك.

_ تشكر يا جناب الملتزم

هارون

_ بكره حنمشي كل مزارعين البلد

علشان تستلمها فاضيه.

_ لا ، خليههم زي ماهم ، سمعت إنهم

أرخص من مزارعين بلدنا.

يهم حسن بالوقوف

_ حقوق أمشي بقى ، وتشكروا على

كرم الضيافه.

جعفر

_ لا والله ماتمشي في الوقت ده

إحنا عدينا العشاء، أنت الليله

ضيقي وبكره النهار براح.

– حس بس ياعمي.
– مابشش ولا حاجه .
– اللي تشوفه جنابك.
اللي ينادي على طلب الواقف أمام باب حجرة المضيضة .
– أنت والرجاله مع مهران لحد الصبح
ماتتعتعوش من هنا، خليكم واقفين مع
مهران .
طلب
– ماشي ياسبع .
يلتفت لهارون .
– بينا يهارون ، اليوم كان طويل.
وجتتي محتاجه السرير.
يقف هارون.
– نشوفكم الصبح.
يستوقفهم جعفر ويمنح كلا منهم كيساً من النقود (الآقجات)
يأخذ كلاً منهم كيسه وهو يبتسم وفي داخله يلعن جعفر
الذي قبض عشرين ألف آقجه ويمنحهم الفتات.
حسن يبتسم داخله فهو يقرأ كل الوجوه ، هاهم حفنة الشر يراهم أمامه
ببصره ، يقرأ تقسيمات وجوههم، هو يملك قوة التصورات التي تقوده لقوة
الملاحظة، التي تستخرج قوة التفكير وتُنتج نتيجة الفعل ، ينظر لجعفر
وهذا هو جعفر والد لواحق يجلس أمامه ، يحاول أن يرضيه، ثمناها
واقع لا حالة مزيفة يرتدي فيها الجميع الأقنعة، يتذكر لواحق ، يتمنى لو يطير إلى حجرتها ،
هو يعلم أنها فوق رأسه ، في الدور الذي يعلوه.
قطع تفكير حسن كلام جعفر.

_ دارنا زارها النبي النهاردة يامعتصم ياابني.
_ ربنا يخلي جنابك ، أنا اتشرفت بيك
بقولك أيه ياجعفر بيك؟
_ قول يامعتصم ياابني.
_ أنا سمعت إن عندك عروسه.
_ تُقصد لواحظ بنتي.
_ أيوه، سمعت عنها كل خير.
السعادة ترتسم على وجه جعفر ولكن لا يريد أن يُسرف في سعادته
_ هي ياابني على وش جواز، وكل
مايتقدملها حد ترفض ومفيش حد
مالي دماغها، الظاهر أنا جلعتها(دللتها زياده.
_ معاها حق ياعمي، هي بنت الملتزم
جعفر أي حد يستاهلها.
جعفر شعر بإهتمام معتصم بلواحظ ، فأراد أن يجعله يراها وقد تعجبه
ويتخلص منها ومن الذي حدث.
_ بعد إذنك ياابني .خليهم يجيبوا الشاي.
_ اتفضل جناب البيه.
يخرج جعفر ، يصعد السلم قاصداً لواحظ .
_ ربنا يجعله من نصيبها ، وارتاح منها
ومن الفضايح.
يفتح الباب ويدخل جعفر ، مصايب تنهض واقفة رعبا من جعفر، لواحظ
منكسة الرأس ولا تنظر لأبيها.
جعفر

جعفر

_ قومي قدمي للضيوف شاي.

_ خالتي مصايب هي اللي تعملهم

الشاي وتوديه ، انا من ميتى بقدم

حاجه للضيوف يابا.

_ مفيش غيرك حيقدّم الشاي ، معتصم

جانب سيرتك ويارب يكون من نصيبك

إبن أصول ويشرف أي عيله.

لواحظ تهزها المفاجأة .

_ أنا مش عاوزه أتجوز يابا.

جعفر ساخراً

_ أنت ليك عين تتكلمي، مش عاوزه

تتجوزي ، عاوزه تعشقي المطايريد

حتتجوزيه غصب عنك بس يرضي

بيك ونلم الفضايح والجُرس اللي عملتيها.

أنا حنزل للضيوف وأنت حتحصليني بالشاي.

مصايب

_ إنزل يابيه وماتعكرش دمك وهي حتحصلك.

ليت هؤلاء يبتعدون عن الظلم ويدركون أن كل البشر سوف يعيشون

صاحب القصر ، وصاحب الكوخ، ومن يسكن حتى في المدافن والجبل

ولكن من منهم يمتلك مفاتيح السعادة، الحياة ماهي إلا تجارب مُعتادة

فيها الريح وفيها الخسارة، لن تندم أبداً على ما لم تتكلم به ولكن غالباً

يكون الندم على ما نتحدث به، حسن ومرسال بمفردهما في المضيفة.

_ الواحد كان خاويان يا حسن أنا أكلت لحد ما حسيت أني حفطس من كتر الأكل، بس

ماكنش لازم نبات.

_ الراجل حلف علينا يامر سال.

_ ماشي ، حناكل تاني يعني

وحيفطرونا الصبح.

_ أنت كل همك على بطنك ، تصدق

أنا غلطان الي خليتك تاكل معنا.

مرسال ساخرأ

_ ياسلام ، منا طول عمري باكل معاك.

_ شُفت ياواد يامر سال وش جعفر

_ أه وشه كان جايب ألوان هو وهارون

واللزي، الناس دي اتعودت على ذل

الناس وإستعبادها.

يدخل جعفر

_ محدش غريب ياجعفر بيه.

_ طبعأ وده بيتك ومطرحك

.....

لواظ لا تزال في عنادها ومصايب تقنعها بكافة الطرق .

_ ربنا يهديكي يابنتي وانزلي

لو مانزلتيش حيبي أبوكي

ويطين عيشتنا.

_ ان شاء الله يموتني.

_ يابنتي إعملي معروف ، أنت دخلي

الشاي وامشي على طول ، ماتخليهوش

يبص في خلقتك ولا تبصي في خلقتة.

لكن الي بتعمله حيجر عليك التعب

_ ماشي ياخاله.

من يكف عن النظر عن بؤسه الداخلي، سوف يغنيه الله، فنحن لا نملك تغيير الماضي ، ولا
رسم المستقبل، بالصورة التي نتمناها، فلماذا نلوم ونقتل أنفسنا على أشياء لا نستطيع
تغييرها، جعفر وحسن ومرسال في المضيضة.

جعفر

_ أول مره يقابلني حد، يحب العبد

بتاعه كده.

حسن

_ كلنا عبيد عند الله يا جعفر بيه.

_ ده تواضع كبير وزايد شوية.

.....

إن تلبدت السماء بالغيوم، أغمض عينيك قليلاً، سوف تبصر خلف الغيوم ، قمراً
ونجوم، ولو وجدت الأرض حولك توحشت بالرياح

والأعاصير والثلوج، أغمض عينيك، فسوف تجد خلف الثلوج مروج

لواظ تحمل صينية الشاي بيد مرتعشة كارهة لداخل المضيضة

وليتها تعلم الحقيقة لسابقت الريح إلى المضيضة .

في المضيضة حيث يجلس جعفر وحسن ومرسال ، حسن يكره الظلم

ويُفضل أن يعاني منه ولا يمارسه ويمتُ كل من يمارسه. يفكر

بعمق في الحالة التي وضع نفسه فيها، قطع تفكيره طرق على الباب وصوت جعفر.

_ ادخلي يالواظ ، مفيش حد غريب.

حسن كاد يغمى عليه من المفاجأة التي لم يتوقعها، كاد قلبه أن يقفز

من مكانه.

تدخل لواظ ، يدها ترتعش، تنظر إلى الأرض ، حسن ينظر للواظ

ووجع القلب يعتصره ، يحاول أن يتماسك، لواظ تضع أمامه الشاي

وقدماها مسمرتان على الأرض، حسن يُقلب صفحات كتاب العشق يفتح صفحة الشوق،

يجدها مكتوبة بالمشاعر والأحاسيس، غاب عنها الكلام، لحظة صعبة وقاتلة أن تكون في لحظة

بين الرجاء والتمني، قلبه لا يهدأ عند رؤيتها، لواظ أمامه ، خرجت من باب الذاكرة وتقف

أمامها بشحمها ولحمها، قوامها الرشيق وعينيها الهاربة إلى الأرض.

جعفر

_ سلمى على الشريف معتصم يالواظ.

حسن يمد لها يده ، تظل معلقة لبعض الثواني.

جعفر

_أيه يالواظ، الشريف معتصم ماددلك يده.

لواظ ترتبك ، تمسك بطرف طرحتها وتسلم عليه دون أن يلمس يدها

تسحب يدها بسرعة من يد حسن وتجري بسرعة خارجة من حجرة المضيقة، تصعد السلم

مهرولة حتى تدخل حجرتها ، ترمي على

فراشها، مصايب كانت قد لمحتها فهرولت خلفها مسرعة .لواظ

تبكي بحرقة .

_مالك يابنتي ! فيه أيه؟

_ مفيش حاجه ياخاله

تواصل البكاء بحرقة

هي لا تعلم أن حبيبها كان حاضراً أمامها يراها ولا تراه وهي تعتقد أن حبيبها غائب،

يرتدي الشوق ثوبه، ويقف على باب ذاكرتها وقلبها وبصرها ولا يُبصرون غيره، هي كرهت أن

تحمل الشاي لهذا الزائر المجهول ولكن تكتفي أن تصب كؤوس خمر العشق لحسن، هي لا

تدرك بأن هناك رسالة من الشوق من القلب للقلب لو أرادت، هي إختارت رسالة الدموع.

.....

للشوق نوعين ، شوق الغيبة ولا يسكن إلا باللقا وشوف الأرواح

وهو لا يتم سوى بالحضور والمعينة، فالشوق مستعمر ومستبد

لكل الجوارح، لا يقف عند الروح والنفس، بل إلى القلب والعقل

والجسد بكل أركانه، ليله خاصة يواجهها حسن ، تحمل داخلها

كل المتناقضات،موقف لواظ أسعد حسن ولم يغضبه ،هاهي

ترفض معتصم بجاهه وسلطانه وماله وأصوله ، وتفضل عليه

هذا المجهول طريد الجبال ، هكذا هو العشق ليس له تلك
المقاييس التي يعرفها البشر، في المضيقة ، جعفر يحاول أن
يخفف عن حسن سوء تصرف لواحظ.

_معلش يامعتصم ياابني، لواحظ كانت
مكسوفه، أصلها مابتقابلش رجاله واصل.
_ مفيش حاجه ياعمي ، أنا مقدر الموقف.
_ طيب قوم معايه علشان أوريك أوضتك
الي حتنام فيها، علشان تريحلك شويه
_ مفيش داعي ياعمي، أنا قاعد هنا
لو حبيت أريح ، حمدد جسمي هنا.
_ مايصحش ياابني.

_ سييني براحتي ياعمي ، البيت
بيتي، اتفضل أنت ، تعبناكم اليوم.
_ أنا حسيبك علشان تاخذ راحتك
تقعد بالعافيه.
_ الله يعافيك.

يخرج جعفر من باب الحجرة وهو يصب اللعنات على لواحظ.

_ معتصم ماجبش سيرتها تاني
يبقى معجبتوش، ولكن حتعجبه
إزاي وهي كسفته، دي سلمت
عليه بالعافيه وملت وشي في الأرض.

يصعد السلام ويتجه لغرفة لواحظ غاضباً يفتح الباب ويدخل، لواحظ مستلقية على
الفرش تبكي ومصايب تحاول أن تخفف عنها، يدخل جعفر وتنتفض مصايب من جوار لواحظ.
_ فيه حاجه يابيه ؟

_ إستني يامصايب أنت.

يقترّب من لواحق الشر يتطايّر من عينيه ، هو لا يريد أن تضيع منه
تلك الفرصة في نسب كبير تتحاكي به المديرية ويتخلص منها ومن
عار علاقتها بحسن كما يراه هو.

_ وكمان بتعيطي، ليكي نفس

تكبسي راجل كد الدنيا ماددلك ايده
وتخلي رقبتني زي السمسمه.

_ أنا عملت زي ماقلت ، وديت الشاي
وسلمت عليه، عاوز أيه تاني، عاوزني
أقعد اتساير معاه.

تبكي بحرقة

جعفر

_ لا حرام تتحدتي معاه وحلال تعشقي
مطروود الجبل.

يصفعها على وجهها

_ أنت فالحه في الفضايح والجُرس.

يصفعها مرة أخرى ويخرج جعفر ويمشي في الممر حتى يصل حجرتة
يفتح الباب وهو في حالة غيظ من تصرفات لواحظ، يفتح باب الغرفة
ويدخل، يخلع جلبابه ويرميه على دكة قريبة من فراشه، يُحدث نفسه.

_البت دي ، حتشلك ياجعفر، حتموتك

بالحيا،أعمل معاها أيه تاني ؟ حبسه

وحابسها، حتى الضرب مش نافع فيها

معانده ودماعها ناشفه زي أمها.

.....

أضعف الناس من ضعف أمام كُتْمان سره، وأقواهم من تحكم في
غضبه، وأصبرهم من ستر فقره وصبر على البلاء، وأقنعهم من إرتدي
القناعة تاج فوق رأسه، والله لو أراد بعبد سوءاً سلط عليه نفسه وإن
أراد بقوم سوءاً، سلط عليهم الفقر والجدل وقلة العمل والتكاسل والتخاذل أمام
العظائم، والنهوض أمام توافه الأمور، حسن مستلقياً
على الدكة ومرسال جالساً بالقرب منه.

_تعرف يا حسن ، دلوقت بس عذرتك
في حب لوا حظ، هي تستاهلك يا حسن
ما كنتش فاكِر إنها كده .

_ وأيه اللي غيرك يا مرسال؟
_أنت ماشفتش شكلها كان عامل
إزاي لما دخلت علينا ولما حطت
صينية الشاي ولما سلمت عليك
وهي عارفه إنك شريف كبير
وعظيم وغني، كل ده ماهمهاش
وتحب واحد ساكن الجبل ماتعرفش
عنه حاجه ، بتحب واحد بعشق صعب
ومستحيل، وبيتفرش قدامها المال
والجاه والسلطان وتسبب ده كله
علشانك يا حسن.

_ لوا حظ ملاك في توب بني آدم يا مرسال
_ معاك حق ، هي غير الشيطان أبوها
أنا بقولك من قلبي، ماتفرطش في البت
دي يا حسن.

_ مقدرش يا حسن ، لوا حظ بقت روعي الي عايش بيها يا مرسال.

_ نفسي أتكلم معاها وأشوفها بحريتي
يامرسال.

_ ما أنت شفتها وسلمت عليها كمان؟

_سلمت عليه وأنا معتصم يامرسال
نفسى أسلم عليها وأنا حسن ، وأتحدث
معاها.

مرسال يبتسم

_ والي يخليك تقابلها.

_ إزاي .

_ مالکش دعوه ، أنا حتصرف وربنا
يستر.

ساخرا

_ مش عارف أخرتها أيه معاك .

ينهض مرسال من على الدكة .

_ أيه؟ رايح فين .

_ حشوف، يمكن أقدر أوصلها.

_ ولو حد شافك.

_ ماتقلقش ربنا موجود.

مرسال يخرج من غرفة المضيفه متسللاً على أطراف أقدامه.

١٢_ فرحة مُستيقظة من النوم.:

الإنسانية جميعها تتكون من ثلاث طبقات ، تحكمهم ثلاث سياسات، طبقة
عنوانهم العزة والحرية والشموخ وهؤلاء، لا ينفع معهم سوى طريقة واحدة لتسوسهم
بها، العطف اللين والإحسان وإياك والعند والعنف معهم
طبقة من خامة الأشرار والمنافقين ومُحبي العبودية ، وتسوسهم، بالعنف والغلظة والشدة،
وطبقة العامة وهي الغالبية من البشر وتسوسهم باللين حتى لا تمزقهم الشدة وبالشدة ، حتي
لا يبطرهم اللين.

يشعة ومريم مستقلقتان على دكتين ، مضمومتان على بعضهما البعض
مريم تحاول أن تنام ويشعة طار من عينيها النوم وبصرها معلق بالسما.

_ بت يامريم ، أنت لحقتي تنامي؟

_ أنا بحاول أغمض وأنام .

_ حتنامي بدري كده.

_ بدري أيه ياشعه، احنا في نص الليل.

_ مش جايلي نوم، قومي اتحدتي معاه

_ وعلشان مش جايلك نوم، تترفيني أنا

_ عاوزه أتحدث معاك، مش أنت اختي

حبييتي .

_ أنا لا اختك ولا أعرفك، سيبيني أنام بقي.

_ ويهون عليك تسيبيني لوحدي قلقانه.

تعتدل مريم

_ منك لله ، أديني ، قمت ، قلقانه ليه بقي.

_ الحيازه تلاقي معتصم أخذها وجعفر قبض

التمن.

_ طيب وهو أبوك والشيخ آدم راحوا لحسن ليه؟

_ يمكن مقدرش يعمل حاجه ولقي الموضوع كبير وفوق طاقته.

_ فيه حاجه ملخبطاني وعاوزه أفهمها؟

_ أنت عامله نفسك فيها أبو العريف

إعملي معروف نامي وخليني أنا؟

_ مش حرتاح ولا حنام غير لما أعرف

فيه أيه ؟

فيه ، واللي ملكيش فيه، اتخمني ونامي.

يشعه ساخره.

_ نامي وإشبعي نوم ياختي، أنت لا بتحبي

تتعبي ولا تفكري ومش بتشيلي هم حاجه.

_ خلي الهم ليك ياختي وسييني أنا.

.....

في قصر جعفر، مرسل يصعد السلم بهدوء، متحسناً جدرانه، الضوء

ضعيف، يصل أعلى السلم، وفي تلك اللحظة سمع صوت فتح باب، نام بسرعه على السلام

مراقباً الموقف، وجد جعفر بملابسه الداخلية

عبارة عن سديري وسروال كبير، مرسل في حالة رعب شديدة

لو اتجه جعفر لدرجات السلم لأمسك به، ولكن ساعدت الظروف مرسل

فقد ذهب جعفر نحو الزير ثم شرب ماء وعاد مرة أخرى لحجرتة.

تنفس مرسل الصعداء، ولملم نفسه من حالة الفزع والرعب التي

جعلته يلتصق بدرجات السلم، صعد درجات السلم وصل الدور الأول

تسلل على أطراف أصابعه مستنداً على الحائط، يقترب من حجرة

لواظ، في نفس اللحظة تخرج مصايب فتصطدم بمرسال، كادت

أن تصرخ، فكتم فمها بيده مرسل هامساً في اذنها.

_ ماتخافيش أنا خير ، عبد معتصم

واحنا ضيوفكم، كلميني بالراحه.

مصايب وهي في حالة رعشة وإرتباك.

– وأيه اللي جابك هنا.
– اللي جابني روح شريره جوه الدار
ده ومشقلبه حاله .
تبصق مصايب في صدرها.
– جوه الدار، الشر بره وبعيد.
– أيوه جوه الدار وهي روح
وحشه ، خلت البيت نكد وشر.
– وأنت عرفت الروح دي منين؟
– أنت متعرفيش إن معتصم الضيف
بتاعكم راجل مبارك، والأرواح كلها
مصاحباه وبيحس بيها .
– وانت جيت هنا ليه؟ ومالك ومال
الروح؟
– سيدي بعطني أدور عليها وقلي
إنها في أوضه هنا.
يشير لحجرة لواحظ.
في الأوضة دي .
مصايب تقتنع بكلام مرسال وتبدأ في الهدوء .
– تبقى الروح دي هي اللي منكدة على
الست لواحظ.
– تبقى الروح هي اللي غيرتها .
غيرتها إزاي ؟
– فيه روح واحد إسمه حسن دخلت
جوه حد هنا.
– أيوه دخلت جوه لواحظ، تقدرؤا تطردوها

_ خديني ليها علشان أشوف الروح
الوحشه دي.

_ تعالى معايه ،بس بالراحه، علشان
مايحسش بينا أبوها.

.....

القلوب متنوعه ، فيها قلوب كالجبل لاتهزها الأعاصير والرياح، بل تسقط عندما تصطدم
بها، وقلوب كالنخيل والأشجار أصلها ثابت
والريح تميل برؤس النخيل وفروع الأشجار، وقلوب كالريشة تحملها
الرياح والعواصف وترمي بها أحياناً وتعود لتحملها مرة أخرى.
لواظ مستلقية على فراشها تبكي، فقدت الإحساس بالحياة.

_ ياريت أموت وأرتاح من الغلب ده ياري.

أبويا لا فاهمني ولا فاهماه ، زي مكنش

بنته ، حتى الي إختاره قلبي، بيني ما بينه

جبال بتعلى وتعلى .

تطرق الباب مصايب وتدخل.

_ إنت رجعتي تاني ياخاله، مش قلتي

مروحه.

_فيه ضيف جاي يشوفك.

لواظ في دهشة وتعجب.

_ ضيف جاي ، لي أنا !مين ده؟

يدخل مرسال.

_ أنا خير جايلك في كل خير ياستي.

_ خير أيه ؟ وازاي تدخل اوضتي، اطلع بره.

مصايب

_ إسمعيه ياستي ، ده يبقى عبد

الضيف اللي عندنا وباين عليه

مبروك.

_ مش عاوزه أسمع حاجه، سيبوني

في حالي وروحي أنت ياخاله.

مرسال يقترب منها هامساً .

_ إسمعيني ، أنا جايلك من طرف حسن

_ حسن مين ؟ أنا معرفش حد بالإسم ده.

_ اتكلمي بالراحه اعلمي معروف، حتفضحيني

أنا عبد حسن اللي بعتيله منديل مع السلوتي

_ منديل أيه؟

_ مش حسن بعثلك منديل وكتبلك عليه

بدمه، ده عور نفسه عشان يكتبلك.

لواحظ يعود لها الهدوء ويتغير حالها من حزن لفرح وسعادة ، تلتفت

لمصايب

_ روعي هاتيلي اشرب ياخاله. ريقني ناشف.

تخرج مصايب

_ ودخلت هنا إزاي وحسن عامل أيه؟

_ اهدي ، حسن بخير، المهم الوليه

الي معاك دي، فاهمه،اني جاي بدور

على روح شريره هنا .

_ روح أيه ؟ كلمني عن حسن؟

_ اعلمي معروف ركزي معاي

عشان الوليه دي ماتشكش

حسن هنا في الدار؟

_ حسن في الدار؟

لواظ تقع على السرير مغمى عليها، مرسل يحاول إفاقتها .

_ إعملي معروف فوقي ، مش وقته

حتودينا في داهيه.

لواظ تفتح عينيها.

_ بتقول حسن هنا في الدار؟

_أيوه وإهدي، حتكشفيها.

تدخل مصايب حامله كوب الماء ، تجد لواظ في حالة غريبه.

_ مالك ياست لواظ؟

مرسل

_ مفيش هي حست بدوخه شويه.

الروح جامده عليها .

بدأت لواظ تفهم مرسل.

_ أيوه ياخاله، أنا دايله خالص.

_ خدي بُق ميه وأنت حتفوقي.

مرسل

_ نروح للراجل المبروك تحت.

لواظ.

_ مبروك مين ؟

مرسل ينظر لها بغيط ويجز على أسنانه ويخبرها هامساً

_ الرجل المبروك اللي هو حسن.

_ هو فين؟

_ هو يوم مش معدي، وحتفضحينا

يهمس لها في أذنها

_ حسن في أوضة الضيوف تحت

_ في اوضة الضيوف فين، فيها

الشريف معتصم.

_ياستي ابوس إيدك يالا ننزل.

_ طيب حنشوف حيعرف يعالجني ولا لا.

مرسال ينظر لها بغيط.

_ أخيراً فهمتي.

مصايب

_ ربنا يجعل على يده الشفا يابنتي.

يتسحب ثلاثتهم بهدوء، مرسال من الأمام وخلفه لواظ ثم مصايب

ينزلان درجات السلم بهدوء، يصلون باب غرفة المضيقة.

مرسال محدثاً مصايب.

_أنا وانت خلينا هنا ، عشان الراجل

المبروك يعرف يعالجها.

مصايب

يبقى أحسن ، أنا جتتي بتترعش من

سيرة العفاريات.

مرسال مستغلاً جهل مصايب

_ كلامك صح، وممكن يطلع منها

يلاقيك قدامه، يدخل فيك أنت.

مصايب تبصق في صدرها.

_ الشر بره وبعيد.

.....

جعفر يغالبه الأرق ، يقوم من فراشه ويرتدي جلبابه .

_ أروح أشوف الضيف نام ولا لسه صاحي

واجب أطمئن عليه.

يخرج جعفر من حجرته ، ينزل درجات السلم.

.....

مرسال ولوا حظ ومصايب أمام غرفة الضيافة، لوا حظ الخجل يقتلها

هي لم تتخيل تلك المفاجأة ولم تكن في حساباتها، مترددة في الدخول.

مرسال

_ ماتدخلي ياست لوا حظ.

لوا حظ تهمس في أذن مرسال .

_ أنا مش على بعضي، ومش مصدقه

نفسى.

مرسال

_ تلاقىك مكسوفه.

لوا حظ تشجع نفسها وتحدث نفسها.

_ إتشجعي يابت ، ده حسن اللي

إتمنيتي تشوفيه بشحمه ولحمه

قدامك.

يدخل جعفر ويجد الثلاثة ويتعجب من وقوفهم.

_ واقفين كده ليه؟

مرسال ولوا حظ يتبادلان النظرات وهما في حالة ذهول ، فلم يتوقعا

حضور جعفر

مصايب

_ مش فيه روح وحشه.

قبل أن تكمل مصايب كلامها قامت لوحظ بمحاولة إستدراك الموقف

_ أنا كنت فاكراك جوه يابا، وعارفه

أنك زعلان وواخذ على خاطرك مني

جيت علشان أصلح غلطتي، ندهت من

بره، طلعي الراجل ده، ولسه بقوله

فين أبويه ، أنت جيت.

عاد الهدوء لمرسال وعادت إليه أنفاسه التي تناثرت بقوة خارج فمه

جعفر

_ عين العقل الي عملتيه ده ، اول

مره يطلع منك حاجه كويسه

تعالى علشان تراضي الضيف

.....

أجمل الدموع ، دموع الحب، إن تلاقى مع من يمسخها، الكثير منا

يُفضل أن يحب برؤية وعقل ولكن القليل من يُفضل أن يحب بجنون

الحب يقهر الزمان ، يقهر الأيام، هو يخترق كل المعقول، له أجنحة

كثيرة لا تتوقف عن الطيران، العذاب قاسم مشترك في الحياة ، إن

أحببت تعذبت وإن لم تُحب أيضاً سوف تكون في عذاب ، وأصعب

عذاب في الحب ، أن تحب بلا أمل.

يدخل جعفر المضيفة وخلفه لوحظ ومرسال، حسن ينهض بشكل

لا إرادي ، يغلبه التوتر، يحاول أن يتماسك

جعفر

_ لوحظ بنتي جايه تراضيك ، علشان

ماتكنش واخذ على خاطرك.

حسن ولواظ يتبادلان النظرات في صمت ، غابا عن الحياة.
لواظ وهي تنظر إليه وتحدث نفسها.
_ هو ده حسن ، يامحلاه، ومحلى جماله
أهو قدامك يابت يالواظ ، ملي عنيك منه.
لواظ تتحدث مع حسن بلغة العيون.
_ نفسي أتكلم معاك يا حسن
وأقولك على كل اللي جوايا
حسن هو الآخر شطح بعيداً في الخيال.
_ أهى لواظ قدامك يا حسن، بشحمها
ولحمها ، ياما نفسي أضمها لصدري
ياترى سمعاني يالواظ وحاسه بيه.
لواظ وكأنها سمعت كلام حسن الذي يردده داخل أعماقه.
_ سمعاك يا حسن ، حاسه بدقات قلبك
اللي باينه في عنيك الحلوه ديه
حاسه بنفسك طاير وداخل جوايه
جعفر
_ أيه يابت يالواظ، مالك إتسمرتي كده
أدخلي سلمى على الشريف معتصم
تقترب لواظ من حسن وتمد يدها خلاف المرة السابقة التي
غطتها بشالها، تحسست يده وتحسس هو دفء يدها، تنظر
لعيني حسن وكأنها تقول له.
_ إيدك دافيه يا حسن ، دافيه قوي
نفسى أترمي في حضنك يا حسن
حسن يرد عليها

_ حاسس بحنان يدك يالوا حظ
حبك نار قايدة في قلبي
ينتبه حسن لنفسه ويخشى أن يلفت نظر جعفر.
_ إزيك ياست لوا حظ.
لوا حظ
_ أزيك أنت يا ...
كادت أن تتلعثم وتنطق حسن وتداركت الموقف.
_ إزيك يا شريف معتصم، إتشرفنا بيك.
لوا حظ تسحب يدها من يدي حسن وتلتفت لأبيها.
_ عاوز حازه مني يابا.
_ لا ، إطلعي أوضتك نامي.
تنظر لوا حظ لحسن وهي تبتسم
_ تقعدوا بالعافيه.
تخرج لوا حظ من الغرفة وهي في حالة نشوة وهيام، تجد مصايب
تقف امام الغرفة ، تحتضن مصايب بقوة.
_ أنا فرحانه ياخاله، فرحانه ياأحلي
مصايب في الدنيا.
_ ربنا يفرحك أكثر وأكثر يابنتي.
تُحدث مصايب نفسها .
_ يبقى الراجل ده مبروك وطرده
الروح الوحشه، وكمان عجبها.
لوا حظ تطير فوق درجات السلم وهي في فرحة طاغية وتتجه لحجرتها
وتفتح الباب وترمي بنفسها على الفراش.

.....

من يخشى البلبل لا يصطاد السمك ، هكذا هو حسن،هو لا يأمن الزمان فقد كره خيانتته،
يتحدي الألم بعيون من يحب، يخوض المعارك وهي الجالسة فوق كتفه، رؤية لواحظ أراحت
حسن وجعلته أشد تركيزاً وأكثر إقداماً، جعفر لا يزال مع حسن ومرسال في المضيفة ، شعر
بالراحة بعد تصرف لواحظ.

جعفر

_ أسيبكم تريحوا شوية والصباح

رباح.

_ إتفضل أنت ياعمي.

_ تقعدوا بالعافيه

_ الله يعافيك .

يخرج جعفر ويتنفس حسن بعمق ، لقد تمزق جدار الصمت وتحطمت
أهات الشوق بلقاء ساقه له القدر. قطع تفكير حسن، كلام مرسال.

_ أديد شُفت لواحظ ياعم حسن

المفروض تدعيلي، لولاي ماكنتش

شُفتها.

_ أنا مش مصدق نفسي يامرسال

أنا حاسس أني طاير من الفرحة

معقوله، لواحظ كانت قدام عيني

ويدها في يدي ، حاسس أني بحلم

يامرسال.

يتكأ على الوسادة ويُغمض عينيه وسبقه مرسال.

.....

الفرحة شقت طريقها لقلب لواحظ، تحطمت أمامها كل أشباح الليل
تري الليل بألوان فضفاضة لم تتعودها، وكأن الملائكة حبست الليل
والشياطين، وقفت الفرحة على عتبة قلبها، كل ما في الحجرة متجدد
ومتغير، جاءتها الفرحة وهي على وشك الإنهيار، مصايب لم تفارقها
وعزمت على البيات من أجل الضيوف، مصايب سعيدة لسعادة لواحظ.
_ عجبك ياست لواحظ.

_ زي القمر ياخاله ، طول بعرض
وهيبه، وعنيه حلوه ياخاله.
مصايب تتحدث مع نفسها
_ الظاهر أنه مبروك بجد، البت خفت.

.....

في كل إنسان بحر أعماقه سحيقه، لو أمكنك الغوص فيها لوجدت
الكثير. بشر أعماقهم مليئة بالدرر والألئ ، وأعماق بها حيتان
وأسمك القرش والأشواك ، اللزي وأخته منيرة من أصحاب
الأعماق الأخيرة، الأعماق المظلمة التي لاترى النور.
لاشئ أجمل من لحظات النقاء والهدوء، صوت العصافير الذي
يخرج في الأفق شيئاً فشيئاً مع نسيمات الصباح الندية ، اللزي
على مائدة الإفطار هو وأخته منيره، على المائدة بيض مقلي
ومسلوق وقطع من الجبن القريش وقصرية لبن رايب.
_ وديتي ليله فطارها.

_ أيوه ، المغدوره الي اسمها حليمه
دخلتها الفطار.

_ إبقى شوفيها محتاجه أيه هدوم
علشان أجيبها، ولا أقولك ،أبقى

أقولها أنا .

_ خلاص نويت تكتب عليها يوم

الخميس .

_ أيوه والحنه يوم الأربعاء.

منيره من غير نفس.

_ ربنا يتمملك بخير ويهديها عليك.

.....

لوا حظ تعيش حلم جميل، بخيال ممتع، تتمنى أن لا تستيقظ منه ،أو يتوقف الزمن ،لم
تشعر أنها تركض وراء سراب ، تجمع من بستان

الحب كل زهور الأمل،هي تكره ساعة الرحيل الآتية ، لامفر منها

تتمنى أن لاتنتهي سعادتها بعد رحيل حسن من الدار، صباح آخر

تشعر به لوا حظ، صباح تضحك فيه الحياة ويتلون كل الكون بألوان

وردية ، لوا حظ مع مصايب أمام الفرن ، مصايب تقوم بإخراج

الفطير المشلتت ، تتناوله لوا حظ وتضعه في سلة من الخوص

_ أنا عايزاك تعملي كل حاجه حلوه ياخاله.

_ حضرت له كل حاجه حلوه علشانك.

_ أيوه والنبي ياخاله ، حضري أحلى

حاجه.

تحدث نفسها

_ تلاقيه خويان يا حبة عيني.

_ حضرت قصرية اللبن وقصرية لبن رايب

وسلقت عشرين بيضه وقليت كمان عشرين

_ أيه دا كله ، دول نفرين وأبوكي.

_ ياكل اللي يقدر ياكله ياخاله.

.....

بعد كل ليل سرمدي يأتي نهار، وبعد كل ضباب أو سُحب داكنة
يأتي مطر يجلب الرزق والخير، كل إنسان يحصد ما يزرع فليكن
حصادنا في الخير، فبعد البكاء فرحة وبعد الشقاء سعادة ، ليكن
إيمانك بالله وبنفسك قوياً، داخل المضيفة حسن ومرسال.

_ حيبي الفطار إمتى؟

_ أنت بطنك لسه فيها مكان لفطار.

_ أنت عاوز الوكل اللي أكلناه عشيه

لسه فاضل في بطني، سيبيني أعوض

و أفش نفسي في الأكل، يا عالم

حناكل الأكل تاني امتى، أنا مطمئن

على الفطار ، تعرف ليه؟

_ ليه يحزين؟

_ علشان لواحظ اللي حتعمله.

_ يادي بطنك اللي موديانا في

داهية يامرسال.

_ ياسيدي أنت شبعان علشان

شُفت لواحظ، سيبيني أنا الغلبان

أشبع من الأكل.

يقطع حديثهم دخول جعفر.

_ نوم العافيه يامغتصم ياابني.

_ الله يعافيك ياعمي.

_ يارب تكونوا فمتوا كويس.

الحمد لله.

مرسال

_ إحننا مستنئين الفطار.

حسن ينظر له بغيظ.

يحاول أن يتدارك تسرعه.

_ أنا بقول نفطروا علشان نمشوا؟

جعفر

_ حالاً الفطار جاي.

ليله مثال للحب والطيبة والتلقائية ، هي إمراة لها شخصية ، تحاول أن تتمسك بخيوط الأمل في واقع جامد وكريه، يشتد التيار عليها وعاصفة اللزي قوية وكثيية، تتمنى أن تنتهي تلك الأحداث الموجهة وتصل لبر الأمان، الدوائر كثيرة في الحياة ولا تفرق بين البشر هي عادله لاتعرف غني من فقير، كما تدور عليها الآن ، سوف تدور عليهم في الغد، في حجرة ليله ، حلیمه ترفع بقايا الطعام من على المائدة وليله لا تزال جالسة أمام المائدة التي أفرغت حلیمه محتوياتها يدخل اللزي ويقترّب من ليله ، ينظر لحليمه نظرة أدركت أنها تحمل أمر من اللزي بالخروج من الغرفة، تخرج حلیمه.

اللزي ببرود وتجبر وتكبر.

_ عامله أيه ياليله؟

_ كويسه .

_ شوفي الي عاوزاه من هدوم ودهب

وكل طلباتك قولي عليها لمنيره علشان

اجيبها لك يا عروسه، يوم الأربعاء الحنه

ويوم الخميس كتب الكتاب.

ليله ساخره

_ عروسه ، عروسة أيه؟ عروسه

مغصوبه على أمرها، قولي أنت

مرتاح كده.

_ أيوه مرتاح ياليله، إن كان قلبك

إختار غيري وماليش عليه سلطان

لكن حبيقالى سلطان على كل حته

من جسمك.

_ مش حتطول اللي في دماغك يالزي.

_ ومين يقدر يمنعني ، ماتكونيش فاكهه

حسن ولا حمدان أخوك يقدروا يعملوا حاجه.

_ فيه ربنا اللي يقدر يعمل كل حاجه يالزي.

اللي ينظر لها بكبر وتعالى ويتركها لأحزانها ويخرج.

.....

كنا نحلم بحلم ، ونتخيل فارس للأحلام، ولكن في ظل إنسانية تائهة ومغيبية تبدلت الأحوال

واختفى فارس الأحلام ، ليأتي سارق الأحلام

رغم أن مدينة الأحلام شاسعة وواسعة وبلا حدود جغرافية ولا جوازات سفر أو تأشيرات

دخول، هم تسللوا لها بلا رقابة، إستغلوا عدم وجود حراسة، جمعوا كل أحلامنا وامتثلت

خزائنهم بأحلامنا ، وتركوا المدينة خاوية ، كلما زرنا فيها حلم سرقوه، في مضيضة جعفر ، مائدة

إفطار غير عادية أعدتها لواحد ، فطير مشلت غارق في السمن البلدي جبنة قريش، وعسل

أسود وبيض متنوع مابين مسلق ومقلي لبن ورايب ، مرسال يتناول فطاره بنهم ويدها تسبق

فمه الذي إمتلأ حتى وجد صعوبة في المضغ والبلع، حسن يهمس في أذن مرسال.

_ بالراحه يامرسال ،الوكل حيقف في زورك.

_ أنت نورت الدار يامعتصم يابني.

_ الدار منوره بحسك ياعمي .

_ ياريت تقدر تعتبر البيت بيتك.

ـ طبعاً ياعمي بيتي وحنبقوا أهل
وليه زيارة قريبه مخصوص.
كلام حسن أسعد جعفر وأدرك من كلامه أن الزياره القادمة لخطبة
لواظظ وأن معتصم حيحي مخصوص علشان لواظظ .
ـ البيت مفتوحلك في أي وقت يابني.
حسن
ـ قولي ياعمي، فيه عندكم شيخ هنا
إسمه الشيخ آدم .
ـ أيوه هو خطيب الجامع ، ماله يابني.
ـ الراجل ده كان كل اسبوع يطلع بلد
ويدي دروس في الكتاب، أنا اتعلمت
منه القراية والكتابه وضربني بعصاته
كثير.
ـ هو كبر دلوقت يابني ، وبقي عضمه
كبيرة يادوب بيخطب الجمعة بالعافيه
وماعدش نافع لكتاب.
ـ أنا لما أمشي من هنا ، حمُر أسلم
عليه وأبقى أبعت معايه حد لداره
ظهر الضيق وعدم الرضا من جعفر بعد الكلام عن الشيخ آدم
ولكنه لا يريد أن يتسبب في غضب معتصم ، ويحاول أن يرضيه
بسبب لواظظ.
ـ بيته عند الجميزه اللي ورا القريوس
حبعت معاك مهران يدلك عليه.
بس ماتتكلمش معاه في حاجه

_ ليه ياعمي؟

_ هو مش راضي ببيع الأرض ليك.

_ أنا حسلم عليه وحمشي، ماعنديش

وقت اتكلم واتحدث.

ظهرت بوادر الرضا على جعفر .

انتهوا اللحظة من تناول الطعام والشراب وقام مهران بإزالة آثار مخلفات الطعام وقام
بمسح المائدة، يهم حسن بالخروج ومعه مرسال

ويمشي معهم جعفر في الممر حتى باب القصر الكبير، اللزي وهارون

كانوا قادمين من أجل ضيفهم معتصم فوجدوه أمام باب الخروج

هارون

_ نورت الحاجر يا شريف معتصم.

_ البلد منوره بصحابها ياهارون.

اللزي

_ أنا تحت أمرك في أي حاجه تعوزها

وأي أنفار للزراعة.

_ تشكر ياسبع.

اثنان من الرجال أحدهما يمस्क بجواد حسن والآخر يمस्क بالناقَة

حسن لهم

_ تشكروا على كرم الضيافه

يلتفت لجعفر

_ الجمل مني ليك هديه يا جناب الشريف.

جعفر

_ وأنا قبلت الهديه ، اقبل مني كمان

أنت هديتي.

يأمر مهران

_ هات الفرسة السمراء.

يقوم مهران بإحضار السمراء لحسن وسط ذهول هارون واللي
فهذا الجواد من أفضل الخيول في بر المحروسة .

حسن

_ هديتك دي كبيرة يا عمي.

يركب حسن السمراء ويمتطي مرسال الجواد الآخر.

جعفر يأمر مهران بأن يذهب بهم لدار الشيخ آدم

يودعهم حسن وينطلق بصحبة مهران نحو دار الشيخ آدم وكأنه لا يعرفه، هارون واللي
في حالة فضول من زيارة الشيخ آدم.

هارون لجعفر

_ هو رايح يعمل أيه عند الشيخ آدم؟

جعفر

_ بيقولي ياسيدي انه هو اللي علمه

القراية والكتابه وهو صغير وراح يسلم عليه.

هارون

_ الراجل ده شهم ومن بيت أصول.

اللي

_ يستاهل الحيازه، ويستاهل كل خير.

هارون

_ أنت تعرف زمام أرضه كد أيه دلوقت

أكثر من الفين فدان.

اللي

_ يابوي ، كل ده.

لصوص الاحلام لا يكتفون، بسرقة الأحلام فقط، بل يحملون كل الفرحة وينثرون كل الهم والوجع في طُرقات مدن الأحلام، حتى الرغبة في الحلم من جديد يبنون لها ألف سور وسور، يقتلون كل حلم ولید في المهد، وصل حس لدار الشيخ آدم، مهران يطرق الباب وتفتح عزيزه _ فيه ايه يابني؟

مهران

_ الشريف معتصم جاي يقابل الشيخ آدم.

_ شريف مين يابني.

_ اللي إشتري الأرض.

حسن يود أن يتخلص من مهران.

_ تشكر يامهران تقدر ترجع أنت

مهران

_ جناب الملتزم قال أقعد معاك

_ قوله الشريف مشاني، روح

أنت.

_ طيب أحرصلك الخيل.

_ العبد خير حيحرصهم ، أنا حسلم وأمشي.

يغادر مهران المكان.

.....

الشيخ آدم ممسكا بكوب الشاي ويرتشف منه بصوت عالي مُزعج.
عزیزه تخبره بان واحد إسمه الشريف ع الباب.
_ شريف مين ياويله.
_ يقولوا الي اشتري الأرض.
_ الشريف معتصم ؟
_ أيوه هو،
_ أنت إتجنيتي ياويله، تلاقي حد بيضحك عليك .
_ لا ، كان معاه مهران غفير جعفر وهو الي قال عليه.
_ خيبه يكون كلامك صح ياويله
بس حيجيني ليه، خليه يدخل
ياعزيزة.
يدخل حسن ويتبادل التحية مع عزيزة التي ترحب به ويصل منتصف الدار حيث يجلس الشيخ أدام رافعاً قدميه على الدكة ويشرب الشاي
_ ازيك اشيخ آدم.
_ اهلاً أنت بقى الي أخذت الأرض.
_ أيوه .
_ وجايلي ليه، انت فاكر أن داري
تبع حيازة الأرض.
حسن يضحك ويقترّب منه هامساً
_ أنا حسن ياشيخ آدم ومفيش عندي وقت.
عاوز اتكم معك لوحدينا.
_ روعي ياعزيزة اعمليلنا شاي
_ وانت حتشرب شاي تاني.

أيوه حشرب ، هو أنا بشرب

في بيت أبوكي، ياللا غوري

تدخل عزيزه

_ أنت حسن ومين بقى الشريف.

_ أنا خطفت الشريف ولبست هدومه

ورحت مكانه لجعفر وأخذت منه

كل ورق الحيازة .

_ عفارم عليك يا حسن .

_ مش وقت مديح أنا حسيب

معاك كل ورق الحيازة ، وتشيلهم

في مكان أمين ، وماحدث يعرف

حاجه.

يناوله العقود

_ حشيلهم في صندوق العيلة

صندوق أثري يا حسن يا بني

بتاع جد جد جدي، من وقت

السلطان قطز.

_ كويس كده ياعمي، العقود

دي مستقبل أهل البلد وأمانه

عندك، حشوف معتصم لو ريحني

وإتفقت معاه على وضع يريح

أهل البلد حياخد ورق الحيازة

ولو مارضاش مش حنديه ورق

وماأتمناش كده، المشاكل حتكبر

_ ماشي يا حسن يا بني ،مش حيطلع غير ليك.

_ إستني خالتك عزيزه ، تحضرلك فطار
_ أنا فاطر عند جعفر ومتعشي وزهقت
من الوكل.
_ أه والمتعوس جعفر كان فاكرك
معتصم.
_ أه هو واللزي وهارون وكل الرجاله.
_ أنت اللي عملته فيهم قبل كده كوم
والعمله والمقلب ده لوحده كوم تاني
_ ربك هو الستار يامولانا.
ينهض حسن واقفاً ويخرج من الدار والشيخ آدم يدعو له بالسلامة
ركب جواده وإنطلق وخلفه مرسال ، عبروا الكوبري وإتجهوا في طريق
الجسر حتى وصلوا قرية الحرادنة وهناك عبروا الكوبري وإتجهوا نحو
الجبل وعادوا للدرب من أسفل الجبل.
.....
يجلس منازل وحمدان أمام الخيمة .منازع يلمح حسن وهو يقترب منهم.
_ حسن وصل بالسلامة .
_ الحمد لله ، أحسن قلبي حيقة مني
من القلق عليه.
يصل حسن ويتبادل معهم ومرسال الأحضان.
منازع
_ تسلم إيدك ياسبع .
_ إزيك يا منازل، عامل أيه؟
مرسال
_ أدينا رجعنا للجبل تاني والعيش
والجينة القديمة.

حمدان

_ من حقك ، ماأنت كنت هايص هناك.

_ اسكت ياحمدان، اكلت أكل ، ايش

محمر وايش مشمر ، أنا أكلت لسنه قدام.

حسن

_ متعتصم فين ؟

منازع

_ جوه هو ورجالته.

يدخل حسن الخيمة وخلفه منازع وحمدان ومرسال، السلوتي

يقفز من الأرض واقفاً فرحاً برؤية حسن ويقترّب منه ويحتضنه

ويتعلق به.

_ حسن ، حسن ، سلوتي بيحبك ياحسن.

يبكي السلوتي وحسن يمسح دموعه.

_ ماتبكيش ياسلوتي، تعالي اقعد جنبي.

يجلس السلوتي بجوار حسن ، معتصم ورجاله مقيدون وأعينهم

معصوبة ، حسن لمعتصم.

_ إزيك يامعتصم .

_ زي ماأنت شايف متكتف وذليل

والي ذلني قاطع طريق، مأستنضفوش

غفير عندي.

يغضب منازع ويقف ويهجم على معتصم لإهانته لحسن ولكن حسن

أمسك به.

_ بلاش يامنازع، هو ماقلش حاجه غلط

ومعاه حق.

يلتفت حسن لمعتصم.

_ قول كل اللي جواك يامعتصم.

_ أقول أيه ، سرقت كل حاجتي

واللي نفسك فيه أخذته، ومش

ناقص غير تخلص علينا ، وإحنا

قدامك أهو.

حسن

_ أنا مش عاوز منك حاجه وتقدر

تعتبر نفسك حر.

يلتفت حسن لمرسال

_ حل قيوده هو ورجالته وشيلوا

العصابات من على عنيهم .

منازع

_بتقول أيه ياحسن؟

_ اللي قُلته يامنازع

مرسال يقوم بحل كل الحبال وينزع من على أعينهم العصابات.

حسن

_ دلوقت أنت ورجالتك أحرار، تقدر

تتكلم وانت حر ،وادي البارود

يرمي حسن ببندقيته جانباً ويرمي أيضا ببندقية منازع ، في موقف أدهش معتصم ورجاله،

شافعي نهض وحاول أن يتجه إلى بندقيه

صرخ فيه معتصم.

_ اقعد ياشافعي مكانك، معندناش الغدر

زيهم.

يلتفت معتصم نحو حسن.

_ أنا مش فاهم حاجه، أنت عاوز أيه؟

حسن يقص لمعتصم كل الحكاية من وقت ماوصل البلد وظلم جعفر واللي وهارون ومحاولتهم طرد المقدس أرمنيوس، مروراً بمحاولة قتله وإعداد محاكمة ظالمة له، وحرقت دار الحمداني وقتل سديري حتى بيعهم الأرض لإذلال أهل البلد الذين يعانون الفقر والجوع

.....

الشيخ آدم كعاته جالساً على الدكة في منتصف الدار وممسكاً بسبحة ويقوم بالتسبيح، يسمع طرق على الباب، ينادي على ابنه شحاته.

_ واد ياشحاته ياابن عزيزه؟

يأتي شحاته مهرولاً.

_ أيوه يابا.

_ مش سامع الباب بيخبط .

_ والله ماسمعت يابا.

يتجه شحاته ويفتح الباب ويدخل أرمنيوس، يصطحبه شحاته لمنتصف الدار حيث يجلس الشيخ آدم.

_ خطوه عزيزه يامقدس.

_ ربنا يعز مقدارك ، عامل ايه ياشيخ آدم؟

_ ماشي الحال، حنعلوا أيه ؟، إحنا في هذه

البلدة مربوطين في ساقيه وجعفر واللي

بيسوقوا فينا.

_ وفي دورك ياشيخ آدم، في خُطب

الجمعة ودروس مابعد الصلاة.

_ شوف يامقدس، اللي بخطب فيهم نوعين من الناس، نوع قاعد يسمع ومش فاهم حاجه ولا داري بحاجه ، ومنهم اللي بينام ويستنى تخلص الخطبة.

_ والنوع الثاني؟

_ النوع الثاني بينافقوا ربنا ييجوا

يصلوا سُنّه ويسمعوا بضمير

ويصلوا على النبي وتلاقي الزبيبة

كد كده ويحسسوك بإيمان وتقوى

وبعد مايخرجوا، تلاقي الشيطان

نط عليهم، صحيح أنا مش شايفهم

بعيني ولكن بشوف كل الي في الجامع

بقلبي، دول بيفتكروا ربنا من الجمعة للجمعة

المهم كويس انك جيت عاوزك

في حاجه مهمه.

_ وأنا كمان عاوزك في حاجه مهمة.

_ تقول أنت الأول ، ولا أقول أنا؟

_ قول أنت ياشيخ آدم .

_ حسن كان عندي وسلمني كل ورق الحيازه.

_ معقول ياشيخ آدم ، وأخذها إزاي؟

_ خطف الشريف معتصم وراح لجعفر

على انه معتصم وأخذ الورق.

_ ياقلبك ياحسن، يحرصك الرب يابني

حاجات ولا في الحواديت.

_ أنت بقى عاوز تقول أيه؟

_اللي حيكتب على ليله يوم الخميس

الي جاي وانت عارف أنها مش موافقه

ولا أبوها الله يرحمه ولا أخوها موافقين.

_ آه يامقدس من ليله، هي خلصت على البلد والدور عليه.

— يعني أيه يا شيخ آدم ؟ والبت ذنبها أيه
— ما ذنبهاش حاجه ومشعلله الدنيا وهي
مش ماسكه ولعه، قدر ونصيب ، نقول أيه؟
— مش فاهم ! يعني حتكتب الكتاب؟
— أعوذ بالله أن يدي تكتب مايخالف كلام ربنا.
— اللزي حيضغط عليك ومش حيسيبك.
— الروح ملك للي خالقها، وأنا مش أقل
من حسن، بالعكس أنا رجل دين المفروض
أكون أقوى منه في الحق.

.....

داخل الخيمة انتهى حسن من حكايته لمعتصم .
— أدى الحكايه كلها يامعتصم ، أنا لو قاطع طريق
كنت أخذت كل الهدايه وأخذت ثمن الأرض اللي
رايح تشتريها.
— يعني المال والهدايا مع جعفر.
— أيوه وانا ماأخذتش غير ورق الحيازة.
هي اللي كانت تهمني ، علشان الناس
الغلابه وأنا مفيش بيني مايينك حاجه
وماقصدتش أضررك.
— عملتك سوده يا حسن ومهبيه بطين
ولكن حسامح علشان غرضها شريف.
مش عارف أقول أيه؟ أيه المطلوب مني
— انك تسبب أهل البلد يزرعوا في الأرض وتكرمهم ماتممش دمهم.

_ موافق يا حسن وحديهم نسبه من الريع
تخليهم يعيشوا مستورين ، فيه حاجه
تانيه .

_ الحيازه في الحفظ والصون ، وأنا
محقوقلك يامعتصم .
_ الأيام علمتني يا حسن أخذ من كل
بلد صاحب .

منازع
_ وأنا كفني على يدي، تقدر تاخذ
تار عيلتك مني.
معتصم ينظر إلى منازع مبتسماً
_ عشان حسن عفينا عنك ولما أرجع
لعيلتي ليه كلام معاهم.

حسن
_ أنت دلوقت حر، عاوز تمشي اتفضل
ولا تبقى ضيفي الليله.
_ غالي والطلب رخيص ، حبعت شافعي
ليهم البلد يطمنهم علشان مايقلقوش عليه.
_ معلش ضيافتنا على كد الحال.
_ كرمك في أخلاقك ورجولتك يا حسن.

١٣ _ البكاء:

هو اللغة الأصعب للقلب والأكثر واقعية وصدق ، هو الوجد الذي يفيض
مرأً، هو اللغة التي تُخرص الكلام ويقف أمامها منحنياً ، مكسوراً، ليلة
توقف لسانها عن الكلام وكيف تتكلم بلغتين مختلفتين ، لغة الكلام ولغة
البكاء، تمسح دموعها وتحاول أن تتوقف عن البكاء حتى تترك فرصة
للکلام، هي في حجرتها مع حليمه، في حداد قلبي.

_ خلاص يا حليمه، الحنه بعد بكرة

والحميس بيقرّب.

_ سلمى أمرك لربنا والي

في علمه يكون.

_ تفتكري حمدان أخويا وحسن

عرفوا بيوم كتب كتاي.

_ حتى لو عارفين، حيقدرنا يعملوا

أيه، أكيد اللزي عامل حسابه كويس.

_ يبقى الموت أهون أنه يقرب مني.

_ أنت إتجنيتي في عقلك ياليله، أعملي

زي لواظ.

_ ولواظ عملت أيه؟

_ أمي بتقول عجبها الي إسمه معتصم

الي اشترى الأرض، وبتقول كانت

طايره بيه من الفرحة.

_ أنت بتقولي أيه؟

_ أمي والله الي بتقول.

.....

منيرة في وسط الدار تتجه نحو الطلمبة، تسترق السمع ويصل إلى
مسامعها صوت ليله وحليمه ولكن لا تفهم شيئاً تترك الصفيحة بجوار
الطلمبه وتتسحب بهدو حتي تلتصق أذنها باب حجرة ليله.
صوت ليله.

_ وحسن خلاص نستنه لواحظ.

صوت حلیمه

_ بتقولي أمي ، بطلت تجيب سيرته.

_ يعني عجبها معتصم وباعت حسن؟

_ أيوه ، بتقولي أمي فرحانه قوي بيه

وبتشكر في جماله وطوله وعرضه.

_ إخص عليك يالواحظ، وعيني عليك

ياحسن ، ماتستاهلش حسن.

_ علشان كده أنت عاوزاني أنسى

سديري ، لواحظ إن كانت نسيت

حسن وعجبها معتصم ، يبقى ماحبتش

حسن ، لكن أنا غيرها ، رجالة الدنيا

كلها ماتنسنيش سديري.

_ وأنا بقولك حاولي تنسيه، وتمشي

أمورك مع اللزي.

_ هو اللزي ده فيه واحد تطيق

تعيش معاه.

منيرة في حالة غيظ من كلام ليله .

_ بقى أخويا سبع الحاجر، مفيش واحد

تطيق تعيش معاه، طيب يابنت الحمداني.

تتجه منيره لغرفة اللزي وتطرق الباب ويسمح لها اللزي بالدخول

_ خير يامنيره! فيه حاجه؟
_ لا مفيش ياخيي كنت رايحه على
الظلمه ، سمعت كلام ماعجبنيش
مارضتش أدخل أرد عليه تزعل مني.
_ كلام أيه يامنيره؟
_ سمعت ليله بتقول لحليمه هو فيه
واحد ، تطيق تعيش مع اللزي .
_ وقالت أيه تاني؟
_ هي بس الكلمه دي وباقي الكلام
عن لواحظ.
_ وبيقولوا أيه عن لواحظ؟
_ البت حلیمه بتقول لواحظ عجبها
معتصم وليله زعلت علشان حسن.
_ كويس أن لواحظ عملت كده، ولمت
فضيحتها مع حسن.
_ وكلامها عنك ، حتسكت عليه.
_ حسابها جاي ماتقلقيش.

.....

حسن يحاول أن يرسم إبتسامة من قهر، ويسرق الفرحة من بين ثنايا
السعادة، هو مرهق من ركض الأيام، يُخفي إبتسامته خلف تجاعيد
الوجع، لن يسمح بأن تكون الحياة سجنًا لأنفاسه، حسن أسفل الجبل
في وداع معتصم ورجاله. يقف بجوار حسن منازع وحمدان ومرسال.

معتصم

_ ماتسيبك من الجبل وتيجوا تعيشوا
وسطينا وييقالك دار يا حسن.

_ وأهل البلد الغلابة دول أسيبهم
لمين ، ومقدرش أقف قدامهم من
عندك حجييلك مشاكل أنت وعيلتك
وبعدين فيه حكم عليه بالإعدام
_ إن كان على الحكم ، أجيب القاضي
ونعيد المحاكمة.

_ لما يجي وقتها حبقى أقولك ، المهم
أنا عاوز منك حاجه، تروح لجعفر
وتطلب منه التمن بتاع الحيازه ،
أو يجييلك الحيازه.

منازع

_ حيقوله وأنا مالي ، أنت جيت
ودفعت وأخذت الحيازه .

حسن

_ وقتها معتصم يحكي الي حصل كله.

حمدان

_ وقتها حيقوله أنت إتقطع عليك الطريق.

حسن

_ حيقول الي قطع عليه الطريق معروفش
وهو ماكنش قاصدي ، وهو كان قاصد
الحيازة ، ولو كان قاصدي كان سرق المال.

منازع

_ جعفر مش حيوافق ولا حيرجع حاجه.

معتصم

_ يبقى فتح على نفسه نار جهنم وحنقوا

في بعض وهو مش كدينا ومعدوش عزوه

وأهل البلد مش حيسانوده.

منازع

_ ولو سألته حسن سابق ليه؟

_ يقول هربت منهم وأنه له تار

معانا ومش حيسيينا.

حمدان

_ مش فاهم حاجه وليه بتكشف كل حاجه

وكمان فيها ضرر للواظ.

حسن

_ عارف فيها ضرر للواظ، بس هي

ملهاش ذنب ، أبوها اللي إستقبلني

وبعدين فيه الأهم ، أنا قصدت كده

علشان حساوم بورق الحيازه اللي

معايه، على البراءة من حكم الإعدام

ومصلحة البلد.

معتصم يبتسم.

_ عرفت دلوقت أنت ليه ماسلمتنيش

الحيازه وعاوز تلعب بيهم.

_ هو ده اللي حنعملوه مع بعض.

يودع معتصم حسن وينطلق برجاله .

١٤_ حياة بعد موت:

لواظ عادت إليها الإبتسامة من فوق كف المستحيل، تفتح عينيها
للهواء والنور وجمال كل شئ، تحتضن عروقتها المفتوحة ، قلبها أصبح
ريشه ترسم على الهواء ، وتلون النسمات، تبتسم بعد وجع وتضحك بعد حزن ، تنطلق في
حديقة القصر بروح جديدة وليدة بعد رؤيتها لحسن
تمسك بفرع شجرة ليمون وتتذكر لحظة رؤيتها لحسن، لا تنسى تلك اللحظة ، توقفت كل
الذاكرة عندها.

جعفر

_أيه يابت يالواظ، مالك إتسمرتي كده

أدخلي سلمى على الشريف معتصم

تقترب لواظ من حسن وقد يدها خلاف المرة السابقة التي
غطتها بشالها، تحسست يده وتحسس هو دفء يدها، تنظر
لعيني حسن وكأنها تقول له.

_ إيدك دافيه يا حسن ، دافيه قوي

نفسى أترمي في حضنك يا حسن

حسن يرد عليها

_ حاسس بحنان يدك يالواظ

حبك نار قايدة في قلبي

ينتبه حسن لنفسه ويخشى أن يلفت نظر جعفر.

_ إزيك ياست لواظ.

لواظ

_ إزيك أنت يا ...

كادت أن تتلعثم وتنطق حسن وتداركت الموقف.

_ إزيك يا شريف معتصم، إتشرفنا بيك.

تعود من خيالها السارح بعيداً تحدث نفسها .

١٥_ قلب وروح:

الدنيا لا تحتاج منا سوى قلب وروح يمران بها في طمأنينة وسلام
فيوم الرحيل من الدنيا ترحل كل الأشياء ولا يتبقى سوى عملك.
الرحيل بطمأنينة وسلام ، يمنح إسمك الحياة بعد الموت،يكون
عليك من الأعماق لا على حسب العادات والتقاليد،منازع أمام منزل
اللزي ، يقف أمام الغفير طلب.بسخرية

_ اللزي جوه يافقر البين ؟

_ أيوه جوه، لسه ماطلعش من الدار.

_ أدخل قول له أني عاوزه،

_ فراننه (بسرعه) ياسبع، مش حعوق عليك.

.....

اللزي يتجه نحو الباب وخلفه طلب، يفتح الباب يجد منازع.

_ إزيك يامنازع، عاش من شافك.

_ اسكت يالزي ياخوي، الواد ده

زي ماقلت عليه ، جن مصور

كل ماأحس أنه بقى في إيدي

وقدام عين، أمسك الباروده

ألاقيه فص ملح وداب، حتجنن.

_ أنا قلت لك أوعي تستهين بالواد

ده ، قعدت تتمقيط (تسخر) عليه .

_ ده ولد حويط قوي.

_ تعالى نتمشى شويه ، عشان الواحد

طهقان ومش طابق نفسي.

_ خير ؟ فيه حد مضايقك؟

_ حقولك وإحنا ماشيين.

لتكن كلماتك عطراً يفوح شذاه فيعطر من حولك، واجعل قلبك حقيبة
لهموم من حولك، وهمساتك وكلماتك الطيبة يد حانية تمسح دموعهم
حسن وحمدان أسفل الجبل.

حمدان

_ خلصنا من الحيازه.

_ يبقى باقي لنا ليله.

_ كويس أنك فاكرو.

_ إخص عليك يا حمدان ومن ميتي

قطعت وعد وخليت بيه، وبعدين

ليله بعترها اختي زي ماهي اختك.

_ الحنه بتاعتها بكره يا حسن.

_ ماتقلقش يا حمدان ، إن شاء الله

ربنا يكرمنا ونخلصها، أول ما يرجع

منازع ونعرف الأخبار ، نفكروا في

طريقه نخلصها بيها.

.....

ليل حالك السواد.

هم إعتادوا غرس الشوك في في الجسد، وغرس الأنياب في القلوب

يضحكون وتركوا لغيرهم كل البكاء ومع ذلك ، القدر يسقيهم بمرارة

وكأنه ينتقم للخير، عشق اللذي لليله التي لاتحبه إنكسار، يحاول

أن أن يغرس مخالفه في فم القدر، اللذي يسير مع منازع على طريق

الجسر محاولاً الخروج من حالة الهواجس التي تحيط به.

منازع

_ يعني جعفر فرحان ببيع الحيازه.

_أيوه فرحان قوي.

_معقول واحد يملك الأرض دي

كلها ويفرح في بيعها.

_ جعفر مش زينا بيتمسك بالأرض

جعفر أصله تركي ولاتعنيه، سيبنا

من جعفر ونتكلم في الموضوع

اللي عاوزك فيه.

_ رقبتي سدا ده ياسبع الحاجر.

_ أنت عارف إن الحنه بكره

وكتب الكتاب بعد بكره.

_ حنة مين ؟ وكتب كتاب مين ؟

_ لحقت تنسى ، حنة ليله وكتب

كتابي عليها يوم الخميس، منا

قولتلك قبل كده، عاوزك تكون

موجودمعايه، وكمان تبات في الدار.

_وليه ده كله.

_ كلام بيني ما بينك، خايف الواد حسن

وأخوها حمدان يعملوا مشاكل

ورجالتي ممكن ما يعرفوش يتعاملوا

معاهم.

_ ماشي، أنا ليها ياسبع، وياريت يهوب

عشان أقطع رقبته.

منازع يبتسم ويحدث نفسه.

_ جاتلك على الطبطابة (جاهزة) يا حسن.

_ يعني اتكل عليك في موضوع حسن.

_ أنت خليك في فرحك وسيب الرجاله

وكل حاجه عليه، وأنا حعمله كمين

مايخرش الميه، لكن أنت متأكد أنه

جاي.

_ حتى لو ماجاش، لازم أكون عامل

حسابي، الواد ده مش ساهل، وعارف

بيعمل أيه كويس.

_ ماتقلقش خالص .

_ ماأنت قلت كده كتير والواد

قدامك في الدرب وماعملتش حاجه.

_ ياسيدي ، ده بيحس بدبة النمله ومَعَفَرَت.

_ بلاش سيرته الوحشه، تعالى معايه نوصلوا

الشيخ آدم.

_ الوقت ليل .

_ نصحيه.

_ لا أنا أروح أرتب أموري عشان

ليلة الحنه، وبعدين مابحبش الراجل

ده لسانه طويل.

_ خلاص أنت شوف أمورك وأنا

حعدي عليه.

١٦_ الكابوس:

منايع الأذى كثيرة في الحياة ، الشر، الكراهية ، العصبية، الحسد.
كل إنسان يتعامل ويقاوم تلك المنايع بطريقته الخاصة، هناك من يقاوم
بالإنتقام ، وهناك من يقاوم بالصمت والصبر، وهناك من يقاومها بالضحكة وخفة الدم،
أقوى الأسلحة لتجفيف مناع الإذي، هي الحب
النقاء، الطهارة، الكلمة الطيبة، الشيخ آدم نائم على النومة هو وزجته
عزيزه وإبنه شحاته، النومة هو مبني مستطيل إرتفاعه حوالي متر وربع المتر مبني
بالطوب اللبنى ، محاط بسور صغير لا يتعدى ربع
المتر، لها درجات سلم للصعود إليها، بإختصار هي سرير كبير مبني
بالطوب اللبنى، الشخ آدم وأهل بيته ليسوا من هواة السهر فغالباً بعد
صلاة العشاء ، يستسلم الجميع للنوم، طرق غير عادي على الباب
يقوم الشيخ آدم من نومه فزعاً.
_ ياساثر ، مين اللي بيخبط الساعة دي.
يضرب بكوعه عزيزه بجواره محاولاً إيقاظها.
_ قومي ياعزيزه شوفي مين؟
عزيزة يغالبها النعاس وتتخاذل في القيام .
_ قوم أنت مش قادره.
_قومي سنديني الله ماتوعي تشوفي.
الطرق يزداد على الباب.
_ مين اللي بيخبط كده؟
الشيخ آدم يتحسس الحذاء، يلبسه، ويتحسس مكان النزول من
على النومة، يمسك بعصاه، يعتمد على حواسه في السير
حتى وصل الباب.
_ طيب ياللي بتخبط.
يفتح الباب ويدخل اللزي .

- _ إزيك يامولانا.
- _ اللزي مش كده؟
- _ أيوه هو اللزي.
- _ ماهو المرزبة الي بتضرب الباب
- لازم تكون يد اللزي، خير ياسبع
- البرمبه.
- _ طيب قولي اتفضل.
- _ تعالى، بس دارنا حتليق بيك.
- الدكك الي عندنا بتقع بالي
- حيقعد عليها.
- _ خلاص حقعد على الأرض على الحصير.
- _ الحصير بتاعتنا بتشوك وتعور.
- يجلس اللزي علالدكة ، هو يدرك أن الشيخ آدم غير راغب في تلك
- الزيارة ويحاول تطفيشه.
- اللزي ببرود
- _ مش حطول عليك يامولانا.
- _ يكون أحسن برضوا ، ولو مااتكلمتش
- وتاخذ بعضك ومشي يكون أحسن.
- _ قولتلك حقول كلمتين وأمشي
- إن شاء الله وعقبال ماتفرح بشحاته
- أنا عاوزك في كتب كتابي.
- _ أنت نويت تتزوج.
- _ أيوه.
- _ ومين دي الي بلاها ربنا بيك

قصدي كرمها بـيك.
_ ماأنت عارفها ، تبقى ليله بنت
الحمداني.
_ يادي ليله وسنينها اللي مابتطلعش
فيها شمس ، وهي على كده موافقه
بعد ماشردتها هي وأهلها.
_ وموافقتها تهمك في أيه؟
_ تهمني علشان شرع ربنا والزواج
إيجاب وقبول.
_ إعتبرها قبلت.
_ أعتبرها إزاي ، لازم أخذ رأيها.
_ بقولك إعتبرها وافقت.
_ وأنا والله مش حخالف شرع ربنا
عشانك والشرع مافيهوش اللزي
لازم أسألها.
اللزي ينهض واقفاً ويهم بالخروج.
_ يوم الخميس الرجاله حييجوا ياخدوك
من الجامع، بعد صلاة العشا.
_ بتهددني يالزي.
_ إعتبرني بديك فرصه تفكر.
يفتح الباب
_ ابقى فكر كويس ، السلام عليكم.
_ الله مايسلمك أبداً يابعيد، وماتوعى
تفرح ، لا دنيا ولاآخره.

١٧_ المفاجأة:

إحذر أن يعلمك البعض الكراهية وحب الإنتقام، حتى تُصبح صورة طبق الأصل منهم، ولن تستطيع العودة وقتها سوف تفشل وقتها سوف تكتشف موت الضمير فيك، تحسس خلايا قلبك كل يوم ولا تترك عليها ذرات تراب، عندما تجد منابع للقبح ، اهجرها وابحث عن الأخلاق، القيم والجمال، يصل معتصم قصر جعفر هو وشافعي وأحد الرجال، يدخل بحصانه حيث يقف الغفير مهران.

_ معتصم لمهران

_ فين الملتزم جعفر؟

_ قل له فيه ضيف جاي يقابلك.

_ ا قوله مين؟

_ قل له الشريف معتصم.

يظهر الإرتباك على مهران والحيرة ، هو قد رأي معتصم قبل ذلك يحدث نفسه.

_ معتصم ده غير معتصم الثاني

يمكن يكون هو، يخرب بيت

البوظه اللي لحست مخك يامهران.

معتصم يعنفه ، أدرك أنه يقارن بينه وبين حسن.

_حتفضل واقف كتير كده؟

مهران وهو في حالة توتر وإرتباك.

_لا.. أنا داخل اهو، خلاص داخل.

يدخل مهران لداخل ممر القصر وهو مرتبك.

.....

داخل المضيفة، يجلس جعفر واللزي وهارون، لن تضيع الحقيقة في
زحام الشر، الحق أقوى من الباطل ولو قل، هم إعتادوا غلق قلوبهم
وأذانهم وعقولهم أمام الحق، وعندما يفوقون من غفوتهم لا يتحملون
الحقيقة.

هارون للزي.

_ هي ليله تعرف إن أبوها مات؟
_ لحد دلوقت ماتعرفش حاجه.
_ طيب إتجوز بسرعه أحسن تعرف.
يضحك جعفر ومعه هارون ، يدخل مهران.

هارون

_ فيه حاجه ياواد يامهران؟
_ أيوه ، الشريف معتصم بره.
جعفر يتعجب من رجوع معتصم بهذه السرعه .حدث نفسه.
_ يبقى جاي يقرأ فاتحة لواحظ.

هارون

_ خليه يتفضل.
خارج باب القصر يفتح مهران الباب. ليأذن لهم بالدخول.
_ اتفضلوا .
_ ينزل معتصم من على جواده ، وشافعي ينزل من على الجواد الآخر
ويتبقى رجل لحراسة الخيل ويدخل معتصم ومعه شافعي.

.....

داخل المضيفة جعفر واللي وهارون في إنتظار معتصم ، يدخل مهران
وهو يرحب بمعتصم، السعادة تغمر جعفر واللي وجعفر ينتظران، دخل
معتصم وخلفه شافعي، المفاجأة هزت الجميع، دهشة وحيرة وقلق وذهول ، لم ينتظر
معتصم طويلاً.

_ مين فيكم جعفر؟

جعفر

_ أنا جعفر.

_ وأنا معتصم الي جه علشان يشتري الأرض.

هارون

_ معتصم جه أخذ ورق الحيازة واشترى الأرض.

معتصم

_ وأنا اشتريتها إزاي، أنا لسه داخل عندكم.

اللي

_ وبعدين بقى، معتصم كان هنا واشترى الأرض.

أنت مين؟

شافعي

_ ده الشريف معتصم ياللي وانا جيتلكم

مرسال منه قبل كده.

اللي

_ أيوه أنت جيت قبل كده .

شافعي

_ وده الشريف معتصم.

هارون

_ ومين الي كان هنا من يومين واشترى الأرض.

اللزي

_ وكمآن دفع تمنها.

معتصم

_ بيقى الي هو الي خطفنا وقطع عليه الطريق.

هارون

_ مين خطفك وقطع عليك الطريق، مش فاهمين

حاجه.

_ واحد إسمه حسن.

جعفر بدهشة.

_ إسمه أيه؟

_ حسن.

جعفر يُغمى عليه ، إلتف حوله اللزي وهارون محاولين إفاقتة، جعفر في غيبوبة كاملة ولا يتحرك، هارون يلتفت نحو معتصم.

_ ياريت يا جناب الشريف تيجي في وقت تاني

أنت شايف حالة الملتزم جعفر.

معتصم

_ ماشي إسبوع وأجي أخذ مالي أو الحيازه

وما أسمعش كلام تاني في أي حاجه

مش مستاهله نقعوا في بعض.

_ ماشي يا جناب الشريف، يقوم بس جناب

الملتزم بالسلامه ويحلها حلال.

معتصم

_ ماشي .

يخرج معتصم وخلفه شافعي متظاهراً بالغضب يسير في الممر
حتى يصل الباب الخارجي ، يركب جواده وينطلق خلفه شافعي

والرجل الذي كان يحرس الخيول، مهران الغفير في حالة ذهول

_ هو فيه أيه؟ دا مالحقش يقعد

الدنيا مغبره كده ليه؟

لا تبتئس من المآساة، ولاتنظر للوجه القبيح لكل مصيبة كما ينظر الآخرون، لكل مصيبة وجه آخر مخفي ، ووجه مشرق لا تدركه

الأبصار ولكن تدركه القلوب القوية التي تصنع من شراب اليمون

مشروباً حلو المذاق، طريق الراحة يحتاج السير على الجمر وعلى

الشوك والمشقة والتعب، لا تقابل مواجهة الصعاب بالعويل والبكاء

والتحسر، بل قابلهما بالصبر والإصرار على الإنتصار والثبات.

أمام الخيمة في الجبل يجلس حسن و ومرسال وحمدان .

حمدان

_ نفسي أشوف شكل جعفر عامل

أيه دلوقت.

حمدان

_ مش بعيد يطب ساكت فيها .

حسن

_ الخوف بس على لواحظ.

مرسال

_ وهي ذنبها أيه ؟ مش هو اللي جابها

لحد عندك.

حسن

_أيوه ، كان جاييها لمعتصم مش حسن.

حمدان

_ كده حيخبطوا في بعض ، لو مارجعش

المال ولا الحيازه لمعتصم ، حيقعوا في بعض.

مرسال

_ ياريت.

حسن

_ معتصم واقف الوقف ده علشاني

هو ضامن الحيازه في يده ولكن

بيلاعبهم زي ماطلبت منه وحيجوا

لحد عندي ، وجعفر مش غبي

علشان يوصلها لمعرکه بينهم.

حسن

_ خلونا في موضوع ليله دلوقت

النهاردة الحنه ولازم نخلصها

يدخل منازع

حسن.

_ جيت في وقتك يامنازع، لسه

كنا بنفكروا نخلص ليله إزاي.

منازع يمزح

_ الي حيقرب ناحية دار اللزي

أنا الي حقف له.

حمدان يغضب

_ أنت بتقول أيه يامنازع؟

_ بقول الي حيقرب للدار

أنا الي حقف له.

مرسال

_ أنت باين عليك إتجنيت.

منازع

_ علشان أنا اللي حارس دار اللزي
الليله.

حسن يضحك أدرك مزاح منازع.

حمدان

_ مش فاهم حاجه؟

حسن

_ أفهمك يا حمدان، منازع عاوز

يقول إن ربنا سهلها وأنه هو

اللي بيحرس دار اللزي.

منازع

_ عليك نور يا كبير.

ينظر لمرسال وحمدان.

_ شايفين الناس اللي بتفهمها وهي طايره.

حسن

_ فهمني اللي حصل بالراحه.

_ اللزي طلب مني أكون معاه

اليومين دول ،يوم الحنه وكتب

الكتاب، خايف منك يا حسن

وعاوز يعمل حسابه.

حسن

_ كده ربنا سهلها علينا شويه.

وجودك داخل الدار حيسهل

دخولنا .

منازع

دخولكم فيه خطر عليكم ومش
مستاهله دخولكم.

حمدان

_ عاوز تقول أيه؟

_ أنتوا تنزلو من هنا بعد نص الليل

يكونوا ناموا ، أنا حدخل حوش

البهايم وأنقب الحيطه واخد ليله

أطلع بيها.

حسن

_ عفارم عليك يامنازع ، سهلتها عليه

ورichtني.

حمدان مازحاً

_ قتال قُتله ياعم، ومعلم كبير.

ليلة أرهقتها الجروح ، تنادي الأمل فلا يستجيب، الجرح لا يندثر تحت وطأة الوجد، لم
تجد ما تأخذه من حنايا قلب مُثقل بالكروب واليأس حتى حبة الحب مدفونة في أرض لا تنبت،
تبحث عنها لتنثرها على أنحاء جسدها فلا تجدها، منيره لا تكف عن مناغصة حياتها والكيد

لها ومحاولة الشماتة الدائمة لحالها ، دخلت على ليله في غرفتها التي تجلس بها حزينة
وحليمه تحاول أن تُخفف عنها، منيرة تسخرمنها. _ أيه ياعروسه ، مالك ؟ باين عليك

مش فرحانه! ده شكل واحده حنتها النهاردة ودخلتها بكره!

_ قصدك تقولي خرجتها، أنت جايه

تشمتي وتمقيطي عليه ، فاهماك

يامنيره، ماشي أنا قبلت عزاك فيه

وعلى العموم أنا أحسن من اللي قاعده

زي البيت الوقف.

منيره بغضب

_ إخص عليك ،ينقطع لسانك ، أنا لو

حقول يا جواز ، حاخذ سيد سيدك.

_ أيوه ، أصلي مش من هنا وحتضحكي

عليه بكلمتين ، والرجاله واقفه لأخوك

طابور على الباب ، خليني ساكته

وسيبيني في حالي وخلي الطابق مستور.

_ أيوه ماهي العايبه تلهيك والي فيها تجيبه فيك.

تهجم منيره على ليله محاولة ضربها وتشدها من شعرها، تشتبك

معها ليله وتشدها هي الآخري من شعرها . حلیمه تحاول فض

الإشتباك بينهما ، تقف بينهما.

حلیمه

_ أيه ده ! والنبي عيب عليكم .

منيره تخرج من الحجرة غاضبة وهي تصب اللعنات على ليله.وتهددها.

_ طيب ياليله يابنت أبوزريه (دارمن الخوص)

والله ما حسيبك.

١٨_ الحب:

إن أردت الحب، فتش عنه داخلك ، قبل أن تبحث عنه لدى الآخرين ولا تكن فاقده ،
حتي تستطيع أن تعطيه، فعدم وجود مساحة للحب داخلك ، لن تجد مكاناً تستقبل فيه حب
الآخرين ، وإن لم تجده داخلك إبحث عن نواة الحب وإغرسها في القلب حتى تنبت ، ثم تُثمر،
حجرة نوم جعفر، لا يزال في غيبوبته والحكيم سمعان يكشف عليه ويقف اللزي وهارون في
حالة ترقب، بينما لوحظ ومصابب تقفان على باب الغرفة من الخارج، ينتهي الحكيم سمعان
من الكشف.

هارون

_ أيه يا حكيم سمعان ، حالته أيه.

_ ممكن يكون عنده الضغط واطي

وربنا يستر ماتكنش جلطة، عنده

هبوط جامد.

اللزي ساخراً

_ هبوط ، الهبوط جالنا كلنا.

هارون

_ مفيش وقت للكلام ده يالزي.

سمعان

_ عاوز حد من أهل الدار أقوله على العلاج.

هارون

_ لوحظ بنته واقفه بره، تعالى نقولها.

لواظ خارج الحجرة في حالة قلق على أبيها، تقف بجانبها مصايب

_ أبويه ماله يا حكيم.

سمعان

_ حيكون بخير بس حتعملي اللي

حقولك عليه.

_ قول أنا معاك.

تجيبى ثلاث معالج شعير وتسحقيم وتحطيههم في كوب ميه وتسيبيهم احنا دلوقت الضهر ،
لحد العصر وتسقيه منهم ثلاث معالق ،ولو فيه كمان شمندر قطعيه ودقيه وابقي شربه منه
ثلاث مرات، لكن دلوقت تجيبى كوباية لبن مغلية وتحطي فيها صفار بيض ومعلقة عسل
وتقليبيهم وتشربه الكوبايه دلوقت لو مفيش جلطة حيفوق بعد شويه.

يخرج الحكيم سمعان ويدخل اللزي وهارون غرفة نوم جعفر ولواظ اتجهت لتحضير
شراب صفار البيض بالعسل واللبن وسرعان ما عادت بالشراب ، وبدأت تعطي الشراب لأبيها
بالمعلقة ، قبل أن ينتهي كوب اللبن ، بدأ جعفر يتحرك ، بدأ يفتح عينيه وما إن راي لواظ
بجواره ، تسقيه من كوب اللبن، حتى صرخ بهستيريا وجنون وهو ينظر للواظ.

_ أنت ، إبعدي عني، إبعدي ياسبب

كل المصايب.

بصوت عالي يصرخ

_ غوري من قدامي يابت

الكلب، دخلتك لعشيقك بيدي

غوري .

أدركت لواظ أن أبيها علم أن من كان في داره هو حسن وليس

معتصم، اللزي يحاول أن يخفف من روع جعفر.

_ ماتعملش في نفسك كده يابيه

_ خلوها تمشي الفاجره من قدامي.

هارون للواظ

_ إطلعي انت ياست لواظ

إحنا معاه ماتقلقيش.

لواظ تخرج وتتبعها مصايب، تصعد درجات السلم ببطء ومصايب

تحاول أن تستفسر عن ما يحدث.

_ فيه أيه ياست لواظ؟

_ لواظ تبكي ولا تجيب، تصل لحجرتها وترقي على فراشها

ومصايب تلاحقها بالأسئلة.

١٩ _ هلوسة:

صورهم تختفي خلف الزجاج، لا تراهم، خلف الزجاج هناك الكثير من الروايات والقصص
غلفها الصمت، وقتل الروح فيها، ثرثرة بصوت

عالي تحتك بالزجاج لوأد تلك القصص ودفنها، هم قلوب تنبض بالسوا
خلف الزجاج وجوه بلا ملامح، تغفو من شدة التعب وبلا حيلة، بصمات
أيدي وقحة تلطم وجوههم، في غرفة نوم جعفر اللزي وهارون بجواره
هم يعلموا أهميته بالنسبة لهم ولو سقط سوف يسقطون بعده لامحالة.
جعفر

_ بقى حسن ، يجي داري وياخذ أرضي
ومش كده وبس، أتحايل على لواحظ
علشان تقابله.

هارون

_ الراجل بيهلوس.

اللزي

_ معاه حق، دنا حطق ، لا ورايحين
نستقبلوه وجاييين الطبالين وشاعر
الربابه ، ده لو الوالي ، مكناش عملنا كده.

هارون

_ الواد ده جن مصور، ضحك علينا
كلنا، بس إحنا ذنبنا أيه ، إحنا منعرفش
الشريف معتصم ودخل علينا بتمن الأرض
وكمان هدايا ، وكنا حنعرف منين
إنه خطف معتصم.

جعفر في هلوسته.

_وأنا أتحايل على لواحظ وأخذها ليه.

وتمشي متنكده علشان كانت فاهمه
إنه معتصم، وف نص الليل، ألقاها
واقفه قدام الباب وقال أيه ، ريحه
ترضيه علشان ترضيني، وأنا فرحت
وقلت حيلتها.

اللي

_ كفايه يابيه الله يخليك ، الواحد
حيطر شق من الغيظ.
جعفر يستمر في جنونه.
_ لا وأيّه ، تعمله الفطار بيدها الفاجره
لأنها عارفه أنه حسن .

يصرخ

_ حسن ضحك عليه.

اللي

_ هو ضحك علينا كلنا ، فوق
أنت بس ، واحنا نولع في الجبل
باللي فيه.

هارون

_ إحنا لا حنقدر نولع ولا ننيل حاجه
يالزي.

_ أنت بتقول أيه ؟

هارون

_ الحيازات كلها في يده دلوقت
ولازم نفكروا بعقل، هو مش عبيط.

.....

٢٠_ الفضيحة:

منذ أزل الأيام تتربص بنا الأقدار، نعيشها، نتألم منها، نمدحها، نذمها وهي لا تكتثرت بنا وماضية في طريقها، نحن تحت مظلة القدر نمشي معه مسيرين لا مخيرين، نعيش بين الصمود والآسر، بين الحزن والفرح، يطاردنا الخوف من المجهول، نبتلع أنفاسنا، نرسم تفاصيلنا بالوهم ، نكره تفاصيل الحق، في الوسعاية عبدالمجتلي الحلاق يحلق رأس مهران غفير قصر جعفر، يقترب منه طلب.

مهران

_ الحكيم سمعان كان يعمل أيه عندكم

ياواد يامهران.

_ البيه بعافيه شويه وحالته وحشه

من يوم ماقابل معتصم.

_ إزاي كانوا فرحانين بيه قوي.

_ لا ده ماطلعش معتصم الي كانوا فرحانين بيه.

_ تقصد تقول الي خد الحيازه مش معتصم.

_ أيوه .

_ امال يبقى مين؟

_ سمعتهم يقولوا حسن .

_ ياراجل كلام غير ده.

_ هو ده الي حصل، اوعي يطلع الكلام ده لحد.

عبدالمجتلي يُنصت لحديثهما بتركيز، هو وكالة أخبار البلدة وهاهو

حصل على خبر غير عادي ، ما إن إنتهى من الحلاقه وأنصرفا مهران وطلب حتى إنطلق

ينشر الخبر وانطلق لدار الشيخ آدم ليحمل له

البشرى ولا يعلم أن الشيخ آدم يعلم الحقيقة وأدرك الشيخ آدم أن فضيحة جعفر والليزي،

سوف تنتشر كالنار في الهشيم.

حسن وحمدان يقفان مع منازع يودعانه قبل نزوله البلدة.

حسن

_ زي ماقولتلك يامنازع، خلي بالك

من نفسك ، اللزي حيكون عامل

حسابه.

_ قول يارب، بس لما أطلع بليله

إحموا ضهري .

حمدان

_ إحنا ندخلوا من الجبانه ونلفوا

ونتستخبوا في ظهر بيت الزغبي

حسن

_ ماتقلقش يامنازع ، كل واحد

فينا، حيكون ماسك جنب، أول

ماتطلع بليله حميمك من قدام

من آخر بيت الزغبي، وحمدان ومرسال

حيكونوا في ضهرك من أول بيت الزغبي.

منازع

_ ربنا يسهل ، حتكل على الله أنا

وانتوا انزلوا في نص الليل.

حمدان

حنساه.

منازع

_ إحنا راجل واحد، عيب الكلام ده

سلام ، هستناكم في نص الليل

يهزول منازل من أعلى قاصداً البلدة.

٢١_ لا يشعرون:

أصعب هجرة ورحيل، أن ترحل من داخل أعماقك، أن تحاول الهرب من نفسك، والأصعب أن لا تنتظر موعداً للرجوع، ترحل المشاعر والأحاسيس ولو عادت لا تجد من يحتضنها، صعب أن تعيش بينهم بمشاعر وهم لا يشعرون، في منتصف دار اللزي ، مجموعة من الفتيات يجلسن على الحصر يُطبلن ويرقصن وأمامهن شمعدان تجلس منيره بجوارهن تُصَفق وتبتسم في رياء، هي تجمال أخيها وتشمت في ليله إحدى الفتيات.

_امال فين العروسه ، مش تيجي تحضر حنتها.

منيره

_ معلش أصلها مكسوفه .

تحدث نفسها .

_ بقى مش عاوزه تيجي يابنت

الحمداني، طيب ، حاخدهم وادخلهم

جوه .

_ ياللا بينا يابنات ، نجيبوا العروسه من أوضتها.

.....

هناك فرق بين فرحة حقيقية بين الأهل والأصحاب وفرحة مزيفة تشعر فيها بأن من يكرهك ، يأتي ليحتضنك، لا أحد يواسيك ، لا عيون تفهمك ، تشعر بغربة، وقتها تنظر إلى لحظات الوداع المؤلمة، وتتمنى أن تُكتب على ألواح القدر، حليمه تحاول مع ليله لتقنعها بالخروج للحنة.

_قومي ياليله، مايصحش كده تسيبي الحنة.

_مش طالعہ يا حليمه وأنا اتحنيت مره

واحدہ بس لسديري حبيبي وجوزي.

_ إعملي معروف إعقلي، اللزي حيبي يطين عيشتنا

_ لو حيقطعوا رقبتني مش طالعہ .
منيرة تدخل غرفة ليلة وخلفها الفتيات يحملن الشمعدان ويغنين
ليله تلطم وجهها وتصرخ فيهم .
_ كفايه حرام عليكم .
منيره تحدث نفسها
_ زي ما قدرتي تتحني وتاخدي مني
سيديري حبيبي، وتحرميني أنا
أتحنى ليه، جه اليوم الي تتحني
فيه غصب عنك،
تلتفت للبنات
_ حنوها بالعافيه بنت الحمداني
حليمه
_ ماينفعش كده ياست منيره .
_ اطلعي بره يابنت الطواب أحسن
ما أقلع الي في رجلي واخذك
ضرب لحد باب بيتكم .
حليمه تبكي وتخرج وليله تقاوم إجبارها على الحنة ، الفتيات لطخوها
بالحنه بالرمي على وجهها وشعرها وكل جسدها وهم يلهون ويضحكون .

٢٢_ الفخ:

يعزف الليل نغماته على ناي حزين، إختبئت الطيور في أعشاشها
يأتي الليل حاملاً أقداره، يتحمل جروح المقهورين ولا يداويها
هو يوزع نغمات نايه الحزين على القلوب التي ترفرف ذبيحة
الذي في حالة خوف وقلق من حسن.

_ أنت ياطلب حتطلع تراقب من فوق الدار

وتخلي اثنين هنا قدام الدار .

يشير لخمسة رجال .

وانتوا ، اثنين منكم في يمين الدار

واتنين في الجنب الشمال ، وواحد

يبقى في ورا الدار.

يدخل منازع

الذي

_ جيت في وقتك يامنازع

يأمر رجاله بأن يذهبوا إلى مواقع غفارتهم، ويصحب منازع لداخل الدار

ومنازع يقوم بمعاينة المنزل يقفون في منتصف الدار.

الذي

_ أنت بقى يامنازع هنا ، تقعد على الدكة دي ، عينك تبقى كاشفه كل حاجه.

تدخل منيره

_ احضر لكم عشا ياخويا.

الذي لمنازع

_ تتعشى يامنازع؟

_ لا ، أنا شبعان ، اتعشى أنت.

_ لا أنا حدخل أنام ولو حسيت

بحاجه صحيني.

_ أدخل نام أنت ، بس قولي

أوضة ليله فين؟ علشان هي أهم حاجه.

اللي أشار لمنازع على موقع حجرة ليله.

_ تقعد بالعافيه.

_ الله يعافيك.

يتجه الليزي نحو حجرته وخلفه منيره.

_العروسه اتحتت يامنيره.

_ أيوه اتحتت.

_ طيب، ادخلي أوضتك وماتتحر كيش منها ، عشان فيه راجل غريب في الدار.

يتجه الليزي لحجرة نومه وكذلك منيره تتجه لحجرة نومها.

حسن وصياد يتسللون في خفية داخل الجبانه ، يحملون بنادقهم

وصلوا بالقرب من دار الزغبي .

طلب فوق دار الليزي ، تعب من الوقفة وجلس يُشغل لفافة تبغ رجال الليزي يحاوطون الدار من كل إتجاه، حسن ومنازع إختاروا هذا الوقت المتأخر حتى يحل الإجهاد والتعب على رجال الحراسة

وهذا ماحدث ، عند منتصف الليل قل تركيز الحُراس وجلس اثنين يتسامران مع بعضهما البعض ويتبادلان لفافات التبغ والحارس الذي يقف بمفرده خلف الدار جلس ملتصقاً بالحائط الخلفي للدار، يغفو ويفيق حتى فقد التركيز، منازع تحرك ببطء لمعاينة الحال بالقرب من عُرف نوم الليزي ومنيره، شعر بإطمئنان فالجميع يغطون في نوم عميق اتجه نحو حوش البهائم وفتح الباب ودخل قاصداً الحائط الخلفي ،عاين الحائط وجد أن الحائط يمكن الصعود عليها ولكن في هذا مخاطرة إختار نقب الحائط وأخرج من صدره عتله حديد، أخذ ينقب بها الحائط بهدوء ، هو إعتاد على ذلك وله خبرة كبيرة.

.....

ليس لديها معرفة بهندسة الحياة لتبني جسراً من الأمل فوق بحار

اليأس المألحة ، التي علت أمواجها ، أغرقتها الهموم والأحزان

وإستعمرها الوجد بلا أمل من شفاء،تسعر بضعف وإنكسار فاق مامر بها من صعب، السواد أحاط بها من كل جانب، ليلة في حجرتها وصلت حد الإنهيار الكامل ، نظرت في حجرتها وجدت آلة حادة، شرشرة يحصدون بها البرسيم ، تُحدث نفسها.

قدرة الظلام في التأثير على ليله كانت كبيرة، فاقت طاقتها، إنسحب من داخلها النور
والضياء، هاجر الأمل بلا عودة، منازع نجح في نقب الحائط
وعمل تجويف كبير فيها دون أن يشعر به أحد، تسلل في بطن خارجاً من
الحوش قاصداً حجرة ليله.

ليله أمسكت بالشرشرة بيدها اليمنى وراحت تستغفر ربها من ذنب عظيم ، عذمت عليه.
_ سامحني ياربي، مش بإيدي
إغفر لي ذنبي.

قطعت بالشرشرة شرايين يدها اليسرى ، في تلك اللحظة، دخل عليها
منازع وهي غارقة في الدماء ولكن لانزال فيها حياة ،
_ إستعجلتي ليه على قدرك ياليله.
تتحدث ليله بصعوبة.

_ أنت مين ، مش أنت منازع صاحب
اللي .

_ لا ياليله، أنا صاحب حسن وحمدان أخوكي
تعالى أشيلك ، حسن وحمدان مستننين، مفيش
وقت علشان أفهمك
_ تفتكر حلحق أشوفهم.

حملها على كتفه وبندقيته في يده اليسرى ، خرج بها من حجرتها
واتجه بها نحو الحوش، دخل الحوش وأغلق الباب خلفه بقدمه واتجه
نحو فتحة الحائط.

_إسندي نفسك ياليله ، خلاص
هانت ، حطع بره الفتحة وأسحبك
خرج منازع بره الفتحة وليلة تحاملت وهي تمد يدها له، أخرجها من
الفتحة .

.....

حسن وحمدان مختبئان في الجانب الأيمن من دار الزغبى، حسن يراقب
الوضع خلف دار اللزى ، لمح منازع وهو يقوم بإخراج ليله من الفتحة
همس لحمدان

_ منازع خرج هو وليله من الفتحة.

في الجهة اليسرى مرسال على يمين دار الزغبى يراقب حركة رجال
اللزى، الحارس الموجود خلف دار اللزى يلمح منازع وهو يُخرج ليله
من الفتحة ، هو في غفوة نوم إستفاق منها.

_ أيه ده ؟ في حد نقب الحيط.

جرى ببندقيته نحو منازع وصوب نحوه طلقة ، ردها عليه حسن بطلقة
أسقطته قتيلاً، طلب من فوق سطح دار اللزى لمح منازع يجري وهو حاملاً ليله ، صوب
نحو بندقيته وأطلق طلقة أصابت رأس منازع من الخلف
مرسال عاجله بطلقة أسقطته، منازع سقط على الأرض واتجه نحوه حسن وحمدان ،
منازع يلفظ أنفاسه الأخيرة، حسن يصرخ.

_ منازع، منازع، ويبكى وهو يرفعه على صدره وحمدان يمسك بليلة
وهو يصرخ أفزعته الدماء .

ليله

_ سامحنى ياحمدان لو كنت عارفه أنكم

حتاخدوني ماكنتش موت نفسي.

منازع

_ خدوا ليله واهربوا ياحسن بسرعه

مافيش وقت.

طلقات من الرصاص تنهال عليهم.

يلتفت منازع لحمدان

_ كان بودي اجييهالك سليمه

هي إستعجلت قدرها ياحمدان خدوها وامشوا .

حسن يحاول أن يحمل منازع.

_ مفيش وقت يا حسن، أنا حموت

متعاندش، إهربوا من هنا.

_ دمك مش حيروح هدر يامنار

تمنه رقبة اللزي.

_ إهرب يا حسن الله يخليك

ماتضيعش اللي عملناه، أنا

محبتش حد غيرك في حياتي

اتعودت أكره بس.

_ أنت حتعيش يامنار

_ مش باين يا حسن، لو بتحب

منار خدوا ليله وإهربوا

يكن تلحقوا تنقذوها.

منار لفظ أنفاسه الأخيرة، وحسن وحمدان حاملاً ليله يتراجعون للخلف

ينضم لهم مرسل، اللزي يستمر في إطلاق الأعيرة النارية، اختفى حسن وحمدان ومعهم

مرسل وليله في المقابر، ليله تلفظ أنفاسها الأخيرة

_ استنى هنا يا حمدان

وديني عند قبر أبويه وامي.

_ مقدرتني تستني شويه ياليله

تموت ليله عند القبر وحمزه الفحاحري يراقب الموقف من قرب

حسن ينادي عليه .

_ تعالى احفر ندفنها بسرعه ماقدمناش وقت.

مرسل وحسن يساعدان حمزه الفحاحري في الحفر ويدفن الفحاحري الجثة.

_ بينا يا حمدان ، مش حنقدروا نطولوا هنا

ربنا يرحمها.

حمدان يرقى على القبر ويبكي وحسن يجر فيه ويسحبه.

_ معاياه يامر سال .

يتعاون مرسال مع حسن في حمل حمدان الذي فقد المقاومة حزنا على أخته، استمروا في حمله حتى وصلوا الدرب في الجبل وصعدوا لخيמתهم.

الذي قام من نومه على صوت طلقات الرصاص، إرتدى جلبابه وحمل بندقيته وخرج ليصطدم بمنيرة التي فزعت من صوت الرصاص

_ فيه أيه ياخويا؟

_أوعي من قدامي.

يصعد اللزي درجات السلم حتى سطح منزله، وجد طلب قتيلاً ، راح من فوق السطح ونظر خلف الدار وجد الحارس أيضاً قتيلاً، نزل درجات

السلم مهرولاً، هداً صوت الرصاص ، وصل إلى الباب الخارجي وسأل الغفراء عن المكان الي كانوا يبطلقوا عليه البارود، أخبروه أن طلق النار كان بجوار دار الزغبى ، اتجه بهم نحو دار الزغبى وتتبع آثار الأقدام بصعوبة في ظل الظلام الحالك، هو تأكد من هروبهم

وجد آثار للدماء متناثرة على الأحجار ، تتبع آثار الدماء حتى وجد جثة منازع، طلب من الرجال حمل الجثة نحو الجبانه، هو يعتقد أن منازع تم قتله وهو يطاردهم ،عزم النية على العودة إلى الدار حتي يطمئن على وجود ليله ، ثم يلحق برجاله لدفن جثة منازع، عاد مسرعاً إلى داره ، منيره تقف على باب الدار الداخلي، يدخل اللزي والوجود على وجهه.

_ فيه أيه ياخويا؟

_ دخلتي أوضة ليله.

_ لا ، فيه أيه ؟ مش فاهمه حاجه.

لا يجيب منيره وينطلق نحو غرفة ليله، يدخل الغرفة ،لم يجد ليله إشتد غضبة ، لمح الشرشرة وعليها بقع الدماء، أمسك بالشرشرة أدرك أنها حاولت الإنتحار ولكن هل تكون قد ماتت ، أم أنهم دخلوا إليها وأخذوها وأنقذوها، هو في توتر وحيرة ، كيف دخلوا داره وأخذوها أخذ يتتبع بقع الدماء على الأرض، وصل الحوش وفتح الباب ودخل

وكانت المفاجأة تجويف كبير أمامه، وتأكد أنه تم تهريبها من هذا المكان ولكن من قام بنقب الحائط، هل تم النقب من الخارج، ولكن إستبعد ذلك، كيف يقومون بالنقب وهناك حارس، فكر أن يكونوا قتلوه ثم قاموا بنقب الحائط ولكن إستحالة يقتلوه بطلقة بارودة ، ثم تأتيهم الجرة لنقب الحائط وهذا يحتاج وقت، وجد أن الحل الأقرب يكون خيانة منازع وهو خبير في النقب ،هداه تفكيره في الخروج من التجويف ليرى الغفير المقتول ، فإن كان بطلق ناري فيكون النقب حدث من الداخل ويكون منازع خائن ، وإن لم يجده مقتولا بطلقة باروده يكونوا هم من قاموا بعملية النقب وتهريب ليله، ولكن كيف ومنازع في وسط الدار، عاين جثة الحارس وتأكد أنه مات بطلق ناري فتأكد أن الخائن منازع.

_ عملتها يامنازع ، وأنا أقول

جابو البارود من فين ،

أخذ يفكر في ليله هل أخذوها حية أم ميتة، تذكر الجبانه ، لو هي ماتت فمن المؤكد أنهم سوف يدفنها هناك،ويمكن اللحاق بهم هناك جرى مسرعاً نحو الجبانه وجد رجاله واقفين على تربة منازع، وحمزه يحيل التراب داخل القبر حتى غطاه بالتراب.

_ دفنتوا منازع.

أحد الرجال

_ خلاص دفناه .

_ لو لحقتكم ، كنت خليتكم

رميتوه للديابه ، هي أحق بجنته.

ينادي على الفحاري الذي إنتهي من دفن الجثة بالتراب.

_ خد يافحاري الغبره أنت.

يقترّب منه حمزه الفحاري وهو يرتعش .

_ دفنت حد هنا من شويه.

حمزه يتلعثم في الرد ويتردد والخوف يجبره أخيراً على قول الحقيقة.

_ أيوه ، لسه دافن بنت الحمداني في قبره.

الذي يلتزم الصمت وينسحب بهدوء من الجبانه.

٢٣_ الأمل هو روعة الحياة:

الحياة مليئة بالسعادة ولكن مايعكرها هو الحزن واليأس، لكن بعد الليل يأتي النهار، يمر بالكثير من اللحظات التي تستوقفنا في الحياة هي لحظات متعايشة معنا، لحظات أمل وألم، ورجاء، وفرح وحزن لا نملك أن نختار منها حسب ماتهوي نفوسنا، في الأيام الأخيرة من الصيف ، نهاية شهر أغسطس، وقت العصاري ، في مضيقة جعفر يجلس جعفر بصحبة هارون.

_ الحمد لله إنك قمت لينا بالسلامه.

_ وأيه الفايدة ياهارون ، قمت مكسور

ياريت الواحد كان مات أحسن.

_ بعد الشر على جنابك ، مفيش

حاجه تستاهل.

_ أنت بتراضيني ياهارون.

_ امال أقولك أيه؟ ماهو لازم أخفف عنك.

_ ماتقولش حاجه، اللزي فين ؟

_ اللزي طول الليل في عراق مع حسن

وقعدوا يضربوا بارود على بعض للصبح

اتقتل اتنين من رجالة اللزي.

_ يادي حسن ، الي زي العفريت

طالعنا في كل حاجه، هو سبب

كل المصايب من وقت مارجليه

طبت البلد.

_ تعرف أنهم أخذوا ليله من دار اللزي

والي خرجها منازع الي طلع خاين.

تصدق أن منازع طلع من رجالة حسن

واحنا فاتحين ليه بيوتنا.

_ إن كنا فتحنا بيوتنا لحسن ، حتستكتر

تفتحها لمنازع، إن كانت بنتي خانتنا

مش حيخونا منازع.

يسرح بعيداً جعفر في خيانة لواحظ بعد سماعه بخيانة منازع.

_ كسرتيني يالواحظ وحتيطيتي راسي

في الطين، إشتريتني الغريب وبعتي

أبوكي، بعتيه بالرخيص يالواحظ.

هارون ينظر لجعفر وهو يتحدث مع نفسه بصوت منخفض.

_ بتقول أيه يابيه ؟

_ مابقولش حاجه ، ببكي نفسي

وببكي حالي.

_ كل حاجه حتتصلح.

يدخل اللزي مكفهر الوجه وهو في حالة إنعدام إتران، يلقي عليهم السلام ويجلس.

هارون

_ جيت في وقتك يالزي ، جعفر بيك

لسه كان بيسأل عليك، مالك يالزي

مش طايق خلقاتك(ملايسك) الي عليك.

اللزي

_ أقول أيه ياهارون، صعب تحس

باللي جوايه، وقعت السبع وحشه

ياهارون،والواد ده كسرتني.

جعفر

_ كسرنا كلنا ، وبقي سبع وحاتمي

الحمى عند أهل البلد، بقينا زي الأغراب في بلدنا.

اللزي

_ وإحنا حنسكتوا على كده .

جعفر ينهض واقفاً ومتوعداً .

_ لا ، قوموا دلوقتي ، حضروا كل

الرجاله واستنوني قدام الدار ، حبيب

لوا حظ وحنوصلوا مشوار ، خلص

منها ومن عارها ونطلعوا الجبل ومش

حرجع بيوتنا غير مخلصين عليه.

اللزي ينهض واقفاً

هو ده الكلام.

_ أقعد يالزي نتكلموا شويه بالعقل

حسن معاه ورق الحيازة كله

مش حنستفاد حاجه لو قتلناه ومش

حنقدروا نوصلوا للورق وحندخلوا

في مشاكل مع معتصم ، مش بعيد

يدخلوا معانا في معركه ، أحنا مش

قديهم وهم عددهم كبير، عاوزك

تهدا ياجناب الملتزم ونفكروا بعقل

إزاي نجيب الحيازه ولو بمكر وحيله

وبعدها نخلصوا منه.

جعفر يهدأ ويتذكر معتصم و الحيازة وأدرك أن في كلام هارون كل العقل

شعر هارون بأنه إقتنع بكلامه وراح يُكمل لهم رؤيته.

_ الواد ده حويط وكسب كل معاركه

معانا بالعقل وإحنا بنتحرك بجنون

اللزي

_ أنت بتقول أياه حاسب على كلامك.

هارون

_ إسمع يالزي، سبناك تعمل اللي عاوزه
ومشيت بدماغك ورا عشقك ليله وفشلت.

اللزي بغضب

_ حَسَن من ملافظك ياهارون.

جعفر

_ إهدا يالزي وخلي هارون يكمل كلامه
أنت لو متغاظ من الولد ده قيراط أنا
متغاظ منه فدان، خلينا نشوف هارون
عاوز يقول أياه.

هارون

_ مش اللي يقوله هارون يابيه
الصح لازم يتعمل، وجود الحيازه
في أيد حسن أخطر من وجوده هو
ورق الحيازة هو الأهم دلوقتي من
حسن .

جعفر

_ عاوز تقول أياه ياهارون.

_ عاوز أقول ، نمسك نفسينا

ونكتم غلنا جوانا ونيجي على

نفسنا ونتفاوض معاه، بعد

مانتفاوضوا معاه ونمسك ورق

الحيازة في يدنا، بعدها نعمل فيه اللي عاوزين نعملوه.

جعفر يفكر في كلام هارون وفكر في عاقبة ما يحدث إن تخلصوا
من حسن ولم يجدوا ورق الحيازة ،
_ معتصم مش حيسكت ومش
بعيد يهجموا عليه في داري
يلتفت جعفر لهارون
_ أنت شايف أيه ياهارون.
_ شايف إننا نبعت مرسال لحسن
ونحسسه بأمان ونشوفوا طلباته.
متنساش إن كان معاه الحيازة
إحنا معانا حكم بالإعدام عليه
جعفر
_ هو ده كلام العقل ياهارون، الغضب
مش حييجب نتيجته ولا قتله دلوقت
ليه لازمه ، حياته أهم دلوقت علشان
ورق الحيازة.
هارون
_ كده فهمتني يابيه.
جعفر
_ خلاص موافق على كلامك نقوم نخلصوا
مشوار لواحظ.
هارون
_ مالها لواحظ.
_ حدفنها بالحيا في الجبل.
_ لا إهدا الله يخليك وماتغلطش غلطة اللزي مع ليله، لو دفنتها دلوقت حتتعقد الأمور
مع حسن ومش حنقدروا ناخدوا منه الحيازة وحندخلوا في صدام جديد معاه.

جعفر

_ صدام ليه ، هو حيشاركني في بنتي.

هارون

_ لا هو مش حيشاركك فيها ، لكن أنت

عارف أنه بيعشقها ، حيخليك قوتها إزاي

ده جازف بنفسه وأخذ ليله من دار اللزي

مابالك بقى ودفن وموت لواحظ، الواد

ده مستبيع ويعمل أي حاجه.

جعفر

_ خلاص نأجل موضوعها هي كمان

لحد مانجيبوا ورق الحيازه.

٢٥_ الدمعة الجميلة:

هل بحثت عن الدمعة الجميلة، تلك الدمعة التي تسمو بالروح والقلب
ولماذا نستسلم للدمعة القبيحة التي تُغرقنا في الهم والأحزان، الدمعة
الجميلة هي ابنة القناعة ومدينة التذكُّر من خشية الله، وهي قبلة الضمير الهادئ ،
المطمئن ، يشعه تجلس مع مريم وأبيها أرمنيوس
على الطبلية في صباح يوم جديد.

يشعه

_ تصدق يا با أنا زعلانه من نفسي
إني شكيت في حب لوا حظ لحسن
وقلت باعت حسن .

أرمنيوس

_ أنا كنت عارف كل حاجه يابنتي
الشيخ آدم قلبي على كل حاجه.
_ كنت عارف أنه خطف الشريف
معتصم ولبس هدومه ودخل قصر
جعفر.

_ أيوه وبات هناك ليله كمان.

مريم بتنهيده

_ ياقلبك يا حسن ، انتوا بتحكوا
وأنا قلبي بيقع ، إزاي قدر يدخل
جوه القصر ويبات كمان يشعه
_ فاكهه لما قولتلك فيه حاجه مش فاهماها
كنت حاسه أن حسن مش حيسكت.

أرمنيوس

_ وحِثْلَاقِي ضَرْبِ الْبَارُودِ الِلي كَانَ
عَشِيهِ وَرَاهِ حَسَنَ.

مَرِيَمَ

_ يَبْقَى حَسَنَ نَزَلَ يَخْلُصَ لَيْلَهُ
بَسْ يَاتَرِي خَلَصَهَا وَلَا لَا

أرمنيوس

_ خَافَ يَكُونُ حَدٌّ مِنْهُمْ إِنْصَابَ.
يَشْعَهُ

_ حَلِيمَهُ عَلَى وَصُولِ دَلُوقَتِ
قَوَّلَتْهَا تَعْدِي عَلَيْهِ نَرُوحَ
الْبَيْرِ مَعَ بَعْضٍ، وَأَكِيدُ تَعْرِفَ
كُلَّ حَاجَةٍ ، بَيْتَهُمْ قَرِيبٌ مِنْ بَيْتِ
الْزَيِّ.

وَلَمْ تُكْمَلْ يَشْعَهُ كَلَامُهَا حَتَّى كَانَتْ حَلِيمَهُ تَطْرُقُ بَابَ الدَّارِ.
يَشْعَهُ

_ أَهْيَ حَلِيمَهُ جَاتِ.

تَفْتَحُ يَشْعَهُ الْبَابَ .

_ أَدْخَلِي يَا حَلِيمَهُ.

_ أَيْهِ مَشْ حَزْرُوحَا الْبَيْرِ نَمْلُوا مِيهِ.

تَشْدُهَا لِلدَّخْلِ ، تَتَبَادَلُ حَلِيمَةُ تَحِيَّةِ الصَّبَاحِ مَعَ أَرْمَنِیُوسَ وَمَرِيَمَ
يَشْعَهُ

_ أَقْعَدِي يَا حَلِيمَهُ ، شَوِيهِ وَحَنَقُومَ مَعَ بَعْضِ

نَرُوحِ الْبَيْرِ.

تَضَعُ حَلِيمَهُ الْبَلَاصَ عَلَى الْأَرْضِ وَتَجْلِسُ عَلَى الدَّكَّةِ .

أرمنيوس

_ تعالي افطري معانا يابنتي.

_ سبقتم ياعمي وبالهنا والشفاه

مريم

_ سمعتي ضرب النار عشية.

_ أيوه حسن نزل علشان يخلص ليله.

يشعه

_ وخلص ليله.

_ أيوه بس سمعت طراطيش كلام

أنها موتت نفسها ومعرفش أخذوها

ميته ولا صاحيه ، أنا مامتش بسببها

طول الليل.

مريم

_ ياعيني عليك ياليله.

حليمه

_ سمعت أن حسن قتل ثلاثه من رجالة اللزي.

يشعه

_ كده اللزي ممكن يموت فيها.

_ ومنازع كمان اتقتل ، بيقولوا كان

مع حسن وهو اللي ساعده.

ارمنيوس

_ أنا كنت عارف أن منازع مع حسن.

طرق على الباب بشكل قوي.

أرمنيوس

_ ياسا تر ، مين اللي بيخبط كده.

يشعه

_ أنا حقوم أفتح.

_ لا خليك ، أنا اللي حفتح.

يقوم أرمنيوس من على الطبلية متجهاً إلى الباب، يفتح الباب يجد مهران غفير قصر جعفر.

أرمنيوس

_ خير يامهران؟

_ جناب الملتزم عاوزك ضروري

أنت والشيخ ، أدم.

علت الدهشة وجه أرمنيوس من هذا الطلب الغريب، وفكر سريعاً.

_ قوله طيب ، أنا حروح استنى الشيخ

أدم قدام الجامع وبعد مايخلص صلاة

الظهر حجييه وأجي.

٢٦_أمل معلق في ذيل الأمانى:

لواظ يلحفها الشتات ويطعنها الأرق، تشعر بأن الدنيا تضيق، فرحتها
القليلة تساقطت في بئر الهم والحزن، مساحة الرؤيا تنتحر، لا تكاد تبصر
الأشياء، تبكي على الفراش بحرقه ومصايب تحاول أن تخفف عنها

_ يابنتي إرحمي نفسك من العياط

أنت وشك بقى زي الكركم.

يدخل جعفر الحجرة وينظر لها بغیظ ، يتمنى داخله أن يطبق على رقبتها
بيديه ويخنقها ، ينظر لها بإحتقار، لواظ تمسح دموعها.

_ أبويه، حمدالله بسلامتك يابا.

تندفع نحوه لتحتضنه فيدفعها بيده، الشر يتطاير من عينيه ويحاول أن
يتماسك ، لواظ إرقت تحت قدميه .

_ أنا ماغلطش في حقك يابا، ولا أقصد

تتعلق في ملابسه .

_ سامحنى يابا.

صوت من الخارج ينادي على جعفر، يخرج من الحجرة ويقف على الباب ، فيجد مهران.
مهران

_ الشيخ آدم ومعاه المقدس على الباب.

_ دخلهم المضيقة وروح هاتلي اللزي

وهارون.

ينصرف مهران ويعود جعفر للواظ، ينظر لها مهدداً ومتوعداً.

_ اياك تفتكري أني حسكت على الي حصل

جايلك يوم ، خغسل فيه عاري يابنت سلمى.

الشيخ آدم والمقدس أرمنيوس يجلسون في مضيقة جعفر، يقلبون

في صفحات حال بلدة بلا ملامح، يحتارون مَنْ فيها أضاع الآخر

هل الزمن أضاعهم ، أم هم من أضاعوا الزمان، بلدة تلطخت بالدم

وأُمسّت على الصراخ والعيول.

_ تفتكر يامقدس جعفر عاوزنا ليه؟

_ علمي علمك.

_ أوعى يامقدس ترتعش وركبك

تخبط في بعضها جنبى، حتربكى

وتخلينى معرفش أتكلم.

يدخل هارون يتبادل معهم التحية والترحيب بشكل لم يتعودا عليه

أدهشهم ووضعهم في حيرة ، تَبَعَهُ اللّٰزِي وهو يرحب بهم بأدب

بغير عادته وغلظته معهم، كانت المفاجأة الكبرى في ترحيب جعفر

وعزم عليهم بالغداء فشكروه فأمر لهم بالشاي والفاكهة، الشيخ

أدم والمقدس في حالة ذهول غير عادي.

الشيخ ادم للمقدس

_ أيه الكرم واللغه الجديدة دي يامقدس.

ارمىوس

_ أنا ماعدتش فاهم حاجه ولا مستوعب

الى بيحصل.

هارون شعر بما يدور بينهم.

_ احنا جنبناك ياشيخ أدم علشان

نفتحوا صفحة جديدة مع بعض

الشيخ أدم

_ هو فيه بينا صفحه قديمه

علشان نفتحوا صفحة جديدة .

هارون

_ أقصد أقول، اديك شايف حال

البلد وقتيل كل يوم.

ارمنيوس

_ هو احنا قتلنا حد.

هارون

_ انتوا ماقتلتوش ، لكن حسن قتل

وحسن قتل علشانكم.

الشيخ آدم أدرك أنهم يستخدموه هو وارمنيوس كوبري للوصول

لحسن، فكر أن يستغل الموقف جيداً وأنه الآن في مركز قوة

صنعها لهم حسن .

_ انتوا كمان حرقتم دار الحمداني

وقتلتموه وقتلتوا سديري وبهدلتوا

بنت الحمداني وخليتموا أخوها مطرود

في الجبل.

جعفر

_ علشان كده بعتمنا ليكم نصفي كل

المشاكل ديه.

الشيخ آدم

_ وأنت شايف نصفها إزاي ؟

جعفر

_ أنا حعوض كل أهل قتيل اتقتل

من عندنا وحعوض حمدان بدار

بدل داره الي اتحرقت، أيه رأيكم

في الكلام ده.

الشيخ آدم

_ لو كان الكلام ده بنية صافية يبقى

خير ولو كان بنية وحشه بحذرکم منها ، حتخسروا أكثر ماخسرتوا لو بتدبروا حاجه

حشه.

هارون

_ لا سامح الله، نيتنا خير .

جعفر

_ وعلشان اثبت أن نيتنا خير

يلتفت للمقدس أرمنيوس .

_ أنا متنازل عن الحكم بتاع دارك

أنت المفروض بعد شهر كنت

حتفضي الدار وتمشي من البلد

خلاص ياسيدي ، دارك ملكك

ومحدث حيقرب منك.

الشيخ ادم

_ أنا مش مصدق الي بيحصل ده.

هارون

_ لا صدق ، وكمان حسن يقدر

ينزل يعيش وسطينا زي ماهو

عاوز.

الشيخ أدم ساخراً

_ أيه ده ، متكنش الدنيا مطرت فجأة

عليكم رحمه وشهامه ورجوله.

جعفر

_ علشان كده بعتنا ليكم، تروحوا

لحسن وتبلغوه أننا حندفع دية

الي اتقتل من عندنا ونبني دار لحمدان وكمان نجيب القاضي ويعيد محاكمته وياخذ
براءة

أرمنيوس

_ وأيه المطلوب من حسن قدام

ده كله.

هارون

_ مش عاوزين من حسن غير

أنه يرجع ورق الحيازة.

الشيخ فكر في الأمر وحدث نفسه.

_ هم بيساموا على ورق الحيازة

وأكيد بعد مايمسكوا الورق

مممكن يغدروا بحسن ، تعمل أيه

يا آدم ؟، تعمل أيه؟ حوافق على

كلامهم أكيد حسن عامل حسابه

وكمان عارف أنهم حيساوموه

علشان كده ، ساب الورق أمانه

عندي.

يلتفت إليهم الشيخ آدم .

_ كلامكم معقول. حاخذ المقدس دلوقت

وحنطلع لحسن ، وحشوف رده

أيه علي الكلام وليه طلبات يقولها.

هارون

_ واحنا حنستنى الرد.

حسن لديه خبرة كبيرة في ترتيب حقائبه ووضع الأشياء فيها بعناية يرى الحقيقة المخفية خلف أسوار الظلم والإستعباد، هو ينظر للأيام ككتاب يجب أن يتصفحه في هدوء وروية، يدرك أن الفاشل هو من يتصفح الكتاب بغضب أو تسرع، أو نجاسة، كتاب الحياة حتى تتصفحه تحتاج لطهارة في القلب والروح، يجلس حسن ومرسال وحمدان خارج الخيمة .

حمدان

_ الأيام عماله تقلب فينا وتعديل

ومش عارفين واخذانا على فينا؟

_ مفيش قدامنا غير الصبر ياحمدان

والفرج حيبي ماتقلقش.

مرسال

_ مات أبويه وأمي وعم حمداني وليله

ومنازع يأتري الدور على مين فينا

حمدان

_ ماعادتش تفرق يامرسال.

حسن شعر بالهم والإحباط يعتريهم وأراد أن يخفف عنهم.

_ قوموا نتمشوا شوية، نوصلوا لحد

السيف ونبصوا على البلد من هناك

مرسال

_ أنت اتجنيت ياحسن ، أنت عاوز

تخلص مننا.

_ بينا بلاش كسل واطمنوا ماحدث

حيفكر يهجم علينا دلوقت.

حمدان

_ وأيه مخليك مطمئن كده ؟

حسن

_ حتعرف كل حاجه قريب

بيننا على السيف.

نزل ثلاثتهم من أعلى الدرب الجبلي، وصلوا أسفل الجبل، ثم صعدوا الهضبة العالية التي ينحدر منها كُثبان رملي على شكل السيف، نزلوا من أعلى الرمال وهم يضحكون، فجأة توقفوا عن اللهو فقد ملحوا من بعيد أن هناك من هو قادم، اختبئوا خلف الكُثيب الرملي وهم يراقبون خطوات القادمين، حتى بدأ يتسرب لهم الإطمئنان.

حسن

_ دول الشيخ آدم ومعاها المقدس.

حمدان

_ غريبة، جايين من غير خوف وفي

العصرية كمان، واضح أنهم جايين

من البلد علينا على طول.

حسن ينظر لهم وهو يبتسم.

مرسال

_ حسن فاهم حاجه ومش عاوز

يقول لنا.

حسن

_ دلوقت تعرفوا كل حاجه.

وقف حسن ينتظرهم حتى أن المقدس ارمنيوس ملح ثلاثتهم

ارمنيوس

_ حسن اهو .

الشيخ آدم

_أيه معقول لحقنا نوصل.

_ هو واقف عند السيف ، وفر علينا

طلوع الكوله والدرب .

_ زي مايكون مستنينا

وصل ارمنيوس بصحبة الشيخ آدم سيف الرمال وتبادلوا التحية والترحيب مع حسن وحمدان ومرسال وقدا واجب العزاء في وفاة ليلة لحمدان وجلسوا جميعاً في دائرة على الرمال، قص حسن ماحدث من جعفر منذ أن أرسل في طلبهم حتى خروجهم من عنده.

الشيخ آدم

_يعني باختصار بيساوموك على الحياة

براءتك ورجوع حمدان ورجوعكم البلد

وحينوا دار لحمدان، ويدفعوا دية الي

اتقتلوا من رجال اللزي ، علشان يهدوا

عائلاتهم ناحيتك ومايتعرضوش ليك

حسن

_ كنت عارف أنهم حيساوموني يامولانا

وعارف كل الي قولته.أنا حرجع الحياة

بالشروط الي حقولك عليها.

ارمنيوس

_ قول طلباتك ياحسن واحنا نبلغهم ردك.

حسن

_ بيت لحمدان زي ماقالوا،وكمان براءتي

زي ماقالوا ولكن أنا حضيف شرطين

عليهم ، لو وافقوا عليهم، أنا حرجلهم الحياة.

الشيخ آدم

_ قول شروطك دي من حقت.

حسن

_ القصاص في القتل بدل الدية يامولانا

ارمنيوس

_ إزاي يا حسن ، مش فاهم قصدك بالقصاص.

حسن

_ تار الي اتقتلوا من رجال اللزي معاه

ومعرفهمش واتقتلوا بسبب اللزي

الشيخ آدم

_ تمام كلامك، لكن القصاص حيتم إزاي.

_ أنا قتلت رجال اللزي واللزي حرق دار

الحمداني وقتله وقتل بنته وقتل منازع

وقتل سديري وكسر دراع منقريوس

أنا حطبت مع اللزي تحطيب موت

ياقتلني ويبقى هو إقتص مني لرجاله

وبكده يرتاح أهل القتل يا أقتله أنا وأخذ

بتار كل الي ماتوا.

الشيخ آدم

_ أيه الي بتقوله يا حسن عاوز تحطب

مع هذا الثور الهائج.

ارمنيوس

_ الشيخ آدم معاه حق، اللزي قوي يابني

مفيش حد في بر ساقلته قدر عليه.

حسن

_ ده أول شرط مني ياعمي.

الشيخ آدم

_ حيوافقوا عليه ويفرحوا كمان

حسن

_ الشرط الثاني، اتجوز لواحظ اللي

عمالين يلطخوا في شرفها

الشيخ آدم

_ يادي لواحظ ، مابلاش الشرط ده.

حسن

_ الشرط ده أهمهم أرد بيه كرامة لواحظ

وماأضمنش أبوها يعمل فيها أيه لما يطمئن على

ورق الحيازه، ممكن يدفنها بالحيا علشان ينتقم

منها ومني.

ارمنيوس

_ خلاص حنقولهم شروطك

حسن

_ لو وافقوا عليها ، يجي القاضي

الي حكم عليه الجامع الجمعة

الي جايه، يسمع شهادة أهل البلد

بعد صلاة الجمعة، وبعد مايحكم

بالبراءة نطلعوا على الوسعايه

الي حطب فيها اللزي مع سديري.

الشيخ آدم

_ حنرجع دلوقتي نقولهم شروطك

بيننا يامقدس.

يعود المقدس للبلدة بصحبة الشيخ آدم وحسن ينظر لمرسال وحمدان

حسن

_ أياه رأيكم في غدوة لحمه وويكا وملوخيه.

مرسال

_ أنت حتمقيط علينا .

حسن يبتسم

_ روح هاتلي السمراء واركب فرسك

وحمدان يركب فرسه ، حنطلعوا

على معتصم نتغدوا معاه.

مرسال بفرحه

_ ربنا يخليك يا حسن ، حناكلوا تاني

ونهبوا في اللحمه.

.....

٢٨_ مائدة الأرض:

الحياة كتاب صفحاته ممتده وسطوره لا تنتهي حتى يشاء الله، تمسكوا بالحلم ولا تجعلوه كومة من كوابيس تتعثر فيها أقدامكم، ووصل حسن وحمدان بخيولهم بلدة الكتكاته حيث يقيم الشريف معتصم، استقبل حسن بكرم لم يتوقعه حسن وذبح عجلًا تحت قدميه، قدم لهم مائدة من خيرات الأرض فاقت ماقدمه جعفر لهم، لم يشعروا بغربة هناك، يتحسسون بعض الطمأنينة، عقد جلسه مغلفة مع حسن في مضيفته الكبيرة ، الواسعه وأمر رجاله بأخذ حمدان ومرسال والتجول في حديقته خارج قصره

_ شرفت الكتكاته يا حسن.

_ الشرف ليه يامعتصم وأشكرك

على كرم الضيافة.

_ أنت بقيت اخوي يا حسن مالوش

لازمه الكلام ده ، خرينا في المهم.

أنت عملت آيه مع جعفر.

_ جعفر بعثلي قبل ما أجيلك الشيخ

أدم والمقدس أرمنيوس، وبيساومني

على الحيازه، بيقول انه حيدفع دية

الي اتقتلوا من رجال اللزي وحيعيد

المحاكمة بتاعتي ، علشان يتلغي

حكم الإعدام، وحييني دار لحمدان

_ ممكن يكونوا بيدبروا حاجه يا حسن

_ عارف مكرهم ولكن ماتقلقش.

_ يعني أنت وافقت على كلامهم

_ لا طبعاً ، رفضت دفع الدية

وطلبت القصاص منى أو القصاص

من اللزي لقتل الحمداني وسديري

ومنازع وليله .

_ مش فاهم يا حسن؟

_ أنا طلبت تحطيب موت مع اللزي

يايقتلني وياخذ بتار الي اتقتل من

رجالته ياقتله وأخذ بتار الي قتلهم

_ ليه الشرط ده يا حسن، اللزي قوي

ويمكن أقوى واحد في التحطيب في

مديرية جرجا كلها، كنت وافقت انهم يدفعوا

الديه.

_ ماينفعش يامعتصم، اللزي أكبر شيطان

وعاوز أخذ بتار الي قتلهم واتشفى فيه

_ طيب ده كان شرطك ولا فيه شروط

تاني.

_ فيه شرط زواجي من لوا حظ.

_ معتصم يضحك.

_ بتضحك ليه.

_ أصلها تبقى في بُق معتصم وتقسم

لحسن ، كنت ناوي أخطبها، مبروك

عليك لوا حظ ، أيه الي مطلوب مني

أنت لازم تيجي علشان حاجتين

تبقى واقف جنبي وشاهد وحكم

علشان ماأضمنهمش والحاجه الثانيه

علشان تاخذ ورق الأرض ده حقا.

_ ماتقلقش يا حسن ، حاجي بكل رجالتني

عاوزني امتي؟

_ يوم الجمعة ، نصلي مع بعض الجمعة
في مسجد الحاجر والقاضي حيبي هناك
يعيد المحاكمة، وتحضر طبعاً التحطيب
وبعد مانخلصوا تاخذ ورق الحيازه.

_ إسمعني يا حسن ، أنا كمان محتاجك
أنا مارحتش أخذ أرض جعفر ، علشان
أنا غاوي أرض، أنا قطعت الطريق على
سنجق جرجا العثماني ، اللي بيتوحش
في المديرية زي الغول، أنا عاوز أوقفه
عند حده، وحدخل معركة معاه.

_ وأنا معاك يامعتصم، على الأقل أخذ
تار أبويه منه ومن جنودهم.

_ يبقى خلي ورق الأرض معاك
لو إنتصرنا عليهم، حلال عليك كل الأرض.
_ أنت بتقول أيه ؟

_ ماتقلقش لو انتصرنا عليهم، حاخذ
اد الأرض دي أربع مرات، نواحي
ساقلته وولاد طوق والعواميه وعرب
بني واصل والفراسية والصوامعة
الخير كثير، والأرض دي تبقى

يضع حسن يده في يد معتصم ويحتضنه ، ويستأذن في الإنصراف ومعتصم لم ينسى أن
يحملهم بأقفاص الفاكهة ومؤن للطعام من لحوم
ودقيق وسمن.

.....

الإنسانية شرف ومن ينتهك هذا العِرضُ، هو مجرم، فمن يفقدها خرج من تصنيف الإنسانية، يالها من إحصائية صعبة لو أحصينا مجرمي الإنسانية وصنفناهم حسب المراتب التي يستحقونها، فمن يقتل الإنسانية ، يقتل معها الخير والقيم ، يقتل الجمال ويزرع كل ملتناقضات التي لا تتماشى مع الطبيعة الإنسانية، جعفر يجلس بصحبة اللزي وهارون في المضيفة ينتظرون رد حسن على عرضهم.

جعفر

_ تفتكروا حيوافق على العرض.

هارون

_ وهو حياقي أحسن من كده أيه؟

جعفر

_ فمسك بس ورق الحيازه ونسلموه

لمعتصم ويحلها حلال بعد كده.

يدخل مهران

_ الشيخ آدم والمقدس بره.

هارون

_ خليفهم يدخلوا.

اللزي

_ حنشوف بسلامته وافق ولا لا.

دخل المقدس ارمنيوس وهو ممسك بيد الشيخ آدم ، تبادلوا معهم التحية

وأجلس الشيخ آدم وجلس بجانبه.

الشيخ آدم

_ أنا مش حطول عليكم علشان ألحق

صلاة العشاء، إسمع يا جعفر، عرضنا على حسن كل اللي قولتوه، وافق على حاجتين ورفض حاجة وضاف بدالها حاجة وضاف كمان حاجة من عنده.

هارون

_ فهمنا واحده واحده يامولانا.

الشيخ آدم

_ حسن وافق تتعاد محاكمته ووافق

يتبني بيت لحمدان بدل اللي إتحرق

ولكن ماوافقش أنك تدفع الديه.

جعفر

_ ماوافقش ليه ؟ دنا اللي حدفع مش هو.

الشيخ آدم

_ حسن طلب القصاص لقتل رجال اللزي

والقصاص لقتل الحمداني وسديري ومنازع

وكسر ايد منقريوس وقتل ليله.

هارون

_ يعني أيه هو حيقدّم نفسه قصاص لقتل

رجالة اللزي.

ارمنيوس

_ أيوه حيقدّم نفسه وزى ماهو يقدم نفسه

للقصاص ، اللزي كمان يقدم نفسه.

جعفر

_ ومين بقى اللي حيقتص منهم لو اللزي

قدم نفسه.

الشيخ آدم

_ حسن طلب تحطيب موت مع اللزي

عند الوسعايه ، لو اللزي قتل حسن

يبقى أخذ تار رجالته، ولو حسن قتل

الذي ، يبقى حسن أخذ بتار اللي اتقتلوا

الذي ضحك بصوت عالي .

_ انت بتقول لو هو قتل الذي ، هو مفكر

نفسه يقدر يغلبني ويقتلني.

جعفر يلتفت إلي الذي

_ إستنى انت يالذي ، يعني أنت موافق

على التحطيب ده.

الذي

_ دنا مستنيه من زمان يقع قدامي

موافق وحجيب موافقة أهل رجالي

جعفر

_ خلاص كده وافقنا على التحطيب

فيه حاجه ثاني.

الشيخ آدم

_ آه فيه ، حسن طالب كمان يتجوز

لوا حظ وبيقول علشان أرد ليها إعتبارها

جعفر يقف غاضباً

_ لا مش موافق على كده ونجوم

السما أقرب ليه أنه يكون جوز بنتي.

هارون يهمس في أذن جعفر.

_ يابيه أحنا مش متفقين إننا نتعامل بعقل.

_ ودي فيها عقل ياهارون.

_ ياجعفر بيه ، الولد مش كد الذي

والذي حيخلص عليه في دقيقتين

أنت شُفت جسمه كد آيه ، الذي لو مسكه يعصره في أيده، ولو هو قتل

الذي وده مش حيحصل، أنا خطه

بطلقة بارود ونرتاح منه ، قول موافق

للشيخ آدم.

_ قولهم أنت مش حتطلع من على لساني

هارون للشيخ آدم

_ وافقنا على كل اللي اتقال ياشيخ آدم

حنفذوا الإتفاق إزاي.

ارمنيوس

_ حسن قال ، لو وافقوا موعدا الجمعة

الي جايه ، تجيبوا القاضي في الجامع

الي حكم على حسن وبعد صلاة الجمعة

تتعاد المحاكمة وبعد ماخلصوا من المحاكمة

نطلعوا على الوسعايه وهناك حيحطب مع الذي.

جعفر

_ ماشي يامقدس.

ـ يوم غير عادي في الحاجر، إزدحم المصلين داخل المسجد وخارجه
بشكل لم تتعوده الحاجر في تاريخها، مئات المصلين حتى مايحيط بالمنزل إزدحم بالمصلين ،
داخل المسجد في الصف الأمامي جعفر وبجواره

القاضي وهارون واللزي ورجالهم تُحيط بهم من يمين الصف الأول حتى يساره، يليهم في
الصف الثاني معتصم ورجاله وخلفهم حسن وحمدان ومرسال والباقي من أهل البلدة، إنتهى
المؤذن من الأذان الثاني ، أذان الخطبة وصعد الشيخ آدم درجات سُلم المنبر حتى وقف في
منتصفه.

بدأ الشيخ آدم ، الحمد لله الذي أعزنا بالإسلام، وأمتن علينا بالأيمان وأمرنا بأداء شهادة
الحق ونهانا عن الكتمان، موضوع خطبة اليوم هو عن شهادة الحق واسترسل يقول، شرع
الإسلام الشهادة في بعض الأمور، لتوضيح الحق وكشف المستور ووعده على إقامتها أعظم الأجور
وبدأ يشرح لهم أهمية الشهادة وإسترشد بآيات من الكتاب والسنة وكيف أن الله نهى عن
شهادة الزور، خطبة قوية للشيخ آدم خلبت العقول وألهمت أهل القرية الحماس لقول كلمة
الحق والوقوف بجوار الحق وضرورة مقاومة الظلم ، أثر الخطبة عظيم على وجوه المصلين
وبدأ يختم بقوله أقول قولي هذا واستغفر الله لي ولكم وقام بالدعاء ثم إقامة الصلاة،
إنتهى الجميع من الصلاة وبدأت جلسة إعادة محاكمة حسن على أساس ظهور أدلة جديدة،
وجلس حسن أمام القاضي وعندما طلب الشهود تطوع العشرات من أهل البلدة ، إكتفى
القاضي

بإختيار خمسة منهم شهدوا جميعاً بأن مهران المتهم حسن بقتله هو من تهاجم على
حسن محاولاً قتله واضطر حسن الدفاع عن نفسه فوقع مهران قتيلاً وأنهم رأوه وهو يمسك
بالسكين ويتهاجم على حسن وعندما سألهم القاضي ليه مدخلوش يشهدوا قبل النطق بالحكم
أجابوا أنهم تم منعهم من الدخول، نظر القاضي إلى جعفر

فأجاب جعفر بأن من منعهم من الدخول أخذ جزاؤه ومات واحنا بنصلح الوضع دلوقت،
انتهت المحاكمة ببراءة حسن من تهمة القتل.

٣٠_ مذاق الدموع:

للمدوع عندما تنسكب نكهات خاصة، تحتار إلى أي مدى يصل بك مذاقها في الشجن
للمدوع مذاق، وفي الحزن والههم طعم آخر يفوق المرارة تتذوق طعمها شفتيك ، تجدها مألحة
بغير طعم الملح، حارقة بلا نار في الوسعاية حشد ضخم ورهيب من النار، خرج أهل الحاجر من
بيوتهم نساء ورجال ولم يتبقى فيها أحد ، حتى أهالي البلاد المجاورة التي كانت تأتيها أخبار
حسن والليزى أتوا على الوسعاية، المشهد مُهيب والصمت يُطبق على الجميع ماعدا شاعر
الربابة الذي يمدح الليزى في مقدمة الحضور جعفر وهارون وحاشيتهم من الرجال والشريف
معتصم ورجاله والشيخ آدم وبصحبه المقدس ارمنيوس وبجوارهم حمدان الذي يتذكر تحطيط
سديري مع الليزى في نفس المكان وبجوارهم مرسال ، دائرة كبيرة من البشر لم تتحملهم
الوسعاية إمتدت لعدة صفوف خلفية ، والنساء من الخلف يراقبن التحطيط وهناك من صعد

لأعلى أسطح المنازل حتى يتمكن من المشاهدة ، الليزى يتقدم مترين أمام جعفر في
الوسعاية وحسن كذلك يتقدم مترين أمام الشيخ آدم

أمام الشيخ آدم والمقدس ، الجميع ينتظر دق طبول التحطيط وشاعر الربابة يمدح في
الليزى الذي يتيه فخراً وغروراً.

شاعر الربابة

ياليزى يا سبع البريه

تخشى الوحوش نزالك

اليوم الخلايق بتتفرج

والكل يعرف مقامك

يابو كف يضرب اتنين

والموت ليهم سلامك

مسكين بيتدى أسد

ماخايف ينداس بأقدامك

حسن يفهم طبيعة الليزى وأنه يصطحب شاعر الربابة حتى يزيد ثقته

بنفسه ويلهبه الحماس ويجعله أكثر إتزاناً في القتال ويسيطر به على

غضبه وتسرع ، لذلك فكر حسن في الرد على شاعر الربابة واستفزاز

الليزى ، حتى يدخله التحطيط فاقد التركيز، تقدم حسن لمنتصف الوسعاية مشيراً لشاعر
الربابة بالتوقف.

– استنى أنت ياغراب اليبين
ياللي جاي مابتحسن كلامك
أنا حسن بن الشيخ عامر
مين يكون الي يقف قدامي
الكلاب تنبح في الدروب (يشير إلى اللزي)
والسباع تعرف مقامي.
قول للزي أني سيدك
ياشاعر ياكداب حخليك
تحفر قبره بإيدك
رد حسن على شاعر الربابة لاقى استحسان الناس وتحمسوا ينادون بإسمه ، اللزي في حالة
غضب وخرج عن شعوره ونظر للحواشي
– دقوا الطبول .

بدأت معركة التحطيب بين اللزي وحسن وقطعت أنفاس الجميع
من هول الضربات المشتركة من الإثنين، حسن ينظر لعين اللزي
بثقة وهدوء وكلما نظر للزي ، هجم عليه بضربة عشوائية
تفادها حسن، ضربات من الطرفين وكر وفر وسط صمت الجميع
تكاد أن تتوقف القلوب مع كل ضربة ، حتى أن الجميع نسوا أنفسهم بحركات وكأنهم في
ساحة التحطيب، معتصم يراقب حسن وبعد أن كان قلقاً على حسن ، عاد إليه الهدوء قليلاً
وهو يشاهد حسن في صد ضربات اللزي وكلما صد ضربة إشتعل اللزي غضباً.الشيخ
أدم يضرب المقدس بكوعه .

– طمني يامقدس .
– أهم بيحطبوا مع بعض والاتنين جامدين
بيضربوا ويصدوا.

– يعني حسن واقف بثبات يامقدس
قدام اللزي.
– أيوه واقف زي الأسد ومخلي اللزي مولع نار وبيضرب بغل.

_ اوصفلي الضربات يامقدس، عايشني
معاكم.

_ اللزي بيهجم على حسن عاوز يمسه
يتملك منه.

_ ياساير لو اقلك من حسن هذا الجاموس
ما تعلقش ، حسن مش مديه فرصة.

استمر التحطيب من بعد صلاة الجمعة حتى قرب أذان العصر
الذي أدرك قوة حسن وأنه خصم قوي ، لم يسبق له مواجهة
خصم مثله، حاول اللزي أن يلاحق حسن بضربات سريعة
حسن تركه يتسرع في الضربات المتلاحقة وهو يتفادها وبعد
آخر ضربة عنيفة من اللزي تفادها وقاما بضربه التي تمسك
بالعصا، فقد اللزي إتزانه قليلاً فعاجله حسن بضربة قوية
في معصم القدم جعلت اللزي يصرخ وينزل على الأرض وسط
صياح الناس وتشجيعهم لحسن ، حسن أشار لهم بالصمت
الذي يحاول أن يتحامل حتى لا يسقط، حسن.

_ الضربه دي علشان منقريوس اخو
المقدس الي كرت دراعه.

يضره ضربة قويه على يده اليمني يكسرها، سقطت منه العصا
وامسك اللزي بيده اليسرى يده اليمني متوجعاً ولم يرحمه حسن

_ والضربة دي علشان سديري وليله
يالزي.

يضره على يده اليسرى واللزي يصرخ.

_ باقي ليك ضربة منازع يالزي

الي عاهدته على أخدي بتاره منك

الذي ينظر له نظرة إستعطاف ولكن الغل والتشفي داخل حسن كان أقوى، يلاحق بضربة قوية على رأسه تهشمها وتتطاير الدماء على جلبابه وعلى الناس، هارون أدرك أن حسن تمكن من الذي أمسك ببندقيته ، لا يدري أن هناك عين تراقبه من بعيد، كانت لوحظ ، أخبرتها حليمه بكل شيء وتنكرت في جلباب أبيها ووضعت شال على رأسها وصارت كرجل غريب يشاهد التحطيط عندما لمحت هارون يصوب ببندقيته نحو حسن ، جربت مسرعة نحو حسن لتحتضنه فتأتي الطلقة لها من الخلف، معتصم يشاهد هارون متأخراً بعد أن أطلق النار ، جرى نحوه وحاول هارون الفرار فعاجله بطلقة في رأسه من الخلف، الجميع في حيرة من هذا الشخص الغريب الذي إفتدى حسن بنفسه، حسن في دهشة، حضن الغريب وهو في ذهول ، نزل به على الأرض بهدوء وهو يسنده بيده اليسرى، يقترب الناس من حسن، وهم في حيرة من هذا الغريب، نزع حسن الشال من على وجهه ليجد لوحظ فيصرخ.

_ لوحظ ، لوحظ.

لوحظ تبتسم وهي على ذراع حسن والدموع تنهمر من عينيها

_ ماتبكيش يا حسن ، علشان خاطري

مش عاوزه أشوف دموعك وأنا

موت ، عاوزه أبص لعنيك وبس

الي أول مره أبصلهم من خير خوف

إمسك إيدي يا حسن.

حسن يمسك يدها وهو يبكي بحرقة.

_ حتعيشي يالو لواحظ

_ قولتلك ماتبكيش علشان خاطري.

العناية الإلهية أردات أن تحفظ لوحظ لحسن وتم إنقاذها من الموت بإعجوبة، الرصاصة اخترقت ظهرها وسكنت على بعد مليمترات قليلة من القلب.

تمت بحمد الله

سمير حمايه